

حانَ دورك

عنوان الكتاب: حان دورك
الموضوع: رواية
التأليف: رناد شريف
مراجعة لغوية: منشورات الفئار
الإخراج الفني: محمود عنتر
تصميم الغلاف: محمد محسن
رقم الأيداع: 2021 / 1838
الترقيم الدولي: 1- 187- 844- 977- 987
الناشر: منشورات الفئار

www.facebook.com/elfnaar
elfnaar@gmail.com

فئلا الأشراف- أمام بوابة هليوبوليس- مدينة بدر- القاهرة الكبرى
المدير العام / أ. مصطفى أمين




01013483506
01550102499

جميع حقوق الطبع والنشر محفوظة

حان دورك


رواية

رناد شريف



إهداء

بالرغم من يقيني أنكم لن تقرؤوا هذا الكتاب إلا أنني
أهديه لكم.. لعل لقاءنا قريب.
إليكُم.. أبطال هذه الرواية.



تنويه

هذا العمل لا يمس للواقع بصلّة، ولا يتحدث عن أي أحداث
حقيقية..
وأي تشابه بينه وبين الواقع فما هي إلا محض صدفة.

ملحوظة

ليس كل ما تقرأه صحيح، وليس كل ما يكتب صادق، فالكتابة ما هي إلا سلاح شديد الخطورة.. إما أن يقتلك أو يحميك!
في الكتابة لا تحتاج سوى حروفك، وسرّك، لتصنع شفرتك الخاصة، وقارئ يحاول فك تلك الشفرة.. لعلك أنت من سيتمكن من فكها؟

(1) نورسين

كانت تجلس في غرفة الاستقبال تنتظر حتى يحين دورها لمقابلة الطبيب،
لقد انتظرت طويلاً لكن ذلك لا يهم في مقابل ما هي آتية إليه.

خرج صوت الممرضة تنادي:

- مدام حنان عبد الرحمن

- أيوة

- تقدري تدخليني للدكتور

- شكراً

ما أن دخلت الغرفة حتى بدأت بالنظر حولها، ذلك المكتب التقليدي
المليء بالأوراق، الكرسي الذي يجلس عليه الطبيب، الكراسي المقابلة
للمكتب، الكم الهائل من الشهادات الموضوعية داخل دولاب صغير، السرير
الموضوع في نهاية الغرفة، والأباجورة الموجودة بجانب السرير التي تصدر
ضوءاً خافتاً.

قاطع الطبيب تأملها قائلاً:

- مدام حنان اتفضلي

لاحظ التردد الشديد في تصرفاتها فابتسم لها؛ في محاولة منه
ليطمئنها، فجلست لكنها بقيت تنظر للأرض دون أن تتطرق بكلمة.

- اتفضلي.. أنا سامعك!

نظرت للطبيب للبدء في الحديث لكن سرعان ما عادت للصمت مرة أخرى، وأخفضت بصرها مجدداً.

- طيب ممكن تعرفيني على نفسك؟

قالت بانفعال:

- أنا مش جاية علشانى.. أنا جيت لحضرتك عشان بنتي، بصراحة

كنت مترددة أوي من الخطوة دي لكن مفيش حل ثاني

- ممكن توضحي لي قصدك؟

- بنتي.. بنتي عملت حادثة من فترة ودخلت في غيبوبة.. بس الحمد لله

فاقت وبقت كويسة، لا معتقدش إنها كويسة!

- حضرتك أنا دكتور نفسي مش...

قاطعته بصوت مكسور:

- بنتي شافت حاجات وهي غايبة عن الوعي عادي يعني زي ما بنحلم

واحنا نايمين.

- أيوه فين المشكلة؟

- المشكلة إنها مقتنعة إن اللي هي شافته ده حقيقي.. مقتنعة إنها كانت

صاحبة وراحت مكان شافت ناس و..

قاطعها الطبيب فجأة وكأنه تذكر شيء ما:

- أنا عايز أقابل بنت حضرتك

تتهدت الأم بإحباط وأردفت:

- مكنتش جيت لحضرتك.. هي رافضة تماماً إنها تروح لدكتور، مش

عايزة تقتنع برأي حد غير نفسها.

- آآآاه.. طبعا حضرتك عارفة إنني كطبيب مقدرش أساعد المريض طول

■ حان دورك

ما هو مش عايز يساعد نفسه، يعني من الآخر مينفعش أعالج مريض مش معترف بمرضه!

- ما هو أنا مش عوزاها تعرف إنك دكتور.

بسخرية قال:

- آسف يا مدام، بس الحقيقة إن الكلام ده مبيحصلش غير في الأفلام.

- يعني أعمل إيه يا دكتور؟

- أنا هسألك شوية أسئلة كده عن بنتك ممكن من خلالها أقولك حاجة

تساعدونها بيها.. مبدئياً كده اسمها إيه؟ وعندها كام سنة؟ بتدرس ولا خلصت؟

- اسمها نورسين، عندها ٢١ سنة، مش بتشتغل وبتدرس فنون جميلة

بس ده كان قبل الحادثة وهي موقفة دراسة السنة دي وهترجع من بداية السنة الجديدة باذن الله

- مفهوم.. كان إيه سبب الحادث؟

- عملت حادثة بالعربية.. قدر ربنا.

قال الطبيب منتظراً الإجابة: كانت في مستشفى إيه؟

- في مستشفى ×.....× بس ده هيفيدك في إيه؟

- يعني معلومات عادية.. اکتبي لي رقم بنتك هنا وأنا هحاول معاها

يمكن نوصل لحل

بعد أن سجلت رقم نورسين للطبيب أخذت حقيبتها لترحل، فأوقفها

الطبيب قائلاً:

- أنا لسة مشوفتش حالة بنتك.. بس اللي واضح لي من كلامك إن بنتك

مش محتاجة دكتور نفسي، بنت حضرتك محتاجة حد يصدقها لأنها نفسها
مش عارفة تصدق اللي هي شافته ولا لأ، على كل حال أنا هبذل جهدي على
أمل إنني أقعد معاها ووقتها هقدر أساعدك باذن الله.
- شكراً، أستاذك.

خرجت حنان من العيادة عائدة لمنزلها، فوجدت نورسين لاتزال نائمة
وأختها ندى تشاهد التلفاز، سألتها حنان عمّا إن كان والدها قد عاد من
العمل بعد، فأومأت برأسها أن "لا" ولم تكمل الإيماءة حتى سمعن صوت
قفص الباب يُفتح، معلناً وصول الأب. نظرت له حنان نظرة قلق لم يفهم
معناها، ثم دخلت الغرفة؛ لتغيير ملابسها فلاحق بها، وأغلق الباب:

- كنتي فين يا حنان؟

- روحت للدكتور يا مصطفى

- ليه؟

- عشان خاطر نورسين..

- بس نورسين مش تعبانة، حتى الدكتور طمّني على وضعها آخر مرة

كنا في المستشفى.

- أنا مش قصدي كده..

- أمال قصد.. أوعي تكوني روحتي للدكتور النفسي اللي قولتي عليه؟!

- ايوة روحت

- إنتي اتجننتي يا حنان وعاوزة تجنني البنت معاكي!

■ حان دورك

- يعني إنت شايف الكلام اللي هي بتقوله هو اللي عاقل أوي؟
- إنتي ناسية إن بنتك كانت في غيبوبة؟ يعني طبيعي جداً تكون شافت حاجات وهي غائبة عن الوعي وطبيعي إنها متكونش قادرة تستوعب إن كل ده خيال.. قدري اللي هي فيه واسمعي منها مش تروحي لدكتور!
- لا مش ناسية، بس هي مش قادرة تسمع غير صوت نفسها قولت يمكن لما تتكلم مع حد تب....

- وليه تتكلم مع حد وأبوها وأمها واخواتها موجودين؟ يا ماما الدكاترة دول هيدخلونا في دوامة نصب ومش هيبجي بنتيجة!
- لا نصب ولا حاجة ده دكتور، وبعدين خلاص بقى يا مصطفى أهو اللي حصل

- لا حول ولا قوة إلا بالله.. ربنا يهديكي.
فتح مصطفى باب الغرفة ليجد نورسين تقف أمامه ولا زالت علامات النعاس ظاهرة عليها فعانقها ونظر إلى والدتها قائلاً:
- بقى القمر دي تروح لدكتور نفسي.

ضحكت نورسين على جملة والدها، ثم تركت عناقه لتساعد أمها - التي ظهر عليها ملامح الغضب - في تحضير الطعام، اقتربت منها دون أن يلاحظهم أحد ثم همست في أذنها قائلة: "شكراً"، فأجابتها بابتسامة.
بالرغم من احتياجنا جميعاً لطبيب نفسي إلا أننا لا نعترف بالأمر وكأنه إثمٌ عظيم على من يخضع له. لكن لأصدقكم القول كثيراً ما نكون بحاجة إلى أشخاص صادقين بقربنا، نثق بهم ونخبرهم عمّا في صدورنا دون قيود. والشخص الوحيد القادر على تحديد مدى احتياجه للشئ هو أنت.. فقط أنت.

(2)

لربما الحل في مكالمة

لا تستهين بالمكالمات الهاتفية، فدقيقة واحدة قادرة على تغيير يومك..
إما للأفضل أو للأسوأ.

تلك المكالمات التي تطورت مع السنوات فأصبحت وسيلة سهلة لتقريب من هم بعيدون عنك، ولكن في حقيقة الأمر هي ليست سوى أداة مجردة من المشاعر توهمك أنك قريب ولكن هنالك العديد من الحواجز تمنع اقترابك. فكم من أحياء افترقوا بسببها، ربما إن اجتمعنا الحبيبان بدلاً من تلك المكالمة لكانا الآن معاً؛ كان ليتمكن من رؤية دموعها وكانت لترى هي اشتياقه. إن كان الصديقان معاً لما اختلفا؛ كانا ليُدركان أن النقاش جرى على سبيل المزاح وليس التحدي كان الخلاف انتهى بضحك أحدهما، ثم ضحك الآخر على الأول.

لولا وجود المكالمات لما كان الآن آلاف الشائعات تنتقل بسرعة البرق.. بل أسرع!، دون وضع ثانية واحدة للتأكد من صحة ما يتم نقله. ولكن لا يمكننا القول إنها تفتقر تماماً للإيجابيات.. فبعض المكالمات تكون كطوق النجاة لأحدهم.

بعد أن جلس الجميع لتناول الطعام، قالت حنان بحزن:

- والنبي مش القعدة دي ناقصة أخوكم؟

ردت نورسين: إنتي محسساني أنه مهاجر ليه يا ماما؟!

■ حانَ دورك

- أجابت ندى: قلب الأم بقى..
تدّخل والدهم موجهاً الحديث لحنان: مش إنتي اللي قعدتي تزني على
دماغه.. عايزة أفرح ببيك؟ أديكي فرحتي يا أختي.
- مكنتش عارفة أنه هيوحشني كده، كنت جوزت واحدة من البنات
وسبت أحمد.
- أنا من رأي نقوم احنا يا نور عشان شكلنا بقى وحش أوي.
- كلها كام شهر وتحصليه يا ندى.
قاطع مصطفى ضحكهم قائلاً بنبرة جادة: صحيح يا ندى ابقى عري في
خطيبك إني عايز أقابله.. أقولك هبقى أكلمه أنا.
نظرنا الفتاتان لبعضهما بريية، فهمست نورسين في أذن أختها:
- ربنا يستر..
رن هاتف نورسين فذهبت لإحضاره من الغرفة، نظرت في هاتفها لترى
رقم غير مسجل فأجابت؛ ليعلن المتصل عن هويته:
- أنا دكتور علي.. ممكن آخذ من وقتك دقيقة؟
لم تنتظر لتسمع ما سيقول؛ اكتفت بإنهاء المكالمة دون إجابة. دخلت
المطبخ لتغسل الصحون، فعاود ذلك الرقم الاتصال مجدداً، أجابت على مضمض:
- نعم؟
- أنا دكتور...
- عرفت.. حضرتك عايز إيه؟
- عايز أقابلك، وأتكلم معاكي شوية.. أنا عايز أساعدك مش أكثر!

- ومن امتى الدكاترة هما اللي بيكلموا الناس عشان يساعدهم؟
- أنا مش بكلمك من الباب للطاق.. والدتك قانتلي إنك بتشويه حاجات و...
شكرًا لجهود حضرتك أنا مش محتاجة دكتور
- أبعدت الهاتف عن أذنها؛ لتغلق، لكنها سمعته يقول شيئًا منعها من ذلك، فعادت لتحادثه قائلة:
- قولت إيه؟!
- أنا مصدقك.. اللي إنتي شوفتيه ده مش خيال، إنتي صح.
لوهلة شعرت أن هنالك من يفهمها.. يصدقها.. لكن كيف له أن يصدقها وهو لم يسمعها حتى؟ الكثير من المشاعر المتداخلة.. هنالك حرب داخلها تخبرها أن تقابله وتحكي له ما حدث معها، وأخرى تخبرها أنه طبيب لن يصدقها هو فقط يقوم باستدراجها كي تخب.....
أوقفت كل الصراعات القائمة داخلها وقالت:
- أنا مستعدة أقابل حضرتك..
- هبعت لك مكان عيادتي.
- لا مش في العيادة.
- خلاص اختاري المكان اللي يريحك!
- نادي الجزيرة عارفه؟
- أكيد
- تمام الساعة ٦ كويس؟
- بصراحة مش متأكد هرجع لجدولي وأرد علي..×سكت الطبيب برهة

■ حانَ دورك

يحدث نفسه: ربما لا تجيب عليّ مجدداً وربما تهرب.. وإن كنت منشغل
سأفرغ نفسي لها، ساعة لن تضر× خلاص بكرة الساعة ٦ إن شاء الله.
وانتهت المكالمة.

بالرغم من عدم ثقتها في نجاح ما خططت له، لكن المحاولة مراراً لن
تُضر؛ بل ربما تكشف لها أبواباً أخرى لم تعي وجودها من قبل، ولم يعقها
القلق من الفشل، عن السعادة كون الأمر يسري على ما يرام حتى الآن.
هي على يقين أن الله لن يتركها تائهة هكذا طويلاً.. على الدائرة أن
تُغلق، وعلى الطريق أن ينتهي.

لا تحب نورسين أن تشغل كثيراً بالأفكار السلبية لذا قررت أن تترك
الغد للأعلى من كل شيء هو وحده الذي يُحسن تدبير كل شيء من حولنا،
قادر على تدبير حياتها..

إنه فقط الله.. من نلجأ له في أي وقت، ونحكي له كل شيء دون خجل،
ونطلب منه ما نتمنى دون حرج، وفي المقابل هو يكرمنا.. ويسترنا.. ويحقق
لنا ما نتمنى بل أضعافه!

(3)

هي أغلى من كنوز العالم.. الثقة

خرجت نورسين من غرفتها إلى الصالة حيث يجلس والدها مع أمها، وطلبت أن يرافقها للشرفة؛ فلديها ما تحدثه بشأنه، وقد فعل، قال الأب بوجهه البشوش:

- خير يا ست نور؟

- الدكتور اللي ماما راحت له كلمني..

تغيرت ملامح الأب فوراً، وقال: كبري دماغك يا نور، إنتي عارفة أمك

عليها حركات غريبة شوية و..

قاطعته نورسين: أنا قررت أقابله يا بابا

- وده من إيه؟

- مش عارفة.. بس يمكن يقدر يساعدني

- يساعدك في إيه؟

- معرفش.. بس أنا فعلاً مش فاهمة اللي أنا مريت بيه ده بجد ولا خيال

زي ما بتقولوا، أنا عايزة أوصل لحاجة واضحة لأنني حاسة إن كل حاجة

مشوشة.. يمكن الدكتور ده يساعدني ويمكن لأ.. مش عارفة!

- طب وإنتي بتقوليلي ليه دلوقتي؟

- عشان تكون عارف، وعشان اطمئنك.. ويمكن لو اتكلمت مع الدكتور ده

يفهم حاجة وأطمئن ماما برضه!

- ماشي يا نور اعلمي اللي يريحك .. بس اعرف في كويس أوي إنك مش مريضة!
- أنا عايزة أقابل الدكتور عشان أثبت لكم دم..

وضع يده على كتفها ثم أردف: ماشي يا حبيبتي، متسيش تقفلي
البلكونة وإنتي طالعة

خرج مصطفى وبقيت نورسين تنظر على المارة، أي مارة؟، إنها تنظر
للاشئ.. لا أحد في الشارع.. الجميع نيام وربما يقظة، لا يعلم عنهم أحد.
ظلت تنظر للمباني وتفكر.. هل خلفها أحد مر بمثل حالتها ويبحث
عن شخص مثله كما تفعل هي؟، هل هنالك شخص يبحث عن آخر يثق به
ويحكي له ما يمر به دون تجاوز أي حدث!

ترى هل هنالك شخص يستحق أن تثق فيه حتى تصل لتلك الدرجة التي
تجعلك تحكي له كل شيء عنك!

بالنسبة لنورسين فالأمر بغاية الصعوبة، التجربة جيدة في كل شيء
باستثناء الثقة، إياك أن تجرب الأشخاص في الثقة، فالثقة كالماء العذب إن
تلوث لا يمكن أن يعود صالح للشرب، فإن فقدت الثقة في أحدهم سيصبح
الأمر شاق أن تثق في آخر.. لذا تأمل قبل أن تضع ثقتك في شخص.

وهي ترى أن الله وحده من يستحق ثقتك، فلن يفضحك ولن يمل من
شكواك ولن يتركك وحيداً ولن يخذلك أبداً، وإن احتجت لصديق فاطلب
من الله أن يرزقك خير صُحبة تُكن لك عون وملجأ.

الثقة: هي كل ما يملك الإنسان من مشاعر، ذكريات، ضحك، ألم، كل
ما حدث له، وكل ما سوف يحدث.. العديد من الأشياء التي يصعب على

الإنسان الاحتفاظ بها وعيشها وقضائها بمفرده، فيبدأ رحلة البحث عن شريك، يُقاسمه كل ما يُحب وكل ما يبغض دون أن يمل.
بعد تفكير طويل أخذت نفس عميق.. تتهدت.. نظرت للسماء.. أغمضت عيناها.. قالت الكثير والكثير دون أن يتحرك فاهها، يكفيها الحديث الذي يقوله قلبها ويعلمه ربها.
خرجت وأغلقت الشُّرفة كما أخبرها والدها وذهبت لتغيير ملابسها والنوم..



كان الوقت يمر ببطء ليقرب عقرب الساعة الصغير من الرقم ستة!
جالسة تنتظر موعدها بفارغ الصبر، عيناها لم تضارق الساعة، حتى وصلت لل الخامسة والنصف، حينها ابتسمت ابتسامة واسعة ثم دخلت غرفتها، لا تعلم ما الذي يجدر بها ارتداؤه.. ولم تفكر؟، إنها ذاهبة لمقابلة بسيطة.
أخرجت ما سوف ترتديه ثم وقفت أمام المرأة تُعدّل حجابها، لم تملك يوماً أعين زرقاء أو خضراء، ولا بشرة صافية كتلك التي نراها لدى الممثلات، ولا شعر لامع ضد التساقط.. بل كانت تمتلك ما هو أفضل؛ حبها لذاتها، ترى نفسها جميلة دون مساحيق التجميل والملابس المبالغ بها، أحببت مظهرها الطبيعي فكيف لا ترى نفسها جميلة؛ واللّه خلقها في أجمل حال!
خرجت من الغرفة، وقفت أمام باب المنزل ترتدي حذاءها.. فلحقت بها أمها لتسألها:

- على فين إن شاء اللّهُ؟

- ما إنتي عارفة كل حاجة، اللي بدأت فيه لازم أكمله × غمزت لها ثم رحلت ×

حان دورك ■

فور أن وصلت النادي، وجدت الطبيب يتصل بها فأجابت بعد أن أخذت نفس عميق، ليخبرها أنه وصل وينتظرها في المكان المقصود.. إنها نقطة لصالحه، يحترم المواعيد إذا يستحق الاحترام، كان ذلك ما قالته نورسين في عقلها ثم بدأت بالإسراع حتى لا تتأخر.

بعد أن اقتربت وجدت العديد من الأشخاص وهي لا تعرف شكله، لكنها رأت -رجل ثلاثيني بنظارة لها إطار نحيف، يرتدي ثياب تبدو رسمية إلى حد ما.. ملامحه حادة وصريحة؛ جعلتها تشعر بصرامته، لكن لون عينيه الأخضر اوتين جعل الأمر أقل حدة- لا تعلم هل هذا هو الطبيب أم لا، أمسكت هاتفها واتصلت برقمه فوجدت ذلك الرجل يجيب على هاتفه حينها أدركت أنه هو.. اقتربت من الطاولة التي يجلس عليها، فنظر لها بعدم فهم حتى قالت:

- أنا نورسين

- وقف مسرعاً: أهلاً وسهلاً.. اتفضلي

- قالت وهي تجلس: شكراً

- تحبي تشربي إيه؟

- ممكن نأجل الشرب لوقت تاني؟

- مفيش مشكلة طبعاً

.....

- قال الطبيب بمزاح؛ قاطعاً حاجز الصمت بينهما: الصمت يسود

المكان!

ابتسمت نورسين واستمرت في صمتها تاركة مجالاً له ليبدأ الحوار قائلاً:

- والدتك قالت لي إنك شوفتي حاجات وإنتي غايبة عن الوعي و....

- كمل!

- أيًا كان اللي إنتي شوفتيه فأنا مصدقه

- دكتور علي اللي أنا شوفته مش حاجة غريبة لكن صعب حد يصدقها

من غير ما يشوفها

- طب إيه رأيك تحكي لي اللي شوفتيه.. وأوعدك إن مهما كان كلامك

غريب أنا هصدقه..

- تتهددت ثم قالت بصوت خافت: هثق في إنك تكون مُرشد ليا مش

العكس.. وهحكي.

كلما اقتربت كلما أصبحت رؤيتك مشوشة، متحيزة، غير واضحة. ابتعد

لترى الصورة أوضح، فهناك العديد من الأشياء المخبأة داخل ما تراه،

وكلما اقتربت كلما قل عدد ما يمكنك رؤيته، إن كان في لوحة، وإن كان في

بني آدم!

ولكن احذر.. لا تتجاوز حد الابتعاد فتتسى وتُتسى..

فلا تقترب حتى تُعمى بصيرتك، ولا تبتعد لدرجة تمنعك من الإبصار..

كن على مسافة مريحة للعين.

كان طبيب العيون صادقاً حينما أخبرك أن تترك مسافة بينك وبين

التلفاز لا تقل عن مترين إلى ثلاثة أمتار، لكنه نسي إخبارك أن الأمر ينطبق

على البشر أيضاً؛ فهم أشد خطورة!

(4) عليك اختيار الطريق

على الأغلب أصعب الأمور التي تواجه المرء هي اتخاذ القرار، فهو يشكل ضغط كبير وإن كان في أمور حياتية بسيطة: كالملابس.. فقد تقف أمام المرأة خمس ساعات لتقرر ما عليك ارتدائه، أو أن تقف أمام نادل مطعم ما، بالساعات لتقرر ما سوف تطلب!

ولكن عندما يكون الأمر في أشياء أكثر أهمية حينها تكون المجازفة.. مما يعني ضغط مضاعف، قلق أكبر، وتركيز مبالغ.

مهما بدا الأمر صعب، في النهاية عليك اتخاذ القرار وإلا لن تسير الحياة، أو ستسير. لكن بدونك!

ستبقى أنت في مكانك.. لذا توكل على الله، وتدبر الأمر، ثم قرر لا يهم إن كان قرارك مثالي.. ففي الكثير من الأحيان تكون بحاجة قرار خاطئ للعثور على الطريق الصحيح، فليس كل ما هو خاطئ مدمر، بل كل ما هو خاطئ مُعلم.. خذ قرارك وسر في طريقك..

وها هي نورسين تخطو أول خطوة في دربها، لعلها خيرًا.

أخذت نفس عميق وبدأت بالسرد:

- هحاول أحكي بالترتيب

- اتكلمي براحتك

- حضرتك عرفت من والدتي إني كنت في غيبوبة، بس الحمد لله مش

مدة طويلة، وأنا غايبة عن الوعي شوفت حاجات.. تقدر تقول روحت مكان..
أو قابلت ناس

قاطعها علي: طب واحدة واحدة عشان أقدر أفهم!

- مش عايزة أحكي تفاصيل دلوقتي.. أو مش جاهزة..

- على فكرة يا نورسين أنا حالياً بكلمك كصديق مش طبيب، وعشان

كده عايزك تتكلمي براحتك..

- شكراً

- على إيه؟، أنا لسة معملتش حاجة!

- لأ بجد شكراً، أنا فعلاً كنت محتاجة أتكلم مع حد.. أنا أول مرة أتكلم

مع حد غريب عن نفسي!

- احنا أساساً متقابلين عشان تتكلمي.. يعني مش عقل إننا نضيع وقت

على الفاضي، واحنا عندنا هدف عايزين نوصل له.

- صح... هو أنا ممكن أسألك سؤال؟

- اتفضلي

- ليه اخترت الطب النفسي تحديداً؟

فكر قليلاً ثم أردف: تقدر تقولني عشان مفيش حد في الدنيا مش بيمر

بحالة نفسية، لكن في حالات بسيطة بتداري بالأيام والأشخاص فمش

بتكون باينة أصلاً لدرجة إن صاحبها بينساها، وحالات من كتر ما هي باينة

صعب أوي الأيام أو الأشخاص يداروها.

- طب وحضرتك مين فيهم؟

■ حان دورك

- أنا يا ستي من الأشخاص اللي بتحاول تخفف وجع الحالات اللي
مبتخفش بالأشخاص، معقدة مش كدة؟

- أنا قصدي إنت أنهي حالة منهم؟، ×لم تجد منه رداً× إيه؟

- تصوري أنا عمري ما سألت نفسي السؤال ده!

أضافت ضاحكة: شكل باب النجار مخّلع، خلاص بلاش أسئلة، هستأذن

أنا علشان اتأخرت

- استني.. ميعادنا الجاي امتي؟

- أنا اللي حددت ميعاد النهاردة، يبقى الميعاد الجاي عليك

- والبنزين على مين؟

- لا دي مقابلة أصدقاء يا دكتور، عن إذتك

- اتفضلي

رحلت نورسين بعد أن شعرت بالقليل من الراحة، ورحل على بعد أن

ازداد حملته.. يوّد مساعدتها لكنه يخشى كونه عاجز! أثار كلامها ريبته؛

نورسين ليست مريضة نفسية إنها تمر بما هو أكثر تعقيد.. للمرض النفسي

علاج، ولا علاج لما تمر به، فهو على دراية كاملة بما حدث مع نورسين. الأمر

صعب لكنه يحب تجاوز الصعوبات..

عادت نورسين لمنزلها فوجدت والدها قد وصل بالفعل، وفور أن رآها

أخذها ليتحدثا:

- شكلك مبسوط؟

- بصراحة اه..
- عملتي إيه؟
- اتكلمت وحيكيت له.. حسيت أنه ممكن يساعدني
- الدكتور ده إسمه إيه؟ عيادته فين؟ مين؟ عنده كام سنة؟
- إسمه علي
- سكت والدها ينتظر أن تكمل فأدرك بعد ذلك أنها انتهت: بس كده،
ده اللي تعرفيه عنه؟
- مش هحتاج أعرف حاجة تانية، أنا أصلاً مش بقابله على إنه دكتور
أنا بقاب... .
- قال والدها وقد أظهرت ملامحه الغضب: أمال قابليته ليه؟
وهيساعدك ازاي يعني وإنتي بتقولي مش رايحة له لأنه دكتور!
- يا بابا افهمني
- أفهم إيه يا نور! إنتي اتجننتي؟ إنتي تعري في إذا كان دكتور فعلاً ولا
بينصب عليك؟ وبعدين إنتي فاكرة أنه قابلك عشان عايز يساعدك لله
وللوطن! لازم يكون له غرض من وراكي
- يا بابا هو خد رقمي عن طريق ماما أصلاً، وماما كانت عنده في
العيادة أكيد مكلمتهوش في الشارع، ثم هيكون إيه غرضه يعني!
- بيكدب عليك إنتي وأمك
- هو جاي يخطبني يا بابا! ده دكتور مش هيشوه سمعت... .
- نورسين الموضوع منتهي.. الدكتور ده متشوفيهوش تاني، أنا سيبتك

■ حان دورك

تجربي مرة على أمل إنك تقتنعي أنه أي كلام، مش تيجي تقويلي حسيت أنه هيساعدني! تقدري تقويلي عملك إيه يساعدك؟ واللي عمله ليكي أنا مستعد أعمله معاكي بس هكون مطمئن عليكي في نفس الوقت.

خرج والدها من الغرفة غاضباً وبقيت نورسين في مكانها، تشعر وكأن أحدهم حطّم المصباح الوحيد الذي أضاء عتمة قلبها. موقف والدها غريب، لا يناسب شخصيته ولا طريقتة، هي تعلم أنه يحبها ويخاف أن تُؤذي.. لكن هنالك العديد من الطرق التي يمكنه من خلالها إخبارها بذلك غير الصراخ، والغضب. لا تجد له مبرر ليغضب وهو على علم بتلك المقابلة. (الصراخ، الصوت المرتفع، الغضب، التكسير، الحركات العدوانية)

مجموعة من الصفات إن تملكك جعلتك خاسراً وإن ظننت العكس! توهمك أنك الأعلى، الأفضل، الذي يستمع له الجميع، وفي الحقيقة.. أنت الأضعف، الأجبن، الذي يفقد الثقة فيما يقول ولا يستمع له أحداً.



دخلت نورسين غرفتها وغيّرت ثيابها ثم ذهبت لوالدها، فوجدته يتحدث مع أمها بغضب جعلهما لا يدركان وقوفها، فلم تستطع منع نفسها من استراق السمع، كان والدها يلوم أمها على ذهابها للطبيب وفتح باب لن يأتي من ورائه الخير؛ مبرراً أن ما مررت نورسين به لم يكن سوى أوهام وربما تخاريف لا يجدر بنا إعطائها فوق حجمها، فتدافع أمها عن موقفها أن الطبيب سيساعدها ولن يؤذيها وأنه يجدر به الاعتراف بأن هنالك خطب ما أصاب ابنته..

عادت نورسين لغرفتها، بعدما أدركت أنه لا محل للنقاش.. أمها تظنها مريضة، ووالدها يراها تهلوس.

تعلم أن لا أحد يحبها مثلها لكن ذلك لا يعني أنهما يفهماها، هي لا تريد أن تتحدث مع أمها كي لا ترى نظرات شفقة ورأفة في عينيها على ابنتها - بالرغم من علمها بحقيقة ما يجري - إلا أنها تخشى نتائجه كمثل أي أم، ولا تستطيع التحدث مع والدها كي لا ترى نظرات ملل وتكذيب في عينيها تجاه أقوالها. الأمر مُتعب، ذلك الطبيب ليس مميز لكنه بادرها ب ردة فعل جديدة، أظهر لها اهتمام وإن كان لغرض آخر فليكن.. وإن كان يكذب بشأن معاملته لها كصديق لا يهم، في مقابل أن تجد من يعاونها في معرفة حقيقة ما رأته، بل ما عاشته.

كان الأمر صعب لكن كما قلنا علينا اتخاذه..



(5)

وإن بدا مستحيلاً فلنحاول

قررت نورسين أن تستمر في مقابلة على فهو أملها الوحيد بعد أن أدركت أنه من المستحيل أن يقتنع والدها بما رأت أو يصدقها، لكنها لن تفعل ذلك دون موافقته؛ لذا ستحاول إقناعه مجدداً.. حتى وإن بدأ الأمر مستحيلاً عليك أن تحاول.

في صباح اليوم التالي:

خرجت من غرفتها متجهة إلى غرفة والديها، كانت نظرة والدها توضح أنه يعلم ما هي آتية لقوله فهو يعلم ابنته التي تشبهه كثيراً خاصة في عنادها؛ فإن أرادت شيء لا تتنازل عنه، وإن اقتنعت بأمر لا محل لتغيير رأيها به، بدأت حديثها بهدوء قائلة:

- من الآخر كده يا بابا أنا مش لاقية سبب يخليك ترفض إنني أقابل دكتور علي.. أنا فعلاً ارتحت لما اتكلمت معاه وحسيت أنه ممكن يساعدي، لأنني بجد بقيت تايبه مش عارفة أصدق إنها أحلام وتخاريف، ولا أصدق إنها ممكن تكون علامة مرض، ولا إن اللي شوفته حقيقي.

- السبب إنني خايف عليك، ولو على تصدقي إيه فإنتي أساساً مش محتاجة تفكري في الموضوع، إنتي شوفتي حاجة لفترة معينة وانتهت ليه بتدي الموضوع أكبر من حجمه!

"ليتك تدرك يا أبي أن تلك الفترة لم تنتهي بعد.. لازال كل شيء

قائم ولا زالت الأحداث مسجلة في عقلي وهاتفي! فلا يمكنني التحكم بعقلي، ولا أعلم من سجل تلك الأحداث في هاتفي، أراها في أحلامي ولا أتمكن من تجاوزها.. ليت من سجلها يقوم بإزالتها.. ليتني أتمكن من النسيان" كانت تلك كلمات راودت ذهن نورسين لكنها لم تتمكن من نطقها فقالت بدلاً عنها:

- خايف عليا يبقى تعالى معايا واقعد معانا وخليك جنبي، مش تقولي

متروحيش وخلص

- وأنا فاضي أسيب شغلي عشان أقعد أسمعكم بتتسامروا؟

- اه تسيبه، لو عشان بنتك يبقى تسيبه.. لما تلاقي إن الموضوع فارق

معايا بجد يبقى لازم تصدق إنها مش مجرد أوهام!

- نورسين...

- بابا أنا عمري ما كسرت لك كلمة.. بس مش هقدر أعمل حاجة أنا

مش مقتنعة بيها، خاصة لو الحاجة دي فارقة معايا!

- الحاجة دي ممكن تدمر لك مستقبلك

- إنت ليه محسني إنني قابلت سفاح!

- نورسين الموضوع انتهى، إنتي بتتكلمي في إيه؟

- لا منتهاش يا بابا، أنا آسفة جداً بس أنا عايزة أكمل في الموضوع ده

يمكن أوصل لحاجة

- ولو موصلتيش؟

- يبقى اسمي حاولت، المحاولة والتجربة والسعي وراء حاجة عايزة

أعرفها مش غلط، بالذات لو الحاجة دي بتمسني بشكل شخصي

■ حان دورك

تدخلت والدة نورسين؛ للتخفيف من شدة الحوار: خلاص يا نورسين،
روحي دلوقتي وبابا هيفكر في الموضوع ده

- تهدي مصطفى ثم أردف: اسمعي كلام أمك

خرجت من الغرفة لتجد أختها تفتح باب المنزل عائدة من المستشفى
- ندى في سنة الامتياز من كلية الطب- تساءلت عن سبب ملامح الغضب
التي اعتلت وجهها، لكن نورسين لم تجب بل غيرت دفة الحديث سائلة أختها
عمًا إذا كانت أخبرت ياسين - خطيبها- عن رغبة والدها في لقائه فردت
ندى بالإيجاب ثم تركتها؛ لتغيير ثيابها.

دخلت نورسين غرفتها وأغلقت الباب، فتحت هاتفها فوجدت رسالة
من علي على "الواتساب" يخبرها بالموعد والمكان للقاء القادم.. لم تفتح
الرسالة واكتفت بقراءتها من الخارج.. لا تعلم هل تخبره بما جرى أم فقط
تخبره أنها ربما لن تراه للفترة القادمة؟
دخلت لوالدها مجددًا وسألته:

- قررت يا بابا؟

قالت حنان وهي تنظر لمصطفى وتغمز له: بابا وافق عشان خاطرك
قال والدها بعدم إكتراث: أتمنى بس بعد كل ده يبجي بنتيجة يا نور
أجابت بمزاح: إن شاء الله يا بابا.. حسستني إني بقنعك توافق على
عريس يا راجل إيه ده!

تذكرت حنان شيء؛ فوجهت الحديث لمصطفى قائلة: صحيح إنت كنت
عايز خطيب ندى في إيه؟

أجابها:

- هشوف ناويين على إيه؟، البنبت كلها كام شهر وتخلص فترة الامتياز وهو خالص الشقة عايز أعرف هما مستنيين إيه؟!

- وكلمته؟

- لسه.. كويس إنك فكرتيني

خرجت نورسين من غرفتهما عائدة لغرفتها والسعادة تملكها، فتحت رسالة علي لتجد أن العنوان لم يتغير ولكن التوقيت اختلف، فأرسلت له رسالة تخبره فيها أنها ستكون موجودة تمامًا على الموعد.

لا تفعل سوى الشئ الذي تريده، لا تتنازل عمّا تود لمجرد معارضة شخص آخر، فلا أحد سيشعر بما تشعر به، ولا أحد سيقدر مدى احتياجك للشئ سواك.. فلا تجعل لقراراتك متحكم غيرك!

وهذا لا يعني ألا تستشير من حولك، بل اجمع قدر هائل من الآراء، فربما تكون مخطئ.. لكن اجعل رأيك هو الأولى عند التنفيذ.

(6)

هنا تكمن البداية

في حياة كل فرد منا موقف، أو شخص كانت عنده البداية الحقيقية..
إما بداية النضج، أو الحب، أو التغيير، أو الحياة!
لكل شخص وقت معين بدأت عنده حياته.. لا أعني الحياة التي تدبّ
فينا فور ولادتنا، بل الحياة الأخرى.. أن تجد سبب تحيا لأجله، أن تبدأ في
تطوير ذاتك وتحسينها، أن تعثر على ما كان ينقصك، أن تشعر أنك حي..
جميعنا لم نختر أن نحيا ولكن جميعنا قادرين على تحديد نوع الحياة التي سنجيها.
في اليوم التالي استيقظت نورسين الساعة السابعة صباحًا؛ استعدادًا
لموعدها مع علي، وقد انتهت من ارتداء ثيابها سريعًا فلا مجال لإضاعة
المزيد من الوقت؛ فالיום هو بداية الرحلة!

ذهبت لإخبار والدها أنها ذاهبة فوجدته هو الآخر يستعد للتوجه إلى
عمله، سألتها عن سبب اختيار هذا الموعد المبكر فالساعة لاتزال الثامنة
صباحًا، فأجابته بدورها: "يعني كنت هترضى أنزل لو كان متأخر" وقد
كانت إجابة مقنعة لوالدها، فاكتفى بتوصيتها بالاعتناء بنفسها والاتصال
به إن احتاجت أي شئ، وأضاف أمها قبل أن تتركها ترحل ألا تتأخر في
العودة لأن ياسين -خطيب ندى- سيزورهم اليوم وعليها أن تتواجد معهم
للمساعدة، أو مأت بالإيجاب ثم رحلت مسرعة؛ حتى لا تتأخر.

بعد وصول نورسين وجدته يجلس على نفس الطاولة التي جلسا عليها سابقاً، اقتربت منها وجلست، ألقى التحية عليها ثم سألها عما تود شربه، لكنها لم تُبدي رغبة في طلب أي مشروب واكتفت بالمياه، حاول مراراً فتح حوار معها؛ ليتمكن من استدراجها في الحديث، وقد خابت حيلته؛ فكانت تُصد محاولاتِه بإجابات مقتضية، لكنه لم ييأس ويبدو أن إصراره لم يضع هباءً، فقد تمكن من جذب انتباهها بسؤاله الذي جاء بغتةً:

- إيه أكثر حاجة نفسك فيها؟

- أجابت بعفوية واندفاع: أبقى شخص وجوده ييفرق عند الناس،

مبقاش كماله عدد.. يكون لي أثر

أثناء حديث نورسين كان علي يتأمل ملامحها التي تغيرت بشكل مفاجئ، وتلك اللمعة التي ظهرت في عيناها فاستبدلتها بابتسامة بشكلٍ سريع؛ ظناً منها أنه لم يلاحظها.. فقد تفاعلت عن كونه طبيب.

- نورسين حاسة إن اللي شوفتيه وإنتي في غيبوبة حقيقي بنسبة كام في المية؟

- ٨٠ ..

- والعشرين التانيين؟

- حاطة احتمال إنه يكون تخاريف

- وإنتي عايزة يكون إيه؟

- نفسي ببقى حقيقة عشان أقدر أصدق نفسي بعد كده.. وفي نفس

الوقت مش عيزاه يكون حقيقة، عشان صعب أوي البشاعة اللي شوفتها دي

تطلع واقع، على الرغم من إنه بيحصل الأبع منها

- حابّة تحكي؟
- مش دلوقتي..
- حاول علي تغيير دقّة الحديث قائلًا: أنا جوعت، إيه رأيك نفطر مع بعض؟
- لأ معلش، بالهنا والشفاء لحضرتك.. مضطرة أستأذن
- اقعدى بس، حتى يبقى بيّنًا عيش وملح
- مرة تانية باذن الله.. عن إذنك
- اتفضلي

رحلت نورسين، وبقي على محلّه، يُفكر في حالتها، وقد أدرك أن الأمر سيطول حتى تتمكن نورسين من رواية كل شئ له، يعلم جيدًا مدى بشاعة شعورها في هذه اللحظة، أن يحدث لك ما لا تفهمه، وتخشى أن تُخبر من حولك حتى لا تكون محل للاستهزاء، وإن قررت إخبار أحدهم فلن تجد من يُعينك على الفهم.

بدأ يشعر بالذنب كونه أحد المشاركين فيما يحدث لها...!

بعد أن رحلت وانتهى علي من تناول إفطاره؛ فلم يمزح حينما أخبرها أنه جائع. طلب من النادل إزالة الباقي وإحضار الفاتورة، وما أن دفع ثمن الطعام حتى سمع صوت هاتفه؛ كان اتصال من سكرتيرته؛ تخبره باستياء المرضى لتأخره، فأخذ مفاتيحه ورحل عن المكان.

فور أن دخل عيادته طلب من الممرضة إدخال الحالة الأولى التي كانت في انتظاره، ثم دخل مكتبه وبدأ عمله بملا. في تلك الأثناء كانت نورسين وصلت منزلها وتناولت الطعام بالفعل، وبعدها نامت قليلاً ثم استيقظت

على صوت أمها توقظها؛ للاستعداد لمجئ ضيفهم الذي سيصبح جزء من العائلة عمًا بقريب.

خرجت حنان من الغرفة بعد أن تأكدت أن نورسين استفاقت، وفي الاتجاه المعاكس كانت ندى، فدخلت غرفة نورسين وأغلقت الباب، تعجبت من طريقة دخول أختها، لكن ندى لم تعطها فرصة لتسأل عن السبب، فبادرت هي بالحديث قائلة:

- بابا عايز ياسين في إيه وكمان كلم أحمد قاله بييجي ليه!

- معرفش والله، بس اللي سمعته إن بابا هيكلمه على الفرخ، هو بابا

رجع من الشغل؟

- لأ لسة، بس قال ربع ساعة ويوصل

- في إيه؟ متوترة ليه؟!

- مفيش أنا خايفة يحصل مشاكل

- لا مشاكل ولا حاجة متقلقيش

جاء صوت حنان من الخارج وهي تصرخ قائلة: ما تخلصوا يا بنات..

مش معقول كده!

- قالت نورسين: يلا عشان أمك متولعش فينا

بعد أن انتهوا من التنظيف وكان قد وصل مصطفى بالفعل وبعده بـ نصف ساعة وصل أحمد وزوجته حياة، -حياة.. النقيض لنورسين وندى، جميلة لدرجة تفوق الوصف؛ بشرتها بيضاء، ملامحها أنثوية وبسيطة،

حانَ دورك ■

عيناها هي أكثر ما يجذب الأنظار إليها.. لونها يشبه كثيراً تداخل الغيوم في السماء، سماوية تكاد تميل للرمادي، تعجز الأحرف عن وصف جمالها. شخصيتها مرحة وبسيطة، وقد ساعدها ذلك على التقرب من نورسين وندى بشكل سريع- دخلن الثلاث فتيات لتجهيز الطعام وأثناء ذلك بدؤوا بالحديث سوياً، قالت حياة وهي تمازح ندى:

- عروستنا الحلوة مينفعش توقف في المطبخ، المفروض تبقى في أوضتها بتظبط نفسها دلوقت

- والله كلام سليم.. بقولك إيه يا حياة، ما تاخدي ندى وتدخلي تطبطينها شوية كده؟

- مش عايزة والنبي عشان هيقعد يتخانق معايا

ردت نورسين بسخرية: ليه إن شاء الله بيتكسف؟

ضحكت حياة ثم قالت: يا بنتي بيغير عليها.

ضحكن معاً، ثم خرجن؛ لتقديم الطعام على المائدة، همست نورسين في أذن حياة، أنها تشعر أن ندى منزعة وقلقة وتريد إخراجها من ذلك الإحساس قليلاً، فأومأت حياة بأنها قد فهمت. جلسوا على المائدة وكانت السعادة تُمع المكان؛ فقد مرّ الكثير من الوقت على اجتماعهم معاً.

قال أحمد: يا اااااا وحشني أكلك أوي يا ماما

تدخلت حياة بغضب: قصدك إني مش بعمل لك أكل يعني!

ردت نورسين: لا أوعي تفهميه غلط، هو قصده إن أكلك مش حلو بس

ضحكت ندى ثم قالت: إيه يا نورسين إنتي بتحبي تهدي النفوس ليه؟، يا

حياة، أحمد يقصد أنك مبتعرفيش تطبخي يا حبيبتي

قال مصطفى: شايفة يا حياة بناتي!، عايش مع ريا وسكينة في البيت..

أجابته حنان ضاحكة: على فكرة يا حياة، جوزك بيُجبر بخاطري..

معدش يعرف ياكل غير من إيدك

- لا طبعاً يا حبيبتي، ده أنا متعلمة منك..

قال أحمد: خلصتوا فقرة التريفة بتاعتكم؟ ماشي يا نور إبقى شويفي

مين هيوصلك بعد كده!

- طب اسكت بقى عشان إنت من ساعة ما اتجوزت واحنا منعرفش عنك حاجة

أضافت ندى: طبعاً.. من لقي أحبابه نسي أصحابه

- ماما.. فاكرة من كام سنة وأحمد في تانية جامعة لما كنا قاعدين نفس

القعدة دي وسبحان الله برضه كنا بناكل محشي، وراح قالك: جواز إيه

بس؟ هو أنا بتاع المرمطة دي

ضحك مصطفى بشدة ثم أردف: أنا ملاحظ إن المرمطة عجبتة، حلوة

المرمطة يا أحمد مش كده؟

- عرفتوا أنا معدتش باجي المكان ده ليه؟!

بعد أن انتهى الجميع من تناول الطعام، ذهبت نورسين لغسل الصحون

وترتيب المكان، ودخلت حياة وندى لتجهيزها؛ استعداداً لمجيء ياسين،

فقالت ندى:

- إنتي محسساني أنه أول مرة يشوفني!

- يا بنتي خليه دايماً يشوفك حلوة، صحيح إنتي حلوة من غير حاجة،

بس قليلاً من الحلاوة الزيادة مش هتضر برضه

■ حان دورك

قاطعهن دخول نورسين تخبرهن أن ياسين قد وصل بالفعل فانتھوا سريعاً من التحضير، وخرجوا بعد ربع ساعة لتقديم العصير، ثم الفاكهة، وبعدها جلسوا جميعاً منتظرين ما سوف يجري بينهم من حديث:

بدأ مصطفى الحديث: بص يا ياسين عشان ندخل في الموضوع على طول - اتفضل..

- أنا كنت عايز أعرف بالظبط إيه خطتكم؟ أنا بنتي فاضل لها كام شهر وتخلص سنة الامتياز، وإنت ما شاء الله متخرج وبشتغل، عايز أفهم إنتوا ناويين على إيه؟!

قال ياسين بابتسامه ساذجة: والله ياريت لو حضرتك تعرف تقولي.

نظر له مصطفى بعدم فهم لما يعنيه، فأكمل ياسين

- أنا ما عنديش أي مشكلة نعمل الفرح الشهر الجاي، الحمد لله أنا جاهز، لكن المشكلة في ندى.

- قال مصطفى: مالها ندى؟

- بتأجل في الموضوع كل شوية من غير سبب.

تدخلت ندى بحدة: لا يا بابا هو عارف السبب.

قال أحمد: طب لما هو في سبب ما تقولوا لنا يا جماعة، عشان نفهم!

أردفت ندى: من الآخر كده ياسين عايزني أقعد في البيت.

عاد مصطفى ليقول: لا ثواني كده.. أنا أول مرة أعرف الموضوع ده..

عايزها تسيب الشغل ليه؟

- بصراحة يا عمي مش شايف إن له لازمة، أنا الحمد لله بشتغل ودخلي

كويس وبإذن الله مش هخليها تحتاج حاجة

- ولما هو كده مقولتناش ليه قيل ما تدخل طب؟ كنا قعدناها في البيت وارتحنا!
تدخل أحمد مضيئاً على حديث والده: ثم إن ندى مش هتشتغل عشان
فلوس، ندى بتشتغل عشان مجهودها طول السنين دي ميضعش على
الفاضي، ده كيانها ومستقبلها.

قال ياسين بطريقة حادة لا تشبهه: كيانها ومستقبلها دول على رأسي
طول ما هي في بيت أهلها.

- عجبك الكلام ده يا ندى؟

قال ياسين دون أن يدع فرصة لها لتجيب: وليه ميحبهاش! أنا عايز
لها الراحة.. ندى دكتورة يعني هيطلبوها في أي وقت وهتتأخر في شغلها
وهتختلط كثير بالرجالة، ده غير المرضي اللي هتقابلهم واللي ممكن تكون
أمراضهم معدية، أنا خايف عليها وشايف إن مفيش سبب يدعي لده أساساً.
قال مصطفى بغضب: أنا بسأل بنتي، مسألتكش. ها يا ندى عاجبك
الكلام ده؟

- قالت ندى بتردد وحزن: لأ يا بابا.

نظر مصطفى لياسين بثقة وقال: هاه أديك سمعت..

- يعني إيه؟

- يعني ندى في بيت أهلها لما تبقى مستعد تاخدها هي وكيانها ومستقبلها،

ساعتها ممكن أقابلك

استدار ياسين؛ ليرحل فأوقفه أحمد قائلاً:

- استنى يا ياسين..

■ حانَ دورك

واقترَب من ندى قائلاً: اقلعي دبلتك.

نظرت له بخوف، فابتسم لها يطمئنتها، فخلعت خاتمها على استحياء
وأعطته لأخيها.

التقطها ثم أشار إلى ياسين:

- خد دبلتك، وياريت تاخذ الباب في إيدك بالمرة.

خرج ياسين وبقي الجميع مصدوم مما حدث، فلم تُكن هذه طريقة
حديث ياسين يوماً.. دخلت ندى غرفتها وجاءت نورسين لتدخل لكن أحمد منعها.
بقيت ندى في غرفتها دون أن تُشعل الضوء، تنتظر ليدها، لا ترى دبلتها
ولكنها ترى أثرها، ترغب في البكاء لكنها لا تبكي، ترى ذكرياتهما سوياً ولا تراه!
ليست المشكلة بالفراق، بل المشكلة الكبرى بالذكريات التي يتركها لنا،
يبقى كل شيء كما هو باستثناء الأشخاص، يرحلون، ويتغيرون. بإمكانك
اختيار الابتعاد عن أحدهم ولكن لا يمكنك اختيار عدم التفكير به قبل
النوم، أو عدم البكاء عند مرورك بمكان جمعكما يوماً، أو عدم الابتسام
عند تذكر موقف بينكما!

دخل أحمد غرفة ندى وجلس بقربها على السرير:

- زعلانة؟

نظرت له باستهزاء، فأكمل:

- معاكي حق سؤال غبي فعلاً، ياسين كلمك في الموضوع ده قبل كده؟

- أيوة

- وكان ردك إيه؟

- مقدرتش أقول لبابا لأنني كنت متأكدة أنه هيرفض، وفي نفس الوقت مكش عندي الجراءة إني أرفض.. كنت خايفة يحصل زي ما حصل دلوقتني، عشان كده كنت بغير الموضوع

سيبقى ما تخشاه هو أكثر شيء يلاحقك، حتى تقرر المواجهة.. وتنتظر النتيجة.

- عارضة إن إنتي كبرتي في نظري لما رفضتي! × نظرت له غير مصدقة ×

مش بهزر والله، على فكرة أنا معاه جداً في إنك تقعدي في البيت مرتاحة

- أمال اعترضت ليه؟

- عشان معجبنيش طريقة كلامه، كأنه بيدكي أوامر، قولت ده بيتكلم

كده قدام أبوها وأخوها، أمال لما يتفضل عليهم باب واحد هيعمل إيه؟!

- أنا برضه استغربت طريقته أوي، كإن واحد تاني اللي بيتكلم.

- طب بصراحة كده، زعلانة إني قولتلك اقلعي الدبلة؟ × لم يجد إجابة ×

عارفة أنا عملت كده ليه؟

- ليه؟

- عشان ميحسش إنك ضعيفة، وأنه بيضغط عليك بدبلته، إنتي

عارفة هو ليه جاي يتكلم كده؟، عشان حس لما كلمك قبل كده في الموضوع ده

إنك خايفة تخسريه لورفضتي، فقرر يلعب على الوتر ده، إنتي اللي إديته

الإحساس ده فبدأ يستقوى بيه، يستغل حيك.. على فكرة هو معملش كده

عشان وحش، هو غرضه من ده مش وحش، بس الأسلوب هو اللي كان وحش.

عشان كده تعمدت أقولك تقلعي الدبلة، عشان يعرف إن عمرك ما هتيجي

بالقسوة والغصب، وإن حياتك مش هتوقف على شخص، وده اللي لازم

حانَ دورك ■

يعرفه.. لو كنتي وافقتي النهارده، كان كرر نفس الموقف بكرة وبعده. وأنا مش عايز كده، الدبلة دي معمولة عشان تحتويكي مش تخنقك!

- قالت وهي تمسح عيناها: أنا بحبك أوي

- قال بمزاح: بتحبيني ولا بتحبي ياسين عشان أفهم؟

- هههههه خلاص بقى

- طب قومي اغسلي وشك، ومتفكريش كثير مع إني عارف أنه صعب!

ربما لذلك خُلق الأَخ.. ليكون الحبيب وقت الخذلان.

هنالك علاقات كثيرة في حياتنا لا نُقدر قيمتها سوى في الأوقات التي

نكون فيها ضعفاء.. فقط حينما تكون ضعيف سترى من يحبك ويعينك

لتصبح أقوى، ومن سعيد ويشاهدك تسقط من بعيد دون أن يُحرك ساكناً.

-ياسين ليس من الشخصيات المتعجرفة، أو الغير مهذبة، بل هو العكس

تماماً وربما ذلك ما جعل الجميع يُصدم من أسلوبه اليوم، فقد اعتادوا على

هدوئه وتعقله في الحديث على الرغم أنه من أصول ×صعيدية× إلا أنه لم

يكن متعجرف أو عصبي كغالبية رجال الصعيد.. لقد اكتسب منهم كل شئ

حسن، كالم الرجولة، والاجتهاد، والإصرار، وكذلك الملامح.. أخذ منهم كل

ما هو جميل من صفات خلقية وخلقية، لكن ما رآه اليوم لا يناسب صورته

في أذهانهم-

دخلت نورسين وحياء عليهما الغرفة، فقالت حياة وهي تُشعل الضوء:

- إيه الرعب اللي إنتوا قاعدين فيه ده؟

بدأت ندى تمسح عيناها، ونهض أحمد عن السرير، فقالت نورسين:

- حلوا أوي إنك قومت، إطلع برة بقى.
- أطلع برة ليه؟
- كده عشان هنتكلم في حاجات بنات
- همس أحمد في أذن حياة: إيه موضوع حاجات البنات دي؟
- أجابته حياة: هبقى أقولك لما نروح البيت
- قاطعتهم نورسين: على فكرة سمعاكم أصلاً
- قال أحمد: سايبها لك مخضرة.. هاتي شنطتك ويلا يا حياة عشان نمشي
- لا أنا قولت إنت اللي تمشي، سيب حياة معنا
- مش هينفع يا نورسين الوقت اتأخر أوي، وأنا عندي شغل بكرة
- خلاص سيبها بايئة معنا وروح إنت
- قال أحمد بنفاذ صبر: يلا يا حياة، مش فاضي لشغل العيال ده!
- بعد أن ودّعوا أخاهم، طلب مصطفى من نورسين أن تواسي أختها، فأخبرته أنها ستفعل، ثم خلد الجميع للنوم، وذهبت نورسين لغرفة ندى فظلت تمازحها ويتبادلان الحديث فيما جرى حتى غلبهما النوم.
- ربما لذلك خلقت الأخت.. لتكن... لا أعلم ماذا تكون، لكنها.....
- في الواقع ليست الأخت بل الأنثى، الأنثى لا تكن شيء فهي الكون بأكمله، السعادة كلها تتمحور حولها.. ابتداءً من الأم وانتهاءً بالإبنة، ومروراً بالأخت والصديقة والزوجة والجددة والعمّة والخالة!
- هي تضيف للشئ نكهته الخاصة، تضيف للمنزل الدفء، وتضيف للطعام اللذة، وتضيف للعمل البهجة، وتضيف للحياة حياة!

(7)

ما تراه خيال، هو حقيقة في حياة أحدهم

تعلم ذلك الشعور الذي ينتابك أثناء مشاهدة فيلم له قصة مميزة، فيبدأ عقلك الباطن باستنكار الأحداث، والاستهزاء بحُجة: هذا لا يحدث سوى في الأفلام.

✍ **عزيزي القارئ**؛ أنا هنا لأخبرك أن الأفلام هي الوسيلة المثلى لمحاكاة حياة البشر أجمعين.. ولكن المؤلف المحترف هو الذي يجعلك تشاهد قصة حياتك ولا تُدرك أنك البطل!

استيقظت نورسين، فوجدت أختها لاتزال نائمة، لذلك بدأت بالنهوض من فراشها عائدة لغرفتها بهدوء كي لا توقظها، فهي تعلم أنها لم تتم بل كانت تتظاهر بذلك حتى غلبها الإرهاق.. يُقال أن أصعب ليلة تمر على الإنسان، هي الليلة التي ينام فيها بعد فقدانه لمن يُحب، ترى هل تخوض تلك المقولة الآن؟

عادت لغرفتها، واستعدت لإكمال نومها فالساعة الآن السادسة والنصف صباحًا، أغلقت الهاتف واستلقت على سريرها، أغمضت عينها فمرت أحداث ذلك المكان في ذاكرتها بشكل سريع، وكأن شريط فيلم ما يدور في عقلها. حاولت تشتيت ذهنها عن التفكير بالأمر؛ فبدأت بالعد من رقم واحد إلى مئة، لكنها لم تتمكن من الوصول للرقم سبعة وثلاثون وكان قد غلبها النعاس بالفعل.

استيقظت مرة أخرى الساعة التاسعة صباحًا، وكان الجميع لايزالون نيامًا.. نهضت من سريريها واتجهت ناحية غرفة أختها فلم تجدها؛ فأدركت أنها ذهبت للمستشفى بالفعل.

دخلت الحمام لتغتسل وتتوضأ، وأثناء وقوفها أمام حوض الاغتسال أطالت النظر إلى المرأة، بقيت تنظر لذلك الوجه الموجود انعكاسه في المرأة.. للوهلة الأولى يمكنك إدراك أنها تنظر لنفسها، ولكن إن تمعنت في الأمر، ستفهم أنها تبحث عن نفسها خلف ذلك اللوح الزجاجي العاكس.. تبحث عن ذاتها وسط كل تلك التفاصيل المتداخلة، أهذه هي الفتاة ذاتها منذ الحادث؟، ألم تتغير ولو قليلاً؟، ألا يوجد ما هو مفقود داخلها بالنظر لعهدا السابق؟!

هي لم تتغير لا في مظهرها ولا شخصها.. باستثناء تلك الرؤى التي لا تعلم سرها بعد، ربما لا يكون هنالك سر من الأساس، وهنالك احتمال آخر تفضله نورسين وتحاول اختبار صحته.. العديد من الأشخاص يؤمنون أن القصص الخيالية والعلمية التي نراها أو نشاهدها هي بالفعل حدثت في أحد حياتنا السابقة.. ونورسين أحد هؤلاء الأشخاص؛ فإن ركزت في أحداث يومك، ستجد العديد من التفاصيل المطابقة لما نراه في الأفلام ونقرأه في الروايات ولا نجد واقعيًا بالرغم من كونه واقع نعيشه!

توضأت واصلت، ثم صنعت كوبًا من النسكافيه، وجلست على سريريها؛ تفكر كيف ستروي لـ علي ما عاشته في خيالها.. وهل حقًا سيساعدها فيما تريد تحقيقه..!

حان دورك ■

في المستشفى التي تعمل بها ندى، كانت مشغولة طوال الوقت لكونها متدربة في قسم الطوارئ، ذلك يجعلها غير قادرة على شرب الماء حتى، ولكن لحسن الحظ وعلى غير العادة، كان اليوم هادئ؛ مما وفر لها الكثير من الوقت لتفكر فيما حدث مع ياسين.. لطالما كان عملها سبب انشغالها، فيمنعها من التفكير بغير العمل، فلماذا الآن تحديداً لديها الكثير من الوقت؟!، قاطع تفكيرها صوت ×ملك× زميلتها في القسم التي عرضت عليها أن يتناولوا الطعام معاً بما أنهم اليوم متفرغين، فوافقته ندى وذهبت لإحضار قوائم الطعام من مكتب زميلة لهم. وأثناء سيرها رأت ياسين في الممر يسير في عكس اتجاهها، وفور أن اقتربت منه، أبعدت نظرها عنه ونظرت أمامها بثقة لا تملكها، مرت بجانبه كما لو أنه غير مرئي، بالرغم من كونها لا ترى سواه.. فسبحان من يجعلنا نتظاهر وكأن شيئاً لم يكن.. كانت تتمنى أن يكون يراقبها، أو أن يكون التفت تجاهها ليراها، كما فعلت، تتمنى أن يكون منزعج مثلها بل أضعافها.. تخشى كونه سعيد بما حدث، تخاف أن تنظر له فلا ترى نظرة ندم في عينه، تخاف أن يكون قد تعمّد تلك الطريقة ليهجرها دون إلقاء اللوم عليه..

عادت ندى لملك حاملة في يدها قائمة المطاعم، ولكن لا مجال للراحة هنا؛ فهي المريضة تخبرهم بوجود حالة طارئة وعليهم استقبالها:
- قالت ملك في عجلة: أنا هطلب دكتور ياسين، استقبلي الحالة...
- قاطعتها ندى متفهمة: مفهوم مفهوم

اتجهت ندى لقسم الطوارئ وبدأت بالإجراءات التقليدية التي تُجرى للمرضى، من تسجيل الإسم إلى الأعراض وأخذ المؤشرات الحيوية الخاصة به. ما أن مرَّ خمس دقائق حتى وجدت ياسين يقف خلفها تمامًا، بدأ بالتحدث مع المريض ببساطة نظرًا لصغر سنه فكان شاب في السادسة عشر من عمره:

- قولِّي يا حسن × اسم المريض × حاسس بـ إيه؟

- قال بصعوبة بالغة: بحس بوجع في صدري وأنا بتتنفس، وكحة مستمرة مصحوبة بدم..

- إديني رقم يعبر عن شدة الألم من عشرة؟

لم يُجب حسن ولكن كانت حالته ومدى ألمه هي الإجابة، فوجّه د. ياسين السؤال لوالده قائلًا:

- بيعاني من الأعراض دي من امتي؟

- تقريباً داخل على ثلاث أسابيع

زادت تشنجات الشاب نظرًا لما يمر به من ألم، فقامت ندى بقياس درجة حرارته:

- د. ياسين، المريض حرارته ٣٨,٥

تغيرت ملامح ياسين فورًا ونظر إلى الأب محاولاً طمأنته، طالبًا من

الرحيل من الغرفة، وبعد أن خرج والد حسن بدأت ندى بإخراج بعض الأجهزة الطبية وقالت:

- احنا هنعمل....

- قاطعها ياسين بطريقة صارمة يصحبها هدوء مصطنع: سيبى كل

حاجة واطلعي برة يا دكتورة

■ حانَ دورك

- قالت بعدم إدراك لما يحدث: ياسين مينفعش نَدْخُل مشاكلنا الخاصة في الشغل!

- اطلعي برة يا دكتورة، ومدخليش أي حد هنا...
لم تجد ما تقوله فاكتفت بالرحيل. أغلق ياسين الباب الخاص بالغرفة، وارتدى القفازات المعقمة والكمامة.. بدأ بأخذ عينة من أنفه باستخدام أنبوب خاص بذلك ثم أخرج هاتفه واتصل بزميل له ولكنه في منصب أعلى، أجاهه زميله بطريقته الفكاهية المعتادة، فقاطعه ياسين في صرامة:
- ابعت لي حد يستلم مني العينات دي وبلغ مركز التحاليل إننا هنبعت لهم عينة يتعمل لها تحليل IGRA ببلغ أي حد بييجي ياخذ احتياطات الطوارئ..

- قال أدهم وقد بدأ يشعر بخطورة الأمر: إيه هي الحالة يا ياسين!

- أعراض السل الرئوي

- إنت فين؟

- الدور الأول في الاستقبال

- إنت مع الحالة دلوقتي؟

- أيوة..

- مفهوم، هبعت لك حد حالاً

ذهبت ملك لغرفة الأطباء فوجدت ندى جالسة هناك يبدو عليها الحزن و على ما يبدو أنها كانت تبكي أرادت أن تسألها عن سبب بكائها، لكنها

- ده كلام دكتور!، طب وإنت؟
- سيبها على الله
- كنت خايف عليا؟، ولا بترضي ضميرك؟
- برضي ضميري اللي خايف عليكي..
- لم تستطع منع دموعها من الانهمار: ليه عملت كده!، تقصد ما حدث في زيارته لهم
- كنت خايف عليكي من لحظة زي دي.. بس طريقتي كانت غلط، كنت عارف إنك بتحبي شغلك ومش هتوافقي عشان كده فكرت إن دي الطريقة الوحيدة اللي هتجبرك تسيبيه.. بس إنتي اخترتي تسيبيني!
- طب ما أي شغل في الدنيا فيه نسبة خطورة، وحتى لو قعدت في البيت مش ممكن الشقة تولع!
- بس على الأقل مش هبقى شايفها بتولع ومش قادر أعمل حاجة.. اللي أنا عملته النهاردة ده خطر جداً، أنا في سبيل إنني أحميكي عرضت حياة كل واحد عدّيتي من جنبه للخطر لو طلعتي مصابة، يعني الصح إنني أحجزك معايا بما إنك تعاملتي مع الحالة، تفتكري هقدر أعمل ده يا ندى؟!
- لكن قدرت تبعد عني؟
- مقدرتش.. بس... ×نظر للأسفل بيأس× أنا آسف
- صمتوا جميعاً، حتى جاءهم الطبيب بعد ساعات كثيرة مُعلنًا صدور نتيجة التحليل السريع وقد ظهر على وجهه كل شئ، فقد أخبرهم أن المريض نتيجة تحليله إيجابية على خلاف ياسين وندى اللذان أظهرت تحاليلهم نتيجة سلبية مما يعني عدم انتقال المرض لهما.

بعد الفرحة الشديدة التي أظهرتها ندى؛ لسلامتهم، خرجت من الغرفة متجنبة النظر لـ ياسين فأوقفها:

- مفيش حمد الله على السلامة! ×دمعت عينها دون نطق كلمة× في

إيه دلوقتي؟

- مفيش حاجة

- ابتسم ثم قال: عايز أقابل والدك واعتذر له على اللي حصل.. ونحدد

معاد الفرح، كنت غلطان؛ أنا آسف

- احمر وجهها، وقالت: معاك رقمه..

وذهبت مُسرعة دون توقف.

كان اليوم قاسياً جداً.. للحظة شعرت أنها ستفقد الشخص الوحيد

الذي أحبته طوال حياتها، ولكنها الآن تشعر أنه كان اختبار من الله لهما كي

يعودا معاً. خوفها ودقات قلبها التي كادت أن تقف وقلقتها في سبيل عودتهما..

الأمر يستحق، لقد كانت النتيجة مُرضية، أرضت عنائهما وخوفها.

لحظة واحدة قد تزج بك إلى التهلكة، لحظة.. قادرة أن تغيّر كل شئ.

ربما ما تراه سيء هو في الحقيقة خير لك!

خلف كل ابتلاء حدث لنا وكرهناه، خير لو علمنا أنه آتٍ لتميننا الابتلاء

في كل صلاة.

(8) لنُكمل ما بدأناه

أن تبدأ الأمر يعني أنك تعلن الانضمام.. لذا لا يُمكنك الانسحاب؛ فقد يحين دورك في أي لحظة.

عزيزي القارئ: شكرًا لكونك تقرأ هذه الرسالة الآن.. أردت إخبارك أنك اقتربت لذلك، استمر!

بسبب ما حدث في المستشفى، تأخرت في العودة لمنزلها، فما أن وصلت حتى وجدت نورسين في وجهها تسألها عن سبب تأخيرها، وجاءت أمها هي الأخرى تسألها، فقصت لهن ما حدث، وقد بدت علامات عد الرضا تظهر على وجه حنان؛ كونها لا تفهم كيف تغير رأي ابنتها سريعًا بعد ما فعله ياسين، فقالت:

- يعني رأيك انغيرّ بالسرعة دي بعد اللي عمله والأسلوب اللي اتكلم به؟!
- تعالي معايا الأوضة بس وأنا هفهمك

اصطحبت ندى، حنان، وبقيت نورسين واقفة في الصالة لم تهتم لتعرف تفاصيل ما جرى مع ندى وياسين، فرأيها لن يُشكّل فارق بالنسبة لندی، إلا إن احتاجت منها معروفًا، وكذلك ما جرى مع ندى لا يهمها طالما هي بخير. عادت لغرفتها وهي تفكر فيما رآته حينما غابت عن الوعي، إنه يشبه ما حدث مع أختها كثيرًا باختلاف النهاية!، فقد كانت نهاية ما رآته نورسين مؤلمة.. أخرجت هاتفها وأرسلت رسالة لـ علي، تقول فيها: أنا مستعدة أحكي

لك اللي أنا شوفته. انتظرت أن يقرأها، لكنه لم يفعل؛ يبدو أنه حقاً شديد الانشغال.. لذلك لم تجد حلاً آخر.

في مكتب علي، دخل أحدهم عليه وهو يضع رأسه على المكتب من شدة التعب؛ فتحدث دون أن يرفع رأسه قائلاً:

- كده خلصنا كل المواعيد؟ عايز أرجع البيت

- قاطعه صوت أحدهم: معلىش يا دكتور مضطر تقابل مريض كمان

لم يكن الصوت غريب عليه، فقد سمعه من قبل، ولكنه أيضاً ليس صوت سكرتيرته، بدا صوت أنثوي هادئ، رفع رأسه ببطء؛ ليجد نورسين تقف أمامه، فابتسمت له، وظلّ علي ينظر بتمعجب؛ فلم يتوقع زيارتها تلك، قالت:

- ملقتش حد برة أستأذن منه، أعمل إيه طيب؟

- لا أبداً نورتي، عرفتي العنوان منين؟

- سألت ماما..

- طب اتفضلي اقعدي

كانت ثابتة في مكانها، وعيناها تدور في المكان، تتأمل كل زاوية فيه.. أعجبها كثيراً تنسيق الألوان، ورق جدران باللون الرمادي ومكتب أسود وُضع عليه لوحة خشبية حُضر عليها اسمه تبدو مصنوعة يدوياً وذلك ما يميّزها، هنالك لوحة معلقة أعلى المكتب، بها مجموعة ألوان متداخلة.. للوهلة الأولى تُشعرك بالفوضى ولكن لسبب ما لا يمكنك إبعاد ناظريك عنها، بجانب المكتب دولا ب صغير أدرفه شفافة يظهر من خلالها شهادات

■ حان دورك

عدّة تؤكّد جدارته، وفي الجهة المقابلة تلك الأريكة الغربية "الشيزلونج" مغطاة بالجلد الأسود يُغطيها مفرش مخملي باللون الأبيض، يُجاورها نبتة كبيرة خضراء أضافت بهجة للمكان، وخلفها إضاءة هادئة.

- إنتي جاية ليه؟ × أدرك علي مدى وقاحة سؤاله × لأ مش قصدي..

أقصد يعني إنك مكنتيش حابة نتكلم في العيادة..

- بعث لك مسدج على الواتس بس حضرتك كنت مشغول، وأنا مش

ضامنة هيجيلي الجراة أخذ الخطوة دي تاني ولا لأ

فتح هاتفه وقرأ رسالتها، ثم نظر لها وابتسم:

- هايل جداً، عشان كده جيتي؟

- أيوة، بس واضح إن ده وقت نهاية شغلك.. خرينا نأجل....

- لا لأ نأجل إيه بس، زي ما إنتي.. اعتبري إنني مش ورايا حد غيرك،

تشربي إيه؟

- ولا أي حاجة شكراً

- لا مفيش الكلام ده، المرة اللي فاتت عدديتها المرة دي إنتي في مكيتي،

ها بقى أجب لك قهوة؟، نسكافيه؟، عصير؟

- خلاص نسكافيه

اتصل علي بسكرتيرته فدخلت المكتب؛ تسألته عمّا يريد، وقد تفاجأت

بوجود نورسين؛ فهي لم ترها أثناء دخولها، لأنها كانت تبتاع شئ من

الأسفل، ظناً منها أن مواعيد اليوم قد انتهت.

بدأ علي يُملي عليها طلبه قائلاً:

- بصي يا علياء عايزك تروحي تعلمي لنا كويايتين نسكافيه، أو خليهم
تلاثة عشان إنتي مطوَّلة معانا النهاردة
- حاضر يا دكتور، نورتيينا يا آنسة
- قال علي: مش من قلبها على فكرة
- أجابت نورسين ضاحكة: ما أنا لاحظت
بعد أن أحضرت علياء النسكافيه ورحلت، بدأ علي حديثه مع نورسين قائلاً:
- حصل حاجة خلّتك تقرري تتكلمي النهارده؟
- مواقف حصلت في بيتنا شبه اللي شوفته، ده خلاني أفكر كل حاجة
حصلت بالتفصيل وأقعد أقول لنفسي: يمكن لو كان حد اتكلم وساعد
مكنوش وصلوا للنهاية البشعة دي!، يمكن ده حصليّ عشان أتكلم؟!؛
- كانت نورسين تتحدث، وعلي يتابع نظرات عينها وحركاتها الغير مفهومة
وانفعالها في بعض الجمل، كان يدقق في تفاصيلها دون أن تلاحظ ذلك.
- بصراحة أنا معرفش إنتي شوفتي إيه وعشان كده مش قادر أفهم،
احكي يا نور..
- أبدأ منين؟
- من المكان اللي يريحك
- كنت في مكان غريب عمري ما شوفته قبل كده، شوارع ضلّمة أوي،
ومهجورة، مفيش فيها حد نهائي، المباني كلها مهدومة، والمكان مخيف أوي
أو بتعبير أفضل مُقبض!، حاولت أمشي يمكن الأقي مخرج من المكان ده،
وأنا ماشية شوفت ألعاب مرمية على الأرض.. شوفت دبدوب صغير لونه

■ حان دورك

أبيض، شلته من على الأرض وحاولت أنفضه من التراب والألوان اللي عليه،
بالمناسبة مكنتش ألوان.. كان دم.. وده اللي عرفته بعد ما شوفتها

- تدّخل علي: هي مين؟

- بنوتة صغيرة في حدود سبع سنين...

- كملي

- أول ما شوفت الدم رميت اللعبة على الأرض واترعبت، كل اللي كان
في بالي إن في حيوانات مفترسة هنا، بعد مدة صغيرة لقيت بنوتة طالعة
تجري من مبنى من المباني المهجورة لسة متهدمش لكن منظره بيقول أنه
على وشك، المهم البنيت قعدت على الأرض وفضلت تعيط.. جسمها كان كله
علامات ضرب وفتانها كان مقطوع. قربت منها واتكلمت معاها، فاكرة

الحوار كأنه امبارح

- احكيه بالتفاصيل..

- سكتت قليلاً ثم أردفت: سألتها عن اسمها.. مردتش عليا بعدها
سمعنا صوت خطوات بتقرب، فالبنيت على طول جريت استخبت وراء
المباني والحجر اللي متكسر.. خرج من نفس العمارة اللي هي خرجت
منها شاب في حدود ١٩ سنة، وعدى من قدامي كأني مش مرئية بالنسبة
له، كنت بشوف المشهد بالتفصيل.. من أصعب المشاهد اللي شوفتها في
حياتي!، اعتدى عليها بالضرب بطريقة مُميتة بعد ما حاول يتحرش بيها
وهي صرخت.. ضربها في كل مكان في جسمها.. ضربها لحد ما ماتت!؛
عشان صرخت، عشان خافت منه وهو خاف حد يسمع صوتها، بس مين

هيسمعها في مكان زي ده؟ أنا.. أنا كنت سمعها ومعملتش حاجة، كنت أضعف من إني أساعدها، وكنت أجبن من إني أتدخل.. المشهد كان أقوى من سعة احتمالي!

في ختام جملتها ظهرت حشجة صوتها الناتج عن اختناق أنفاسها في حلقتها، فارتفع صوت بكائها حتى أصبح حديثها غير مفهوم، وكأنها تستشهد بالأحداث فتعود ذكرها لتجرحها جرح مضاعف هذه المرة، وكأنما المشهد يتكرر أمامها بقسوته وقذارته وخوفها. حاول علي أن يهدئ من روعها قائلاً:

- نورسين اهدي.. تحبي نوقف؟

أومأت له أن "لا" فقال:

- خلاص يبقى تعالي على نفسك واستحملي معايا للآخر!، صدقيني هنوصل لحاجة.. أوعدك.

- تههدت: أنا كنت صح لما توقعت إن في حيوانات هنا لكني كنت غلط إني

محددتش نوع الحيوان إنسان

هنالك فئة من البشر لا يمكن تصنيفها سوى من الحيوانات، على الرغم أن في ذلك ظلم لعالم الحيوان؛ فالحيوانات أكثر رحمة من هؤلاء المجردون من المشاعر، بل من المروءة!

- من الإجهاد اللي كنت فيه أغمى عليا.. فوقت لقيتيني في نفس المكان

اللي البننت ماتت فيه، ومشوفتش حد منهم.. قومت بصعوبة وإن ضربه كان فيها والوجع فيا!، حاولت أمشي باتزان لكنني مقدرتش، و وقعت.. غصبت نفسي إني أقوم لإني خايفة أقعد هنا دقيقة واحدة زيادة وقومت.. مشيت

■ حان دورك

شوية لحد ما لقيت مكان أشبه بمدرسة وعلى الرغم من حالتها السيئة إلا إنها كانت تُعتبر من أنصف الأماكن اللي ممكن تشوفها هنا، وقفت قدامها شوية وشوفت مشهد حلو أوي، حسيت أنه بيعوضني عن البشاعة اللي حصلت قدامي، بنت في حدود تانية، تالته، ثانوي، ماشية ووراها شاب في نفس عمرها كان شكلهم حلو أوي. مرة واحدة البنت وقفت ولفت للولد وعاتبته أنه ماشي وراها بس هو صمم برضه يفضل وراها لحد ما تروّج ولما هدده بهزار إنها هتقول لباهاها قال لها بثقة إنه بالفعل عارف ورغم إنه رفض بس هو هيفضل وراه لحد ما يوافق وبعدها اتكسفت ومردتش، وكملت مشي بس بخطوة أسرع من الأول وأنا مشيت وراهم كانوا الحاجة الحلوة الوحيدة في المكان.. نظرتهم لبعض إدتني احساس إنني مش لواحدي، لأن نظرتة ليها طمنتني، فما بالك بيها؟

بعض الأشخاص في حياتك هم حياتك!

إن حضروا أصبح للحياة اسم، وإن غابوا فما عليك سوى حذف الألف، لتتاوله.

- أكملت سردها: وصلوا لحد بيتها وأبوها كان واقف في البلكونة، أول لما شافهم نزل جري بغضب باين عليه مقدرتش أفهم سببه، قابلهم على السلم، الولد سلم عليه وحضنه وقال في أذن أبوها - بصوت واطي كنت قادرة اسمعه- : متناساش معادنا آخر السنة يا عمو، رد عليه أبوها: أنا رفضت بالدوق بس شكله الكلام مش نافع معاك وفي وهلة كان مدخل سكينه في جسمه أنا حتى مش قادرة أستوعب جابها امتي! صرخة بنته لسة في وداني.. صرخة حسرة، ووجع، وخوف.. صرخة تحيي كل ذكرة مؤلمة

جواك. شكل الولد وجسمه وهو بيوقع وملامح الصدمة باينة عليه، كان حاضن أبوها وعنيه عليها، كانت هي آخر حاجة تشوفها عينه.. غلطت أكبر غلط لما افتكرت إن دول اللي بيعوضوني عن بشاعة اللي شوفته قبلهم، مكنتش أعرف إن لسة فيه الأبشع من كده وإن دي مجرد البداية. كان كل تفكيرى ازاي هي هتقدر تبص لأبوها وهي شايفة فيه قاتل؟، ازاي أبوها هيحضنها وهو اللي كسرهما، ازاي هيبص في عين أهل الولد.. ازاي القسوة في قلبه وصلت للمرحلة دي!

- ليه محاولتيش تمنعيه؟

- بالرغم من إني مش عارفة إذا كان اللي أنا شوفته ده حقيقي ولا خيال، إلا إن الحاجة الوحيدة اللي واثقة فيها إني مكنتش موجودة بالنسبة لهم وتدخلني مكنش هيبقى له فائدة

- تمام، كملي..

- استقبالي لوفاة الولد كان أسرع، خرجت فوراً من العمارة، كملت مشي بين الشوارع، لغاية ما قابلت بنت في آخر سنة في الإعدادي، لاحظت ده من كتاب كانت مسكاه في إيدها.. شاب ماشي وراها، عرفت من رجفة إيدها، وخطواتها السريعة البعيدة عن بعض، ولون وشها المخطوف، أنه شخص مش مرغوب فيه بالنسبة لها، مجرد شاب متطفل، بيستغل خوفها منه عشان يرضي ضعفه.. بدأ يقرب منها بحكم إن خطواته كانت أطول وأسرع، بيمد إيده على كتفها عشان يوقفها وهي بتحاول تبعد، بدأت أتوقع إيه اللي هيحصل بعد كده.. لغاية ما ظهر شاب تاني في حدود ١٨ سنة،

حان دورك ■

من الشبه اللي بينه وبينها أقدر أقول إنهم أخوات، البننت أول ما شافته استخبت وراه، ورغم الخوف اللي كان باين في عينه إلا أنه بص لها وابتسم وقالها تروّح وهو هيجي وراها، صوت الشاب اللي كان ماشي وراها ارتفع وكان باين أنه شارب حاجة أو مش في وعيه أنا حتى مقدرتش أفهم اللي قاله البننت جريت بعيد شوية بس فضلت واقفة بتشوفهم من بعيد، كان باين عليها خوفها وخضتها.. حقها تخاف في موقف زي ده، وإن جيت للحق من حقها متتعرضش للموقف ده..

أعتذر بالنيابة عن كل يد طالت أجسامكن، كل كلمة قيلت خدشت حياءكن ولم تجدوا رداً سوى الصمت، أعزّكم الله في كتابه، وأذكّم خلقه على الأرض.

- كنت شايقة الحوار عمّال بيحتدّ بين الطرفين، وكنت عارفة هيوصل لدايه، طرف هيقول الثاني.. كان سؤالي: يا ترى مين اللي هيقول؟ الشاب دفاعاً عن شرف أخته، ولا المتحرش دفاعاً عن.. عن الرجولة اللي هو فاهمها غلط أصلاً، المرة دي مكنش ينفع أسكت، مش هسيب حد ثاني يموت قدامي وأنا ساكتة وخايفة مع إنني كنت متأكدة إن أي حاجة هعملها مس هتغير أي حاجة.. شوفت واحد منهم بياخد حاجة من الأرض ورايح بيها ناحية الثاني، صرخت بأعلى صوت فيا، جريت عليه حاولت أمنعه بكل قوتي لكن.. أنا مش موجودة بالنسبة لهم، أنا شيفاهم وسمعاهم لكن هما ميعرفوش إنني واقفة أصلاً.. استسلمت ورجعت ثاني اتفرج من بعيد. شخصين كانوا بيجروا، البننت ناحية أخوها اللي بينزف على الأرض، والولد

في الاتجاه المعاكس قبل ما حد يلحقه. نظرة الكسرة اللي في عيونها وأخوها اللي سألها بصوت معدوم: إنتي كويسة؟، مستناش يسمع ردها وغمض عنيه.. غبي!، كان فاكرا إنها هتبقى كويسة لما يغيب عنها، أنا متأكدة إنها كانت تتمنى ميظهرش ومينقدهاش ولا أنه يمشي.. يمشي ومتشفهوش ثاني.. - قاطع الطبيب اندماجها في السرد واحمرار عيناها القريب من البكاء؛ مستفسراً: إيه اللي مخليكي متأكدة؟

- عشان ببساطة أنا مش مستعدة أعيش في مقابل إني أخسر حد غالي عليا.. متبقاش عيشة من أصله!
- أوماً الطبيب متفهماً، وقال: كملي..

- كسرتها بموت أخوها كانت بالنسبة لي القاضية.. أصل يعني هشوف إيه أبشع من كده!، ولو شوفت مش هتفاجئ خلاص أنا أدركت إني في عالم موحش، عالم مليان بشر مجردين من البشرية. استغلّيت فكرة إني غير مرثية، وحضنتها وهي قاعدة على الأرض جنب أخوها، كانت بتقول كلام مش واضح من عياطها ونفسها المقطوع وبالرغم من كده كنت قادرة أفهمها، سمعتها وهي بتقول: قوم يا حبيبي أنا مليش غيرك.. طب هقول لماما إيه لما تسألني عليك ها؟، أنا خايفة.. يرضيك تسبب أختك كده؟، طب قوم وأنا هسمع كلامك والله، ومش هلبس هدومك ثاني!

- حسيتي إن حضنك ليها فرق معاها؟
- فرق معايا أنا.. الحقيقية إني حضنتها لاني أنا اللي محتاجة الحضن ده، كنت بتلكك عشان أحس إن حد جنبي.. كنت بستخبي فيها عشان خايفة أشوف حاجة أفسى. كنت عايزة أخرج من المكان ده

■ حان دورك

- وإحساسك إيه بعد ما خرجتني؟
- حاسة إني عايزة أّف على كل بيت، وأعرف حكايتهم وأقويهم.. عايزة أمشي أطبّطب على الناس اللي في الشارع، أعرفهم إن في حد حاسس بيهم، عايزة أمنع كل واحد غلبه شيطانه وقرر يقتل!، خايفة نتحول لوحوش، بنقتل كل حاجة حلوة فينا ونبرز الوحش وبس!
- مش عايز أحبطك بس صعب..
- صعب، بس فكرة إني أّف أتفرج على ناس بتموّت بعض وأنا مش بتحرك.. ده الأصعب!
- شعر الطبيب أنه عاجز عن مواساتها، للغة العربية ثمانية وعشرون حرف، ولم يجد حرف يمكنه التخفيف عنها.. لذا تجاهل جملتها الأخيرة قائلاً:
- كملي..
- تتهدت ثم قالت: المرة دي متحركتش من مكاني.. أنا نمت، نمت وصحيت على صوت ناس بتكلم ودوشة، لما فتحت عيني شوفت حاجة غريبة أوي!، كان في بحر قدامي وشباب واقفين مع بعض بيهزروا ويضحكوا، كان شكلهم يفرّح جداً، بس لأ المرة دي مش هنخدع، أكيد ده هدوء ما قبل العاصفة، شوفت مجموعة شباب بيتكلموا مع بعض، بس كان في واحد بعيد شوية عنهم أو مش مندمج أوي وسطهم.. بس كان بيضحك ويهزر معاهم عادي يعني، بصراحة كان عندي أمل فعلاً إن المرة دي تكون النهاية حلوة، بس كل ده اتغير أول ما شوفته بيسحب نفسه من وسطهم ويبعد، مشيت وراه لحد ما لقيته رايح ناحية البحر، وقفت مكاني وكنت شيفاه من بعيد..

شوفته فوق على البرج!، لأأسفة مكنش برج.. دي المنارة اللي بتبقى في البحر، كان واقف فوق بسكينة غريبة، ولا كان في ذرة خوف في قلبه على الرغم من الارتفاع اللي هوفيه!، وأنا براقبه في صمت كعادتي سمعت صوت شاب بينادي عليه -صاحبه، ف كمثل أي إنسان طبيعي لفيت ناحية الصوت، وبمجرد ما لفيت سمعت صوت خبطة جسم ما في المياه.. كان هو، أيوة اللي إنت توقعته فعلاً.. انتحر، رمى نفسه من ارتفاع ميقلش عن ١٥٠ متر بكل بساطة.. ×ضحكت بألم× زي ما يكون بينط من على رصيف الشارع مثلاً!، بالرغم من كوني اعتدت على المواقف دي ومع كل موقف تأثري باللي بعده كان بيقل، إلا إن المرة دي تحديداً حسيت خبطة جسمه كانت في قلبي مش في الأرض.. للحظة حسيت إنني أنا اللي بموت مش هو. فكرة إن حد يكون مكسور نفسياً لدرجة أنه ينتحر دي مهمة!، يمكن من رحمة ربنا بيا إنني مكنش باصة عليه لما وقع.. كلنا بيجيلنا فترات واليأس يتملكنا ويصور لنا إن الانتحار هو الحل، لكن دايمًا هتلاقي إنك بتراجع في آخر لحظة لأي سبب مهما كان بسيط، لكن فكرة إن الشخص ده فقد كل حاجة حتى الشئ البسيط اللي ممكن يمنعه من قرار شنيع زي ده.. مخيفة!

- وبعدين..؟

- بس.. فوقت بعدها على صوت بكاء أمني ومحاولات دكتور بيسعفني،

انتهت بنفس عميق أخذه الدكتور بعد ما شافني فتحت عيني

- كان إيه إحساسك أول ما فوقتي من الغيبوبة؟

- مكنش عابزة أفوق!

■ حان دورك

- عقد الطبيب حاجبيه قائلاً: ليه؟
- عشان بمجرد ما فوقت عرفت إن اللي شوفته ده مكنش حلم وفوقت منه..
نظر لها علي بغير فهم، فأكملت:
- دي حياتي.. ابتسمت ابتسامة مصطنعة× دي حياتنا.. أنا فوقت من حلم مُرعب، عشان أعيش في واقع أليم، هو ده الواقع اللي احنا بنعيشه يا دكتور، فلان اغتصب فلانة، وفلان اتخانق مع فلان فقتله، وفلان حب فلانة فاتفارقوا غصب، وفلان فقد الرغبة أنه يعيش فانتحر!
- ومين فلان وفلانة؟
- احنا.. مسيرنا نبقى زيهم في يوم، كده أكون حكيت لحضرتك كل حاجة نظرت له وكأنها تذكرت شيئاً× باستثناء حاجة واحدة مقدرتش أحكيها لحد..
- قال بفضول: اللي هي..؟
- شعرت بالتردد الشديد لإخباره سرّها الوحيد الذي لم تتمكن من الإفصاح به لأي شخص، -وهو الأمر الوحيد أيضاً الذي لم تكذب بشأنه-؛ فهي حقاً لا تجد له تفسيراً..
- أاجاب بتوتر: كل حاجة شوفتها وأنا في غيبوبة متسجلة على موبايلي بالتفصيل الممل.. وتاريخ الكتابة هو نفسه التاريخ اللي كنت فاقدة الوعي فيه أخرجت هاتفها وفتحت تطبيق "الملاحظات" ثم وجهته إلى علي، ليرى كل ما قصّته مُسجّل بالفعل:
- قال بدهشة: هيكون مين اللي كتب الحاجات دي على موبايلك!

- أكيد لو عارفة مكنتش حكيت لحضرتك، ولو بصيت على تاريخ التسجيل هتلاقي بيوافق التاريخ اللي كنت فيه في المستشفى غايبة عن الوعي
- حاجة غريبة أوي، بس متقلقيش هنجعلها
- أثار الأمر ريبته؛ لعدم عثوره على تفسير منطقي، قاطعته نورسين قائلة:
- في سبب غير اللي قولته لحضرتك في بداية لقاءنا، خلاني أحكي لك..
- نظر لها بتساؤل، فأخذت نفس عميق لتكمل..
-

الواقع.. عند قراءتها للمرة الأولى تراها كلمة عادية، ولكن إن عدت وقرأتها مجدداً.. ماذا سيكون أول ما يخطر في ذهنك؟

شئ حدث لك لم يكن محبوب إليك، أو موقف رُسخ في ذهنك يأبى الخروج، أو شخص عزيز لم يعد بجوارك فأصاب قلبك ألم الفراق. إن ركزت فيمن حولك قليلاً ستجدهم دائماً ما يضيفون كلمة ×أمر واقع× حينما يجري ما لم يرغبوا به ولا يملكون له حلاً.. واقعنا هو التشبيه الأمثل لكل ما هو سيء.

غادرت نورسين؛ عائدة لمنزلها.

وأما هو فبقِيَ في عيادته يُفكر فيما قالت، شعر بالذنب مجدداً؛ فما قالتها وما اشترك هو فيه شيئان متشابهان في الفكر، مختلفان في المشاعر.. كل ما سمعه من نورسين كان يتوقع سماعه، باستثناء ما سُجِّل على هاتفتها هو حقاً لا يعلم سره، ولا يجد له إجابة!

■ حان دورك

اتصل بأحدهم وما أن أجاب حتى أجابه علي قائلاً:
- مشيت من عندي حالاً .. هحكيلك لما أشوفك .. لحد دلوقتي الموضوع
ماشى زي ما رسمناه على الرغم إنى مش فاهم شوية تفاصيل .. هههه
معاك حق الاستعجال وحش .. اهدى علياً وأنا هجيك بالتقيل بس لما أفهم
كل حاجة، أنا بس قولت أطمك ..

دخلت سكرتيرة علي؛ فأنهاى الاتصال قائلاً: طيب يا غالي، هكلمك بعدين
استاء علي من طريقة دخول علياء دون أن تطرق الباب؛ فاعتذرت
له، ثم أخبرته أنها سترحل وقد دخلت لتستأذنه بما أن نورسين قد رحلت
بالفعل، فسمح لها بذلك، واستعد للرحيل هو الآخر.

(9)

ليس كل ما يظهر لك هو الحقيقة

كم مرة خدعتنا البدايات؛ فظننا شئً وفوجئنا بآخر..
لا تُحاول العد، فلن تتمكن الأرقام من حصرها، فقط حاول أن تجعلها
المرّة الأخيرة.. فاحذر دائماً من حلو البدايات حتى لا تتفاجأ بمُر الختام!
دخل علي منزله، يعيش بمفرده.. توفّي والده منذ أن كان طفلاً، ولحقت
به والدته منذ سنتان، ولا زال أعزب، لكنه على عكس أغلب الرجال العزّاب؛
فهو شديد النظام في منزله بل في حياته بأكملها، كل شئٍ يخصه له
ترتيب خاص به.. يكره أن يرى شئً في غير موضعه الأصلي.. كذلك الأمر
للأشخاص المحيطين به.. فعلى الرغم من علاقاته الواسعة مع الجميع؛ إلا
أن دائرة معارفه تُعد صغيرة جداً.

جلس على فراشه، ثم أخذ نفس عميق يُحاول النوم لكن تلك الأحداث لا
تفارقُه، يشعر بالذنب تجاه نورسين.. يُعجبه أن الأمر يسير كما خُطط له،
ويُزعجه أنها المتضررة. تذكر حوارهما اليوم في مكتبه:

- في سبب غير اللي قولته لحضرتك في بداية لقاءنا، خلاني أحكي لك..
نظر لها بتساؤل، فأخذت نفس عميق لتُكمل..

- مش عارضة إذا كان اللي هقوله ده ينفع ولا لأ.. ومش عارفة إذا كان
صح برضه ولا..

- قاطعها علي ضاحكاً: كنت واثق إنك من الشخصيات المترددة.. قولي

عايزة إيه؟

■ حان دورك

- عايضة أساعد الناس اللي محتاجة.. مش احتياج مادي، لأ.. احتياج معنوي؛ الناس اللي محتاجة حد جنبها، حد يشجعها، يسمع لها، يساعدها.. يساعده بدون مقابل..

- دي مبادرة جميلة جداً منك.. بس برضه مش فاهم ده إيه علاقته بيا؟
- مهو أنا معرفش حد..

- والمطلوب..؟

- حضرتك بتتعامل مع ناس كتير خاصة في العيادة وأكيد بيمر عليك شخص..
- قاطعها وكأنه أدرك ما تسعى إليه: نورسين اللي عندي دول مرضى نفسيين، مش مجرد أشخاص مش لاقين اللي يسمعهم والكلام اللي إنتي بتقوليه ده!

- وهو يعني المرض النفسي بييجي من إيه؟

- استند بظهره على الكرسي وقال بثقة: بييجي من حاجات كتير طبعا؛ حاجات أصعب من اللي بتتكلمي عنه واللي ممكن خيالك يوصل له.. ثم إن كل حرف بيتقال هنا يفضل بيني وبين المريض إستحالة مخلوق يدري عنه.
- أنا فاهمة ده سكتت قليلاً تفكر طيب إيه رأيك المرضى اللي حالتهم

تسمح عندك، تعرض عليهم الفكرة

- فكرة إيه أساساً...؟

- نعمل team هنبتيدي بشخص واحد حتى، هنتكلم معاه ونعرف مشكلته ونحاول نساعده بأي وسيلة.. وطبعاً بإشراف من حضرتك
- زي مصحة يعني، اتعلمت كتير قبل ك...

- قاطعته بحماس: مش مصحة، أنا لا أفتقه شئ عشان أعمل مصحة مرة واحدة.. كل الفكرة إننا هنكون جروب نبقي صحاب، نصدق بعض، ونؤمن بقدراتنا، وكل واحد عنده مشكلة اتسببت في لجوءه للعلاج النفسي نحاول نحلها.. يعني مثلاً واحد عنده حلم عايز يحققه وأهله أو صحابه أو اللي حواليه بشكل عام بيحبطوه، احنا بقى نشجعه ونحاول نيسر له سبل يحقق من خلالها اللي هو عايزه قالت بياس فاهمني؟

- أجاب والإندهاش يعلو ملامحه: عظيم!

- بجد حلوة الفكرة؟

- مش الفكرة..

تغيرت ملامح نورسين على الفور، فاستفاق علي من دهشته وأردف ضاحكاً:

- لأ مقصدش.. الفكرة حلوة لكن اللي شدني أكثر هو تفاعلك معاها

- أجابت على استحياء: اه.. أنا بتحمس أوي لما بتكلم عن حاجة بحبها،

وغضب عني بتكلم بتلقائية، مش بعرف أتكلم بيها في الطبيعي ×سكتت×ها

هتساعدني؟

- قوليلي الأول، إيه اللي طلّع الفكرة دي في دماغك؟

- مش حاجة محددة.. تقدر تقول مجموعة حاجات داخلية في بعض

مممكن اللي أنا شوفته يكون مجرد كابوس وفوقت منه، زي الحياة كده كل

اللي بيحصل للي عايشينها يُعتبر كابوس بشع، ولو في أيدي إني أصحي حد

مينفعش أتأخر.. الناس شافت كتير أوي لدرجة كلمة موت معدتش بتأثر

فيهم!، معدش ليها إيقاع قوي على القلب زي زمان، وده مُخيف.. دكتور أنا

■ حان دورك

عمري ما قولت الكلام ده لحد ولا حتى فكرت في يوم إني أنفذه، كنت بخاف أوي من كلام الناس؛ تحديداً اللي بيتقال في ضهري.. أصل لوي في وشي فأمرها سهل، بعرف أرد وعندي بدل اللسان مية

- أنهي كلام بالظبط؟

- يوووووه كلام كتير أوي، عندك مثلاً شايفة نفسها حاجة عظيمة×، هي فاكرة إن البلد كانت مستتية واحدة زيها تعديها، بتعمل كده عشان تلفت الأنظار ليها.. وغيره

- طب ودلوقتي، معدش فارق معاكي كلامهم؟

- هكون بكذب.. فارق معايا لكني زهقت.. ولو جيت للحق أه البلد دي محتاجة حد زيي يعديها؛ لأن في مليون زيي وبرضه خايفين من كلام الناس، احنا شعب لما يبشوف حد بيعمل حاجة صح بنتريق عليه!
- أمعن التفكير ثم أردف: للأسف حماسك وطاقتك دي مينفعش نتجاهلهم، هحاول أساعدك...

هو مذنب، وربما يمكنه التكفير عن ذنبه بمساعدتها، ففكرتها ليست بذلك السوء هي فقط تحتاج بعض التعديلات لتنجح.. بدأ التفكير في الحالات التي يرى أن تلك الفكرة أنسب لها من العلاج النفسي، كان قادر على تذكرهم جميعاً وتذكر حالاتهم دون العودة لسجلهم الطبي؛ لكنه بالطبع لن يعتمد على ذاكرته فقط. أثناء تفكيره في المرضى، خطر على

بأله نورسين.. لا يمكنه تصنيف ما رآته ضمن المرض النفسي خاصةً أنه أدري الناس بالحقيقة، لكن لا يظن أن الأمر نفسه ينطبق على حياتها عامةً! أحضر ورقة وقلم وبدأ بتدوين بعض الملاحظات:

نورسين شخصية معقدة إلى حد كبير، يتبين عليها البساطة، لكن لسببٍ أجهله ينتابني شعور من حينٍ لآخر بالغرابة تجاهها، تتدعي الهدوء في بادئ الأمر، ثم يعلو صوتها تدريجياً ويحتد.. للوهلة الأولى أرى أنها شخصية متفائلة تبحث عن الضوء مهما اشتد الظلام، ولكن بعد التمعن بها أشعر أن الحزن أقرب لها.. بل يناسبها أكثر الاختباء من الضوء وسط الظلام، كأنها الشئ ونقيضه.. لم تتبكر فكرة الفريق لمساعدة الآخرين فقط، بل لمساعدة نفسها، لتشعر أنها قادرة على مساعدة أحدهم خوفاً من أن تفشل في إعانة نفسها، ليست مريضة، لكنها تعاني.

كانت جملته الأخيرة هي الأقرب في وصفها "ليست مريضة، هي فقط تُعاني".

(10)

البطل هو الناجي في أرض الموتى

حينما تعاد الفراق؛ فيصبح موتهم لا يعني لك شيئاً، وكأنك اعتدت تلك الأحداث فلم تُعد تُثر عاطفتك أو حتى شفقتك!
عزيزي القارئ: دعني أخبرك شيئاً، الموت لا يعني فقط مغادرة الروح للجسد، بل هنالك موت آخر يُفقدك كل ما اكتسبت بنفس راضية، موت يجعلك مُجبر على الاستسلام، وهذا هو الموت الأصب؛ ولأن صعوبتها في سهولتها فذلك النوع من الموت لا يعني النهاية..!

استيقظ علي باكراً وتجهز؛ كي يذهب إلى عمله، وقد عدّل جدولته اليوم لتُصبح أغلب الكشوفات لمرضاه الذي يريد ضمهم لفريق نورسين، الذين فقدوا الرغبة في الحياة؛ فأصبحوا كالموتى. لعل انضمامهم يكون عوناً لهم في العودة إلى الحياة.. لم يكن على اقتناع كبير بالفكرة لكن جزء منه يُخبره أن إصرارها لم يأتي من العدم.

كعادته ارتدى ثياب تدورسمية إلى حد كبير، وأخذ مفاتيح سيارته وخرج من المنزل، لم ينظر للمرأة، فهو على إقتناع تام أن المرأة هي أكبر كذبة في حياة الفرد.. فهي لا تُظهر الحقيقة بل تعكسها!

وقد أقام علي تجربة في ذلك الأمر مع مريضة لديه تعاني من Dissociative identity disorder-اضطراب تعدد الشخصيات، فعندما تدخل عيادته لحضور جلستها كان أول ما يفعله، أن يجعلها تقف

أمام المرأة ويسألها: أوصفي لي شايضة نفسك ازاي؟، فترد بثقة: ست في أول الأربعينات شعري أسود بس فيه شوية خُصل بيضاء، وشي بان فيه التجاعيد معدتش زي ما كنت.. سُنّة الحياة. تبدو إجابتها طبيعية صحيح؟، لكن تلك المريضة لم تُكمل عامها التاسع عشر بعد، منذ ذلك الوقت وقد أدرك أن كل شخص يرى نفسه كما يُريد أن يراها وليس كما تبدو في الحقيقة.

دخل عيادته وبدأت عليها بإدخال المرضى واحدًا تلو الآخر، فأخذ يعرض الفكرة عليهم ويسجل ردود أفعالهم:

الحالة الأولى "يوسف"

- ها إيه رأيك يا يوسف؟

- مش عارف، تفكر هقدر أندمج مع حد بعد كل اللي حصل ده يا دكتور؟

- لو أنا كنت شاييف إنك متقدرش مكتتش هعرض عليك الفكرة من البداية، أنا كدكتور بقولك.. يمكن تلاقي علاجك في اختلاطك بالناس

- لكن الناس مؤذية..

- مش كلهم يا يوسف.. في ناس بيكونوا علاج، وأنا هبقى معاك خطوة بخطوة ولو لاحظت أي تراجع في حالتك أكيد مش هسيبك تكمل!

- اللي تشوفه..

الحالة الثانية "وَس"

- إيه رأيك في الفكرة؟

- حلوة ابتهج علي حتى أضافت جملتها الأخيرة ليهم مش ليا..

■ حان دورك

- ليه بتقولي كده؟
- أصل مش معنى إن كل واحد منهم مر بمشكلة أنه هيفهم مشاكل غيره.. وأنا مشكلتي خاصة شوية، ومهما حاولوا يداروها هتظهر في نظراتهم
- عارفة إيه اللي بيخليهم يبصوا لك كده! نظرت له باهتمام مُنتظرة
- أن يكمل× إنتي.. ضعفك وخوفك منهم بيبقى واضح لهم جداً ويبسلط الضوء على مشكلتك، اللي هي أصلاً مش مشكلة
- لا مشكلة ومش هتتحل بإني أواجه الناس زي ما إنت بتحاول
- خلاص اثبتي لي العكس، وجربي
- هتثدي أكثر..
- ونس إنتي عيزاني أعملك إيه؟
- تعالجني..
- من إيه؟، لم يجد رداً اللي بيطلب العلاج ده شخص مريض، لكن إنتي مش مريضة، إنتي خايفة!
- سكتت وبقيت تنظر في الأرجاء
- الحالة الثالثة " فرح "
- إيه رأيك بقى؟
- بصراحة يا دكتور الفكرة حلوة، لكن مظنش إن اشتراكي فيها هيفيد أي حد
- لكن ممكن يفيدك
- هكون أنانية أوي، وكفاية اللي أنانتي اتسببت فيه
- إنتي عمرك ما كنتي أنانية، بلاش تقنعي نفسك بالفكرة دي، جلد

الذات ده هيوصلك لطريق سد لا فيه رجوع ولا له نهاية.. إسمك فرح وكنتي فرحة لكل شخص دخلتي حياته، ومش موقف ملكيش ذنب فيه هو اللي هيكرك في نفسك

- الكلام ده حلو لكن مش حقيقي

- بإيدك تخليه حقيقي.. استغلي الفرصة اللي بعرضها عليك وقابلي ناس فاقدين الرغبة في الحياة وكوني لهم طوق ينجيهم من الفرق!، واستمدي منهم قوة ترجع حبك لنفسك وتثبت لك إن عمرك ما كنتي وحشة - تفتكر هقدر؟

- فرح اللي أنا أعرفها.. تقدر وأنا واثق في ده

- أجابت بطريقتها الأنثوية وبحماس بدا مصطنع: وأنا مش هخذل ثقتك؛ معاك يا دكتور

الحالة الرابعة "رحيم"

- ها يا رحيم بقالك ساعتين ساكت

- مش عارف يا دكتور علي بس مش عايز

رحيم من أكثر الحالات المُقربة لـ علي والذي يتعامل معه كـ أخ أصغر له - ليه؟

- هستفاد إيه يعني؟، ولا اللي وافقوا هيكسبوا إيه!، دي ناس بتدور على

أي حاجة تعملها عشان يقنعوا نفسهم إنهم كويسين وإن في أمل

- طب لعلمك بقى اللي هما بيعملوه هو ده الصح

- إيه الصح في كده؟، الصح إنني أقنع نفسي بأحلام وأعلي سقف

■ حان دورك

طموحاتي عشان أتصدم في واقع اسمه الحياة يجيبني على نافوخي؟
- أجا به علي باستنكار: لا طبعاً ميصحش، لكن الصح إنك تفضل واقف
مكانك مستني الموت ومنتفكرش حتى تحاول عشان مفيش أمل وكل حاجة سوداء!
- ما أنا كده كده هموت.. الدنيا دي مش دائمة وأي حاجة بنعملها هتزول
كان أمام رحيم على المكتب كوب من ×النسكافيه× لم يشربه بعد على
الرغم من وجوده منذ زمن، فتظاهر علي بأنه يأخذ بعض الأوراق، وأسقط
الكوب عليه عمداً، نهض رحيم مسرعاً وهو منزعج، فقال علي متصنعاً:

- يا نهار أبيض، أنا أسف جداً

بدا رحيم منزعج فأكمل علي:

- أدخل الحمام اغسل بسرعة

- لأ خلاص بقى، هروح البيت آخذ شاور.. أخذ محفظته ومفاتيحه

سلام أنا بقى

- أمسك علي بمعصمه قبل أن يرحل وقال: هتستحمي ليه؟

- هو إيه اللي ليه؟، مش شايف البهدلة اللي إنت بهدلتها لي!

- وإيه الفائدة.. مش ممكن هدومك تتبهدل تاني؟!

نظر له رحيم وقد فهم غرض علي من حديثه لكنه لم يجد إجابة، كان

حديث رحيم من البداية خاطئاً، فكيف يجدر به تبرير الخطأ؟!

الحياة لم تُخلق لتنتظر الموت، بل الموت وُجد لندرك قيمة الحياة.

سكت رحيم؛ فأدرك علي أنه انتصر، ولم يبقى لرحيم سوى قبول

الهزيمة كما يراها

رحيم هو آخر المرضى الذي أراد علي مشاركتهم، فبعد رحيله اتصل بـ نورسين ليخبرها عن المستجدات، وفي تلك الأثناء كان أحدهم قد وصل العيادة؛ لمقابلة علي، ألقى الزائر التحية على علياء وسألها عمَّ إن كان علي بالداخل بمفرده، فأجابته أنه كذلك وعرضت عليه أن تدخل لتبلغه، لكنه رفض عازماً أن يدخل له بنفسه، فاتجه إلى ناحية مكتب علي واقترب منه وقبل أن يفتح الباب سمع صوته يحدث أحدهم، فبقي خلف الباب يسترق السمع.



اتصل علي بـ نورسين وقد أجابت على الفور، فأخبرها مباشرة أنه عرض الفكرة على بعض المرضى ووافقوا، ظهرت السعادة على صوت نورسين، مرددة عبارات الشكر والامتنان لـ علي، سألها إن كان من الممكن أن يتقابلا اليوم؛ لمناقشة التفاصيل، فاعتذرت منه لوجودها برفقة أختها حتى يبتاعوا فستان الزفاف وعدم تفرغها، وبذلك أنهيا الاتصال على أن يلتقيان في وقت لاحق.

أغلق علي هاتفه ووضع على المكتب، وأسند ظهره على الكرسي بإرهاق شديد، فقاطعه دخول أحدهم، ما أن رفع رأسه حتى رأى محمد صديقه يقف أمامه، رحّب به بعفوية وتلقائية ثم طلب له فنجان قهوة وجلسا يتحدثان ويمزحان سوياً، ولكن ذلك المزاح لم يدُم طويلاً، فقد احتدت ملامح محمد ثم سأل علي بغتة:

- بقولك يا علي مين اللي إنت كنت بتكلمها قبل ما أدخل عليك؟
- تفاجأ علي من السؤال وقال: واضح إنك وقفت برة كتير

■ حان دورك

- يعني مش أوي..
- قال بنبرة جادة: بتتصنت عليا يا محمد؟
- لا بتصنت ولا حاجة، جيت أدخل لقيت معاك مكاملة قولت استنى برة.. جرى إيه يا علي، مالك؟
- إنت اللي مالك يا محمد، من إمتى و أنت بتتهتم بمكالماتي.. فاكّر نفسك خطيبتي!
- لأ فاكّر نفسي شريكك في اللي اتعمل وأي حاجة غلط هتودينا في داهية.. كلمت نورسين ليه؟
- ولما إنت سمعت كل حاجة، بتسألني بكلم مين ليه؟
- صرخ محمد قائلاً: سمعت بس مفهمتش.. إيه اللي بيربط البنّت دي بالحالات اللي عندك، هي عرفت حاجة؟
- ظلّ علي صامتاً، فصرخ محمد مجدداً:
- ما تتلق يا علي.. نورسين عرفت حاجة؟
- على الرغم من شخصية محمد الفكاهية والمرحة، إلا أنه الأسوأ حينما يفضب.
- معرفتش.. ممكن تسكت شوية، ولا إنت جاي تتخانق
- لا هتخانق ولا غير، اتفضل فهمني اللي بيعصل
- لم يكن أمامه حلاً سوى أن يروي لـ محمد كل ما جرى مع نورسين، والاتفاق الذي دار بينهم.
- قال محمد باندهاش: معنى كده إن نورسين أول حالة تدي رد فعل قوي تجاه اللي حصل.. هايل جداً × تذكر كلام علي عن فكرة نورسين ثواني، عايز تفهمني إنك قبلت تساعدنا في اللي هي قالتها!

- أيوة

- إنت عبيط يا ابني، فاكر نفسك في فيلم، وهي شايفة إن ب اللي هي بتعمله ده هيغير حاجة مثلاً؟

- مش يمكن فعلاً تقدر تساعدهم، وبعدين إنت إيه اللي مضايقتك ما تعمل اللي هي عيزاه!

- بعيد عنك.. تعمل اللي هي عيزاه بس بعيد عننا يا علي، نورسين فكرت في الفريق ده عشان حست بالشفقة على الناس اللي شافتهم، بتحاول تريخ ضميرها بإنها تساعد أي حد عشان معرفتش تساعدهم

- هي ملهاش أي علاقة باللي حصل لهم عشان تبقى محتاجة تريخ ضميرها.. الفكرة مش وحشة، وممكن تساعد ناس كتير، العلاج النفسي مقدرش يساعدهم

- قال بنبرة واثقة: إنت صح مش هي اللي بتريخ ضميرها..

- تقصد إيه؟

- أقصد إنك حاسس بتأنيب ضمير من ناحيتها وعشان كده قبلت الموضوع ده، مش كده؟

- ولو كده، فيها إيه يا أخي.. على الأقل لسة عندي ضمير!

- وكان فين ضميرك ده واحنا بنظبط كل حاجة سوا.. فوق يا علي اللي

بيحصل لها ده هو اللي احنا كنا عايزينه، سلام يا دكتور

خرج محمد غاضباً، وبقي علي جالساً، فتح درج مكتبه الأخير، لتظهر

خزنته، فأدخل الرمز السري ثم أخرج منها ملف وبدأ باستخراج الورق

■ حان دورك

منه؛ حتى ظهرت ورقة بإسم "نورسين مصطفى" ويندرج تحتها العديد من المعلومات حول نورسين.. محمد مُحق، علي يشعر بالندم الشديد تجاه ما تمر به نورسين، لكن هذه هي النتيجة التي أراها فلمَ الندم؟، ألا يجدر به أن يكون سعيداً الآن؟

قاطع شروده اتصال من محمد، نظر للهاتف بغضب ثم أجاب على مضمض، ليقابله حديث محمد الصارم:

- اعمل اللي إنت عايزه يا علي، اللي يفرق معايا إنك تبلغني أول بأول بأي جديد، وتحاول تعرف تفاصيل كل حاجة شافتها وعاشتها وتسجّل انطباعها عن كل حاجة.. أنا معنديش استعداد أضيّع فرصة زي دي عشان خاطر ضميرك، سامعني؟

- أجابه وهو يحاول منع نفسه ألا يسبّه: خلصنا يا محمد، كانت ليلة واتفضت

أغلق علي الهاتف قبل أن يستمع لرد محمد؛ فهو على علم بما سيتفوه به على كل حال، الملم أغراضه بضيق وخرج من العيادة متجهاً إلى منزله، بعد أن ألغى جميع المواعيد الباقية لليوم.



(11)

الجميع حزين، الجميع يُعاني

تظاهرك أنك بخير لا يعني أنك حقاً كذلك، كونك تمثل دور الأمير لا يجعلك أميراً.. فبعد انتهاء المشهد سيتوجب عليك خلع القناع. الأمر السيئ هنا يكمن في نظرة الناس لك، فهم يرونك أميراً دائماً، ويتفاوضون عن نزحك للقناع!

هم فقط يرون ما يودون، وأنت أيضاً تفعل المثل.. لذا على الجميع أن يعلم، أن الجميع حزين والجميع يُعاني، فزيادة مدة ارتدائنا له، لا تعني أنه سيدوم. أرايت يوماً بركاناً بقي هادئاً دون أن يثور؟ دخل علي منزله، بدّل ثيابه ووضعها في مكانها المناسب بنظامه الشديد والمُعْتاد، ثم جلس على مكتبه ينظر للشرفة المجاورة له باندماج شديد يُفكر في نهاية ما يفعله، الحزن يحاوط قلبه فيمنعه من الابتسام، تُرى ماذا سيحدث لنورسين بعد أن تكتشف الحقيقة، هل ستبقى ممتنة له على مساعدته، أم أن الندم سيحاوطها كحالها الآن.. هل يقوم باستغلالها لصالحه أم أنه حقاً يودّ مساعدتها؟

وردته رسالة من نورسين تخبره أنها متفرغة لمقابلته في العيادة بالغد إن كان وقته يسمح، فرد عليها بالموافقة، وفي الوقت نفسه وصلت رسالة من ونس تخبره أنها وافقت على الانضمام، ابتسم وهو يقرأ الرسالة ثم أغلق هاتفه وعاد لينام.. ولكن كيف له أن ينام بهدوء؟

حان دورك ■

تدخل عقله؛ ليعيد له لحظات كرهها بقدر ما كانت جميلة، فجماها
أعماه لدرجة لم يستطع رؤية مدى قبحها.. كتلك اللحظة التي قبل فيها
مشاركة محمد ليفعل ما فعلاه!



مرّ اليوم بروتيته المعتاد والمرهق لـ علي، حتى وصلت نورسين العيادة
فشعر وكأنما وجودها يساعده على شحن طاقته من جديد، يعجبه الفكرة
التي يعملان عليها سوياً وكونها لا ترتبط بعمله وليست جدية بالشكل الذي
يبغضه علي، سألتها عما تود شربه، فطلبت منه تأجيل المشاريب والدخول في
صلب الموضوع، وقد فعل:

- مبدئياً كده هيبقى معاكي خمس حالات، وكلهم مشاكلهم حسيتها
قريبة من اللي إنتي شوفتيه.. وأعتقد هتساعدك ×مد يده بملف تجاهها×
الملف ده فيه تفاصيل عن الحالات وملاحظات عليهم، وطبعاً أنا واخذ إذنهم
- ماشاء الله ده إنت جاهز بقى

- حد يشوف حماسك وميستعجلش.. المهم أنا عرفتهم إنك عايزة
تعملي حاجة تأثر في الناس وتساعدهم، وإنك بتحاولي تصلحي عادات
كثير غلط.. وعشان كده قررتي تكوّنِي التيم ده ويبدأ من عندهم
- هايل جداً وده فعلاً اللي أنا عايزة أحققه.. ×تصفحت الملف فلم تجد
سوى بيانات لأربع أشخاص فقط× مش قولت لي إنهم خمسة؟

- لم يفهم ما تعنيه؛ لذا أشارت للملف، فقال: اااا.. الحالة الخامسة
مش هتقابلها دلوقتي

- اشمعنى؟
- عشان دي حالة مميزة
- اشمعنى برضه؟!
- ابترسم ثم غير دفة الحديث قائلاً: مش ناوية تقراي؟
- سيبنا من الورق، أنا هقولك الإسم وانت تديني ملخص عنه هيكون
- أسرع وأوضح.. تمام؟
- تمام
- رحيم..
- رحيم ده أكثر شخص متشائم في الحياة، وشايف الدنيا سوداء.. بيني وبينك هو شايف الدنيا صح، لكنه عنده شوية معتقدات مدمرين حياته، وده مش بسببه؛ ويمكن ده السبب الرئيسي اللي بيخليني عايز أكون قريب منه أكثر من دكتور بيعالجه. رحيم وهو صغير كان مُبهج جداً ومليان طاقة ونشاط، أضعاف أي طفل في سنه، بيعرف يغني ويلعب مزيكا وبيرسوم.. حقيقي كان موهوب بشكل ميتصدقش، لما قعدت مع أهله وشوفت فيديوهات له وهو يلعب وبيعزف اتصدمت، لا يُمكن أصدق أنه نفس الشخص..
- واياه اللي حصل؟!
- بعد جلسات كثير وكلام اتقال منه ومن أهله، عرفت إن السبب الأول والأخير هما الأهل، على الرغم من إن أهله كانوا مبسوطين باللي بيعمله إلا إنهم كانوا خايفين يستمر على ده وينجذب للمجال الفني ويضيع مستقبله.. كانوا شايفين موهبته ضياع، منعوا عنه كل حاجة كان بيحب يعملها وكأي

■ حان دورك

طفل كان بيعاند ولكن عناد رحيم مكنش بالعياط أو التفسير، كان بيرد لهم اللي اتعمل فيه، منعوني من حلمي!، مش هحقق لكم حلمكم.. وبدأ تدريجيًا يبطل يحضر دروس ويهمل في دراسته، ويقطع علاقاته مع صحابه وينعزل عن الكل.. وأصبح بينه وبين أهله حاجز بيمنعه يقرب منهم، والموضوع بدأ يزيد، وفي أول سنة في الجامعة مكنش قدام عيلته غير إنهم يقبلوا موهبته، لكن للأسف كانت بعد ما شغفه انتهى، ولكن لحسن الحظ في تالته ثانوي حالته كانت اتحسنت شوية عندي، جاب مجموع قدر يدخله صيدلة خاص، وقتها كنت بحاول أقنعه ينقذ أي حاجة في مستقبله.. وأصبح رحيم الشاب اللي عنده ٢٣ سنة، بروح راجل عدّي الأربعين معندوش أي هدف في الحياة، فاقد الرغبة في كل حاجة، حاول ينتحر كتير جدًا بس الحمد لله ربنا بيسترها، وبعد يأس قرر بدل ما يروح للموت يقعد من غير ما يعمل أي حاجة لغاية لما الموت بييجي له.. إحباط الطفل لومتعالجش بدري بيتحوّل لمشكلة كبيرة أوي لما يتقدم في العمر

- رحيم محتاج يرجع ثاني للحاجات اللي كان بيعحبها..

- حاولت معاه كتير وكان رافض

- يمكن عشان مكنش حاسس إن حد بيشجعه!، معاك الفيديوهات اللي

قولت عليها؟

- معايا نسخة منها

- حلو جدًا، جات لي فكرة حلوة أوي، بس عيزاك عملي نسخة من

الفيديوهات لو سمحت

- بسيطة، بس إيه هي الفكرة؟
- مش هقولك دلوقتي، يلا قلولي بقى إيه حكاية يوسف؟
- يوسف ده أكثر حد مشكلته تبان بسيطة على الرغم من تعقيدها..
- الأول كده يوسف عنده ٢٥ سنة وصانع محتوى على اليوتيوب، ونقدر نقول
- كان مشهور على مواقع التواصل
- ردت باستنكار: كان؟!
- ما هو الحوار كله هنا، يوسف كان من الشباب اللي بيصاحبوا عشرين بنت في نفس الوقت وعایش حياته أوي من الناحية دي، وبعدها قابل بنت وحبّها، وربنا هدهام وبعده عن السكة دي، واتفق لها بعد ما اتأكد من مشاعرها وقرؤوا الفاتحة..
- لحد هنا تمام، فين المشكلة بقى؟
- المشكلة إن حصلت خناقة بينه وبين واحد من صحابه، صاحبه ده كان معاه صور قديمة له مع البنات اللي كان يعرفهم، وكان معاه الباسورد بتاع حسابه بحكم أنه صاحبه وبيعتبره أخوه، فأخوه الأصيل فتح حسابه ونزل الصور دي عنده، طبعا الصور ضرّت البنات لما أهاليهم شافوها وحصلت مشاكل والناس كلها قلبت ضده.. بما فيهم أهل حبيبته على الرغم من كونها مصدقاه بس أهلها أجبروهم ينفصلوا على أساس أنه واحد سمعته زفت واللي هتكون معاه مش هتسلم من كلام الناس.. ومن وقتها وهو رافض يتعامل مع أي شخص، وابتعد تماما عن التواصل الاجتماعي وكل التطبيقات المتعلقة بيه وأصبح من المستحيل أنه يثق في أي حد.. أنا عانيت معاه عشان بيدأ يحكي لي

■ حان دورك

- عارف احنا ممكن نجيب شخص بيْفهم في الهكر ونخلبه يثبت إن البوست ده نزل من جهاز صاحبه
- مش فارقة من جهاز مين طالما اللي في الصورة يوسف
- قالت بأداء مبالغ: لا ما احنا هنهدده إنه لو معترفش على نفسه قدام الناس هنبلغ عنه، ومعتقدش هو هيرفض يعني وبكده نكون حسنا صورته شوية للناس، وبعدها نروح لوالد البنت ونفهمه الحكاية
- علق على فكرتها ضاحكاً: شغل أفلام أوي
- وهي يعني الأفلام دي جت منين!
- وجهة نظر
- كده باقى لنا ونس وفرح..
- فرح يا ستي عندها ٣٠ سنة، بتشتغل life coach بمعنى إنها بتساعد الناس يحلوا مشاكلهم ويفهموا نفسهم أكثر من خلال مجموعة مواضيع أو خطوات معينة بيتبعوها، هي حقيقي شخصية بتضيف بهجة لأي مكان هي فيه.. لكن بسبب موقف اتعرضت له مقدرتش تكمل، وسابت الشغل ويرضه قررت تتعزل عن الناس وبدأت تشوف نفسها إنها بتأذي اللي حواليتها.
- إيه اللي خلاها تحس بـ كده؟
- مرة وهي مروحة شاب عاكسها، وبدأ يتناول بالإيد ف شخص تاني تدخل عشان يساعدها، احتدت المشكلة صحاب الشخص اللي ضايقها اتجمعوا على الولد وهاتك يا ضرب.. حصلت له مشكلة في رجله الشمال عملت له إعاقة

- ربنا يصبره ويشفيه، ده اللي سبب لها أزمة نفسية؟
- بالضبط.. وللأسف هي مقتنعة كامل الإقناع إنها السبب في اللي حصل..
- طب ودي هنعمل معاها إيه؟
- أنا شايف إنها لما تشارك في المشروع هتقدر تدي طاقة إيجابية للي حواليتها وبالتالي هينعكس ده في ردود أفعالهم فهيثبت لها إنها بتسبب بصمة حلوة للي حواليتها مش بتتذيقهم
- حلوه أوي.. طيب وونس؟
- وونس يا ستي مشكلتها الحقيقية مش نفسية، مشكلتها للأسف جسدية.. من غير تفاصيل لأنها مش هتحب ده، vitiligo أو المعروف بالبهاق، للأسف صاب أجزاء كثيرة من جسمها وخاصة وشها.. وبرغم إن أهلها مرتاحين مادياً إلا إن ده مأفدهاش في حاجة؛ لأنه للأسف ملوش علاج، وطبيعي احنا كبشر عيينا بتروح للحاجة المختلفة في الصورة ونفضل نبحلق فيها لغاية ما صاحبها يكرهنا ويكره نفسه!
- أكيد الموضوع مآثر فيها أوي وأكد بتفكر في مليون حاجة مع بعض، وكل حاجة كانت بتعلم بيها بقت بالنسبة لها سراب.. تفنكر وجودها معنا هيفيدها؟
- أوهيئديها.. على حسب ردود أفعالنا تجاهها، بس كون إنها قبلت تكون وسطنا دي خطوة حلوة وأتمنى إن نتيجتها تكون أحلى، بالمناسبة وونس عندها هواية حلوة أوي، بتعمل حاجات hand made حلوة جداً
- ممكن نستغل النقطة دي، هي عندها كام سنة؟

- ابتمت ببهجة وقالت: لازم نشتغل على فكرة معينة

- فكرة إيه بقى؟

- أجابت باسمة: الحياة حلوة بس نفهمها

رحلت نورسين، وجلس علي يُدندن كلمات الأغنية، فقام بفتح هاتفه

وتشغيلها.

"الحياة حلوة.. بس نفهمها

الحياة غنوة.. حلوة أنغامها

ارقصوا وغنوا وانسوا همومها"

(12)

الحياة حلوة، بس نفهمها

الحياة ليست بذلك السوء، فهي مليئة باللحظات السعيدة، ولكننا نتجاهلها مقابل ذكرى سيئة.. هل فكرت يوماً ما الذي سيحدث إن فقدت تلك الحياة؟

العديد من الأشخاص يتمنون ذلك بالفعل، لكنهم لا يعنون الأمر.. فإذا فكرت جدياً ستجد أنك تود أن تتخلص من أعباء الحياة، لأن تتخلص من حياتك! الموت لا يعني أنك ستُنهي ما يؤمك، بل أنه العكس تماماً؛ فالموت يسلب منك قواك، بعكس الحياة التي تملؤك بالقوة؛ لتتخلص من كل ما يزعجك، ولكنك أنت الذي يأبى.

كيف تظن بأنك ستجاوزهم وأنت الذي لازال ينتظرهم؟

كيف ستقدم وأنت لازلت تنتظر للوراء؟

راجع حساباتك وافهم الحياة جيداً، أو لا تفهمها فقط عشنا كما هي، وكل يوم حينما تستيقظ انظري المرأة واشكر نفسك التي تحملت أعباء الأمس وأطلب منها راجياً أن تتحمل المزيد، وطمنئها بأن المزيد ربما يكون خير واسع لا تمل منه.

عزيزي القارئ: أعلم كم أن العالم مؤذي لك، ولكنك لا تعلم كم أن العالم مؤذي بدونك.. لذا أرجوك ابقى على قيد الحياة، والسعادة.

مرت ثلاثة أسابيع مليئة بالعمل لنورسين وعلي، فقد أجروا غرفة ستوديو؛ لتجمعهم مع باقية الفريق، وقاموا بوضع أربعة مكاتب حول بعضهم، على كل مكتب أدوات خاصة بشخصية صاحبه، وجعلوا ديكور المكان هادئ مُريح للعين، ولكنهم لم يكونوا ليتمكنوا من الإنتهاء لولا مساعدة مصطفى -والد نورسين- لهم، فقد أحب كثيراً الفكرة خاصة حين رأى السعادة في عين نورسين؛ فأدرك حينها أن السعادة الحقيقية تكمن في رؤية من حولك سعداء، تكفل بتكلفة تحضير المكان من أثاث وديكور وغيره، وإرسال عمال لمعاونتهم، وأصر "علي" على دفع الإيجار.

وبعد العديد من التجهيزات، ها قد حان الموعد المنتظر:
كانت نورسين أول من يصل؛ لتكون في استقبالهم، وبعد عشر دقائق دخل علي وخلفه مجموعة صغيرة من الشباب، كانت تراقب دخولهم وتحاول تخمين هويتهم، لكن ما لفت ناظرها وجود فتاة منتقبة تُمعن النظر في أحد الشبان الواقفين وكأنها تعرفه، قاطع تمعنها صوت علي مازحاً:
- دي نورسين صاحبة الاختراع ده، ممكن ندخل نقعد عشان أعرّفك عليهم واحد واحد

- قالت نورسين: اتفضلوا، في أربع مكاتب، كل واحد يختار المكتب الأقرب لشخصيته

اتجه أحدهم للمكتب الذي يتوسطه معدّات تصوير وجهاز حاسوب فأدركت نورسين أنه يوسف وهو الشاب ذاته الذي أطالت تلك الفتاة

حان دورك ■

النظر إليه. اتجهت بعده الفتاة المنتقبة لمكتب ملئ بأدوات الأعمال اليدوية من خرز وألوان وخيوط ملونة وأقمشة، فعلمت أنها ونس، لكن نورسين لم تفهم أهي حقاً منتقبة أم أنها فقط تُريد أن تختبئ خلف نقابها.. تبعتها الفتاة الأخيرة تجاه المكتب الأكثر هدوءً؛ ملئ بالشموع العطرية ودفتر كبير لتسجيل الملاحظات، ولوحة لتسجيل المهام، في الواقع قبل أن تتجه للمكتب أدركت نورسين أنها فرح فلم يتبقَ غيرها من الإناث.. وأما عن الشاب الأخير فلم يُحرك ساكناً، ظل واقفاً يراقب بعينه المكتب الأخير الذي اعتلاه بعض الآلات الموسيقية البسيطة وبعض أدوات الرسم، كان من الواضح أنه "رحيم" أكثر الحالات التي أرادت نورسين رؤيتها.. أطالت النظر إليه، متوسط القامة، جسده رياضي، ملامحه عادية لكنها جذابة.. لم يجذب اهتمام نورسين سوى نظرته الحادة تجاه الآلات الموسيقية، أحببت تلك النظرة ولكنها أخافتها؛ جعلتها تشعر كما لو أنه سيقوم بتدميرهم في أي لحظة.

- قال علي: مش هتقعد يا رحيم؟

- لاحظت نورسين انزعاجه فقالت: لو الحاجات اللي على المكتب

مضيقاك ممكن نشيلها عادي..؟

- أجب رحيم على استحياء: مش مشكلة

بعد أن جلس الجميع بدأت نورسين حديثها قائلة:

- بداية كده شكراً جداً إنكم قبلتوا تيجوا، وحققي مبسوطه إنني هتعرف

عليكم.. ثاني حاجة بقى: فكرة المكان ده إننا نكون مع بعض ونساعد بعض،

بمعنى إن مفيش أي حد مُجبر يقول مشكلته، لأن ببساطة احنا جاينين نشجع

بعض ننسى اللي فات مش نتحاسب فيه.. بس ده ميمنعش إن اللي عايز ممكن يحكي اللي مضايقه، لعل حد يقدر يساعده.. إيه رأيكم بقى نبدأ كل واحد يعرف عن نفسه؟

صمّت الجميع جعلها تشعر كما لو أنها تُحدث نفسها، فتدخل علي:

- إيه يا شباب مش جاين ننام، هههههه أنا مقدر إن الكل متوتر بس خيلنا نبدأ نتكلم عشان نخفف الحدة دي..

- قالت ونس: أنا ممكن أبدأ.. اسمي ونس عندي ٢١ سنة، عايشة مع

أهلي، للأسف بطلت دراسة بعد الثانوية وندمانه على ده

- قاطعتها فرح متسائلة: وليه بطلتي؟

بدت علامات التوتر واضحة على ونس للجميع، فحاول علي تغيير دقة

الحوار لكن ونس أوقفته عن الحديث حينما رآها تفك عقدة النقاب وتزيله عن وجهها فتظهر بقمع التصبغات واضحة.. حينها قالت:

- أظن الإجابة واضحة!

- قال يوسف: إجابة إيه؟، إنتي مقولتيش حاجة أصلاً..

التفتت تجاهه أكثر؛ ليرى آثار البهاق، فلم يُبدي اكراناً لها

- أيوة فين الإجابة برضه؟

- وشي.. دي الإجابة، مقدرتش أستحمل نظرات زمالي لييا فقررت

أسيب التعليم، كان قرار غلط بس وقتها كان هو الحل

- تجاهل يوسف ما قالته، ونظر لمن حوله، ثم قال: إنتوا ساكتين ليه يا

جماعة.. ما حد يُرد عليها!

■ حان دورك

- ابتهج علي من ردة فعله وأجاب: ما ترد إنت وتورينا شطارتك...
- والله لولا إنها بنت.. اسمحيلي يعني بس إنتي اللي شايفة نفسك كده،
إنتي اللي بتحسسي اللي حواليكى إن دي مصيبة مع إنها مش حاجة.. عارفة
ليه مش حاجة؟، عشان مش إنتي السبب فيها، ربنا كتب إن ده يحصل
اعتبريه ابتلاء واحمدي ربنا مش تتكسفي منه، وتوقفي حياتك عشان
الناس ونظراتهم!، الناس اللي إنتي خايفة منهم دول عمي، مش بيشوفوا
الصورة كاملة ولا حتى نصها..

لاحظ الجميع انفعال يوسف في الحديث، كان علي ونورسين على دراية
بسبب انفعاله، فهو أكثر الأشخاص الذي أذاهم حديث الناس..
- أكمل حديثه: النقباب ده عظيم.. لما تلبسيه عن اقتناع مش عشان
تستخبي فيه

- قاطعه علي: اهدى شوية يا يوسف

- أنا أسف إنى اتكلمت بالأسلوب ده.. بس الناس ×سكت× كلمة الناس

دي بتعصبني

كانت ونس تشاهده وتستمتع لما يقوله في صمت، شئ ما بداخلها سعيد
بنظرته لها، وجزء آخر لازال يرى أنها مجرد طريقة لمواساتها.. أما فرح
فلم تتمكن من قول شئ، شعرت بالندم؛ كونها من سأل، وكانت تلك نقطة
سيئة فالآن عقلها سيقتنعها أنها تؤذي من حولها مرة أخرى. رحيم لم يكن
ييالي لهم من الأساس، كان في عالم آخر وهو يتأمل "الجيتار" الموضوع
أمامه، ونورسين تراقب شروده الغريب وسط ذلك الضجيج..

- تدخلت نورسين: أنا شايفة إن يوسف معاه حق، حرام تضييعي سنين من حياتك عشان خايفة من الناس، خاصةً لواحدة قمر زيك - لم تكن مجاملة، فونس حقاً جميلة المظهر - إيه رأيك تعرفنا على نفسك يا يوسف بما إنك اتكلمت؟

- يوسف ٢٥ سنة، خريج كلية حقوق.. مشكلتي وبكل صراحة بسبب الناس برضه × نظر للأرض وابتسم × يمكن مشكلتي مقارنة باللي أي حد عاشه تكون تافهة لكن...

- مفيش حاجة اسمها تافهة، طالما مضيقاك تبقى مهمة لينا كلنا، اتفضل - ابتسم وأكمل: أنا كنت مهتم جداً بالسوشيال ميديا وكنت إلى حد ما معروف، وبرضه إلى حد ما الناس بتحبنى.. لكن كل ده اتغير حرفياً في يوم وليلة، كلام طلع عليا والناس ببساطة صدقته ومكنش قدامي فرصة حتى أشرح موقعي، كمية تريقة وشتايم وتهريج قابلتني.. يمكن أنا كراجل رأي الناس مأثرش فيا غير لما لقيت اللي بحبهم يبيعدوا عني، اللي شاف إن المصلحة خلصت، واللي شاف إن وجوده جنبي بيخليه زيي.. وكأني بقيت حاجة وحشة مينفعش حد يقرب منها، وبالمناسبة نفس الشخص اللي بعد عني هو اللي بيعمل نفس اللي كنت بعمله.. بس يمكن أكثر حاجة كسرتني إنني انفصلت عن البنت اللي حبيتها، ×تههد× بس كده من اللحظة دي فقدت ثقتي في كل اللي حواليا، وأي حد بيدخل حياتي يبقى قاعد مستني اليوم اللي هيطلع منها، معدتش قادر أحدد الشخص ده صاحبي بجد ولا مجرد فترة وهيمشي، والحاجة الأكبر بقى واللي مش قادر أفهمها، ازاي الناس ممكن

حان دورك ■

تقلب ضدك في أقل من ٢٤ ساعة!، هل احنا كبشر سهل أوي أي حد يغير تفكيرنا ويتحكم في رأينا!

- أجابته فرح: احنا فعلاً غلابة أوي، لما بنلاقي حد بيقدم محتوى حلو حتى لو كان بسيط بنفرح بيه وبنشوفه ملاك مستحيل يغلط؛ فبنسى أنه بشر ومع أول غلطة يعملها بنقلب ضده وكأنه تحول لشيطان

- أكمل علي: ده حقيقي، لكن مش معنى كده تصدق إنك شيطان.. ولا حتى ملاك، إنت بني أم، وبني آدم طبعه خطأ

بعد جملة علي دام الصمت ثوانٍ حتى قطعه تساؤل نورسين عمّن سيكون التالي، فأجابت فرح:

- أنا ممكن أتكلم.. بس قبل أي حاجة، تصميم المكان حقيقي يجنن فرح مُحقة، فقد اجتهدت نورسين كثيرًا بمعاونة علي؛ لجعل المكان مميز أو على الأقل خاطف، ينتشك من بشاعة العالم ليُلقي بك في جمال الخيال. الجدار باللون الأبيض الذي أبرز التفاصيل، الأرض مغطاة بالخشب "الباركيه" الذي شكّل مظهر أنيق مع الجدار، يتوسط الغرفة شُرْفَة كبيرة أضافت اتساع وهمي لها، يغطي الشرفة ستارة شفافة باللون الأبيض الهادئ الذي مكن الشمس من اختراق المكان؛ لتُضفي عليه جزء من جمالها، وأما عن الأثاث، فهناك أريكة باللون البني الفاتح "البيج" يعتليها بعض الوسادات الملونة بألوان عدّة وبجانبيها كرسي خشبي أضاف لمسة دافئة للمكان، وفي الجهة المقابلة للأريكة يوجد الأربعة مكاتب بنفس لون الأريكة، وتلك النباتات التي امتلأت الغرفة بها، وبالطبع كانت لمسة علي

الخاصة، والتي حازت على إعجاب نورسين بجدارة، فقط النبات يُشعرك بالحياة وإن لم تكن تحياها!

- اسمي فرح عندي ٢٠ سنة، كنت بشتغل life coach وبسبب مشكلة حصلت لي بطلت.. الحقيقة مش حابّة أخوض في تفاصيلها، لكن شغلي معناه إني أساعد الناس تلاقي سبيلها عشان تكمل الحياة ولكن بطريقة غير مباشرة كنت السبب في وقف حياة شخص بالمعنى الحريفي مش مجرد تعبير مجازي، ده خلاني أشوف إني مستاهلش المهنة دي على الأقل في الفترة الحالية..

بالرغم من كلماتها المنظمة والواثقة إلا أن نظراتها كانت قادرة على إظهار كم الألم الذي يعتلي قلبها؛ ذلك ما جعل الجميع عاجز عن الحديث، فكونك أحد أسباب إيذاء الغير ليس بالشئ الهين الذي يمكنك تجاوزه والاستمرار من بعده، فكيف حال من يسفك دماء غيره بغير حق ثم يخلد للنوم؟! - قال علي ل فرح: تفتكري لو واحدة جت لك بتعاني من نفس مشكلتك بالضبط كنتي هتقولي لها إنتي متستاهليش تشتغلي وتعيشي وتمارسي حياتك؟

- أكيد لأ، حتى لو أنا شايفة ده، مينفعش أنقله لها.. على العكس دوري هنا إني أطمئنها، وأحاول أغير فكرتها دي عشان تعيش - ومستخسرة تعملي ده مع نفسك؟ - نظرت له بابتسامة هادئة وقالت: فاقد الشئ يُعطيه - دورك يا رحيم

■ حان دورك

- نظر رحيم للجميع وكأنه يراهم للوهلة الأولى ثم قال: رحيم أيمن، ٢٢ سنة، كلية صيدلة

انتظر الجميع أن يكمل، ولكنه صمت.

- إنت كده خلصت يعني؟!

- اعذرني يا دكتور، بس مين دول أصلاً عشان يعرفوا عني أكثر من اللي أنا قولته!

كانت جملة رحيم تُعبّر عما في أذهان الجميع، ومع ذلك لم يكن من المناسب التفوه بها، فقد أثارت نوع من الريبة في المكان، حاولت نورسين أن تغيّر أجواء المكان قائلة:

- بما إن كلنا أول مرة نشوف بعض، إيه رأيكم كل واحد يكتب في ورقة حاجة عايز يقولها لكل شخص هنا بصراحة ومن غير ما يكتب اسمه، وبعدها هناخداهم ونحطهم في بوكس صغير ونقرأ عشوائي

شجّع الجميع الفكرة؛ لإضافة جو من المتعة للقاء وكسر حاجز الصمت الذي غلّف المكان، وزّعت نورسين ورق على الجميع ثم أخبرتهم أنهم سيبدؤون اللعبة بـ علي، فقال ساخراً من توزيعها للورق:

- المهمة يا شباب خمس دقائق ونلّم الورق

صوت ضحكاتهم المتداخلة أشبع شعور الوحدة بداخل نورسين، أحبت مظهرهم.. وتحب أكثر كونها سبب في اجتماعهم.

جمعت الورق بعد أن انتهوا ووضعتة في صندوق صغير، ثم بدأت بسحبه وقراءته بشكل عشوائي:

- الورقة الأولى: أخويا الكبير مش الدكتور، الثانية: ناجح في شغله بس مش في حياته، الورقة الثالثة: عندي اقتناع تام إن لقاءنا وراه سر.. هموت وأعرفه، الرابعة:....

- قاطعها علي وقد تغيرت ملامحه: هههه مين اللي كتب المسدج دي يا شباب؟

- قالت نورسين: لا كده بتغير شروط اللعبة

- يا سلام!، وهو مين اللي حط الشروط دي؟

- أنا، اسمع بقى. الورقة الرابعة: في كل مرة وقعت كنت إنت أول إيد

بتتمد لي، الورقة الخامسة والأخيرة: بذلت مجهود كبير معايا، وكنت كل

مرة بخذلك.. آسف، كده خلصنا.. إيه رأيك في اللي اتقال يا دكتور؟

- حلو.. دلوقتي هنكتب عن فرح

بعد جمع الورق

- الورقة الأولى: متعاملتش معاكي كفاية بس معتقدش إنك مؤذية

إطلاقاً، الثانية: اللي بيموت أو بيتعب ده نصيبه، وجودك أو غيابك لا هيكون

سبب ولا هيكون مانع، الثالثة: أتمنى نكون صحاب لأنني حبيبتك، الرابعة:

فاضية، لأ مش مكتوب كده دي بجد فاضية يا جماعة!، «ضحكوا» نكمل،

الخامسة: إنتي فرح لأي حد يشوفك مش مجرد إسم.. ها إيه رأيك يا فرح؟

- كلام جميل أوي ربنا يسعدكم، فرحتوني.. دور يوسف

بعد جمع الورق

- الورقة الأولى: متقولش كلام إنت مش قادر تعمل بيه، الثانية: فاضية

برضه، لا أنا عايزة أعرف مين اللي بيسيب الورق فاضي، اللي بعده: أتمنى

■ حان دورك

ترجع للسوشيال ميديا؛ لأنك كنت الوحيد اللي بيديني ثقة في نفسي × نظرت نورسين لونس فرأتها تنظر ليوست الذي تعجب مما سمعه؛ أدركت حينها أنها صاحبة الرسالة، وعلمت لماذا أطالت النظر له في بداية اللقاء × احم.. الرابعة: بشكرك إنك بتجاوب معنا، الخامسة والأخيرة: إبدأ من جديد، الفشل لسة مش عارفلك طريق. رأيك إيه يا متر؟

- لا تعليق، دور فكر رحيم.. أيوة دور رحيم

بعد جمع الورق

- أول ورقة: مش حابّة وجودك في الـ team، الثانية: مرّيت بحاجات كتير وحشة وده سبب سكوتك.. هيبجي وقت وتكلم حتى لو الوقت أتأخر، الثالثة: حاسس إنك aggressive أوي مع اللي حوالياك، اتمنى أكون غلط، الرابعة: منور المكان.. وهنتور أكثر لو حاولت تعناد عليه، الخامسة: عايزة أسمعك بتعني × نظرت نورسين لرحيم، فوجدت ملامحه ازدادت غضبًا بعدما قرأت عليهم ما في الورقة الأخيرة × إيه رأيك في الكلام؟

- عادي

- دورك يا وّنس

- أجابت بصرامة: لا مش عايزة..

- ليه؟، دي حاجة حل... ..

- فهم علي انزعاجها، فقال: سببها براحتها يا نور..

حينما تصل أعلى درجات الوحدة: ففكره البشر، وتُدرك أن حديثهم

المعسول ليس سوى سم، سيقضي عليك يوماً..

- قالت فرح: دورك يا نورسين

بعد جمع الورق

- لا حد ثاني يقرأ، مش معقولة هقرأ اللي اتكتب ليا

- أجاب علي: طب هاتي أنا هقرأ لك .. أول حاجة يا ستي: كونك عايزة

تساعدني ده حلو، لكن لازم تعرفي إن ده احتمال كبير ميغيرش حاجة،

الثانية: اسمك حلو أوي ومختلف، الثالثة: مفيهاش حاجة، الرابعة: عندي

إحساس كبير إنك تايهة وسط لغبطة مش لاقية لها مخرج، الأخيرة: ملامحك

رقيقة أوي.

- الكلام حلو بس مش واضح أتمنى لو أقدر أعرف كل كلمة مين

صاحبها..

- أجابها علي: في واحدة بتكسر القواعد هنا

- قالت مازحة: نسيت إن أنا اللي كتبها ولا إيه؟ .. كده خلصنا يومنا

الأول، وختاماً دكتور علي هيقول رأييه في القعدة ويحكم عليها، وكل مرة

هيقول لنا الحاجات الجديدة اللي هيلاحظها. اتفضل

- كنت متوقع نتيجة أسوأ بكتير في اللقاء ده، ولكن إنتوا فاجئتوني

بحاجة أحلى بكتير، عشان كده نقدر نقول إن الإجمالي حلو.. بعيداً عن اللي

اتضايق واللي اتعصب، لأن كل دي مؤشرات كويسة، معنى إن ردود أفعالك

اتغيرت؛ يبقى في استجابة. حاجة مهمة أوي حابب أعلق عليها، لاحظتوا إن

كل شخص بينصح الثاني باللي ناقصه، زي بالضبط كفيف بيحكي فيلم

ل أطرش. حلو أوي إنك تنصح غيرك، بس لازم تعرف إنك أولى بالنصيحة

■ حان دورك

دي.. ولو إنت مش بتعمل بيها وصعبة عليك، اعرف كويس إن اللي قدامك
عُمره ما هيقدر يطبقها.. عشان تقدم أكل للي قدامك لازم تدوق طعمه
الأول..

هنالك أشخاص عالقون في بئر عميق، ورغم ذلك إن انكسرت زجاجتك؛
أعطوك قدرًا من الماء، وإن حاولوا الخروج، تطمس ظلمة البئر أملهم.
فالبئر هو الوحدة، وزجاجتك تعني القلب، ويُقصد بالماء.. النّونس.



(13)

لعلَّ القادم أفضل

وإن كنت تزهد الحياة، ستجد دائماً جانباً منك يرغب فيها، يريد أن يعيشها آملاً أنَّ القادم أفضل ولكن ماذا إن لم يكن كذلك؟

استيقظ علي من نومه؛ ليتجه إلى عيادته، وعلى غير عادته فقد استغرق وقت طويل للنهوض من على الفراش، انقلب حاله فور استلامه رسالة من نورسين قائلة: "صباح الخير.. فرحت بجمعتنا امبارح، بعيداً بقى عن فكرة التيم الأساسية، بجد شكراً من قلبي". لم تمرُّ ثوانٍ من قراءته للرسالة فإذا بها تُرسل له مرة أخرى قائلة: "مممكن تبعت لي رقم فرح وونس عشان أقدر أتواصل معاهم، وإننت تتواصل مع الشباب؟".

ترك هاتفه واتجه للحمام متجاهلاً رسالتها، لا يعلم ما الذي يفعله معها، وإلى أي الطرق سيقودهما!، كان يظن أنه بتلك الطريقة يُكفر عمّا فعله، ولكن من الواضح أن الأمر يزداد صعوبة.. ماذا إن علمت نورسين بما يخبئها؟، والسؤال الأهم ما الذي سيحدث إن علم الجميع بما حدث بموافقته!، لقد كان محمد مُحق لم يكن عليه الاستمرار مع نورسين بأي شكلٍ من الأشكال..

لم يستطع تجاهلها كثيراً؛ فقد أرسل لها أرقامهن فور أن خرج من الحمام، ولم ينتظر منها إجابة، بدأ بتغيير ملابسه سريعاً؛ خوفاً أن يتأخر على مرضاه.

■ حان دورك

في تلك الأثناء بدأت نورسين بتسجيل أرقامهن، وحادت ونس على "الواتساب" معرفة عن نفسها ومتسائلة عن أحوالها، لكنها لاحظت اقتضاب ردودها، الناتج عن عدم تقبلها للغرباء وربما لنورسين خاصة، لذلك حاولت أن تسألها عن أمر لربما يجعلها تخرج من قوقعتها، فقالت:

- إنتي تعريفي يوسف من قبل التجمع ده مش كده؟

- عرفتي منين!!!

- احنا كينات نظراتنا بتفضحنا وتبقى مكشوفة أوي تحديداً لوقدام

بنت تانية، تقدري تقولي كده لا يفل الحديد إلا الحديد..

- أيوة أعرفه، بس ده هيبقى سر بيننا مش كده؟

- طبعاً كده.. مش عايزة أضغط عليك، بس لو في أي وقت حبيتي تحكي

لحد أنا موجودة. وصدقيني عُمّر ما حد هيعرف اللي بتقوله ليا

- شكراً إنك كلمتيني.. أنا مكنتش مقتنعة بالفكرة لما اتقالت لي بس

الحقيقة ارتحت لما اتكلمت مع ناس جديدة، مع إنني كنت رافضة تماماً

الاحتكاك بأي حد، بس في حاجة كده في المكان دفعنتي إنني أتكلم.

- والحاجة دي تبقى يوسف؟

- يمكن، بس مش الحاجة الوحيدة..

كانت ونس تتحدث بطريقة أفضل مما رأتها نورسين البارحة، ففهمت

حينها أن تلك الشاشات الإلكترونية تجعلها أكثر ارتياح، فكما تخفت في

النقاب هي الآن تتخفي خلف هاتفها. بعدما أنهت حديثها مع ونس قررت أن

تتحدث مع فرح فذلك سيجعل الأمر ودي أكثر في اللقاءات القادمة؛ وربما

يساعدها ذلك في تحقيق هدفها بشكل أسرع.

وكالمعتاد عرّفت عن نفسها وسألتها عن أحوالها، ثم دار بينهما حوار بسيط بخصوص فكرة الفريق، فشعرت نورسين أنها لم تستصيغ الفكرة كثيراً وربما تراجع نفسها وتتوقف عن المجيء، لذا أرسلت لها:

- طيب ممكن أطلب منك طلب؟

- اتفضلي

- عيز اكي تفضلي تيجي التجمعات اللي هنعملها لأن الهدف من الفكرة

دي إننا نبقى صحاب وجنب بعض

- هحاول أعمل كده، لكن موعديش إنني هتغير أو هقدر أساعد حد يتغير

- وأنا مش مستتية منك كده، بس طول ما إنتي معانا توعديني إنك

تشيلي فكرة إنك مؤذية دي من دماغك!، اعتبرينا بناخد لقاح ضد آذكي،

وشوفي الدنيا هتوصل معاكي لإيه..؟، اتقنا!

- ماشي

تعمدت نورسين ملاحظة شخصياتهم من طريقة حديثهم معها؛ في محاولة منها أن تكتشف طريقة إعادة ما فُقد سابقاً، بدأت نورسين العمل على عدة أشياء منها البحث عن فرح على مواقع التواصل الاجتماعي؛ ومن خلاله توصلت لقر عملها واتجهت إليه بالفعل.

كانت قلقة ألا تجد أحد هناك؛ لأنها تعلم أن فرح تركت العمل، ولكن حين وصلت للمكتب وجدت السكرتيرة بالداخل، وبعد عدة استفسارات من نورسين للسكرتيرة أدركت أن ذلك المكتب يعمل به ثلاثة أشخاص

■ حان دورك

غير فرح في نفس المجال بتخصصات مختلفة، طلبت من السكرتيرة أن تزودها بمعلومات حول الأشخاص الذين تعاملوا مع فرح قبل تركها للعمل، ولكنها رفضت معللة أنها من خصوصيات العمل، لكن في تلك اللحظة تدخل أحد الرجال، ومن طريقته في الحديث علمت نورسين أنه أحد العاملين في المكتب، فتساءل عما يحدث، وبعد أن علم سألت نورسين عن السبب فتهدت ثم قالت:

- كنت محتاجها في حاجة.. على كل حال شكرًا

استدارت؛ لترحل، فأوقفها ذلك الرجل قائلاً:

- أنا ممكن أساعدك.. بس لو عرفت غرضك من الموضوع!

وافقت أن تخبره بعدما علمت أنه أحد أصدقاء فرح المقربين، شرط أن يبقى الأمر بينهما، وبالفعل وافق على إعطائها بيانات المشتركين في دورة فرح قبل استقالتها.



عادت نورسين لمنزلها، وعلامات الرضا تجتاح ملامحها؛ لشعورها أنها ستجرح في تغيير شيء ما، عل ذلك الشعور ينتقل لمن حولها، فينقلوه لمن حولهم وتظل الدائرة مستمرة. إن أردت التغيير فابدأ بنفسك.

غيرت ثيابها وبدأت بمشاهدة مقاطع الفيديو الخاصة برحيم التي أعطاها لها علي، وقد تفاجأت من براعته في الغناء والعزف على الجيتار، ورأت كذلك مقطع عبارة عن مجموعة من صور لوحات قام برسمها مجموعة على شكل مقطع فيديو، وكيف لموهبته أن تُفنى وقد كادت اللوحة أن تنطق

راغبة في الانطلاق أمام الملاء؛ مُعلنة عن وجود عالم آخر خفي بداخل روحه الصامتة! قامت نورسين بجمع المقطعين معاً ليشكلا مقطع واحد، وفي الوقت ذاته قامت بعرض الرسومات لبعض زملائها الجامعيين بشكل شخصي، وفور أن وصلتها ردودهم المليئة بالإعجاب والتشجيع قامت بتصوير الشاشة وضمت الصور إلى المقطع، وما أن انتهت حتى ذهبت لنافذة استخراج الفلاش من جهازها، ولكن شئ ما منعها من ذلك، وجدت بداخل الفلاش ملف باسم **dreaming control** لم تستطع منع فضولها؛ ففتحت الملف، وجدت حينها العديد من الأبحاث المتعلقة بالعديد من المصطلحات الطبية ولسبب ما أثار ذلك الملف دهشتها، لذا أسرع في الاتصال بعلي، وما أن جاوب حتى تساءلت قائلة:

- دكتور علي أنا كنت بتفرج على الفيديوهات بتاعت رحيم، وشوفت file في الفلاشة اسمه **dreaming control** وأعتقد إن حضرتك نقلته بالغلط.. مش كده؟

في تلك اللحظة سيطر القلق عليه، واجتاح التوتر مخارج أحرفه؛ فلا تكاد تفهم ما يقول، حاول علي الحد من توتره؛ فتنفس بهدوء وأردف بثبات مصطنع:

- اه ده بحث كان مطلوب مني أيام الكلية وكده

ازدادت ريبة نورسين تجاه حديثه وقالت مُتسائلة بلؤم:

- مش غريب إن حضرتك لسة محتفظ بيه؟

- أجابها مستهزئاً بسؤالها: طُب مش لعبة، وكل كلمة بنكتبها أثناء

الدراسة، هنحتاجها بعدها

■ حان دورك

- قالت مستنكرة: أفهم من كده إن حضرتك اللي كتبت كل كلمة فيه؟
غلب توتر علي هدوء المصطنع هذه المرة، فقال متحججًا:
- معلىش يا نورسين عندي جلسات كتير النهارده ومضطر أقفل معاكى
لم ينتظر لسماع إجابتها وكان قد أغلق بالفعل.. أسند ظهره إلى الكرسي
وأخذ نفس عميق وكأنه كان في سباق كتم النفس لساعات متواصلة. استدار
بكرسيه؛ وأمعن النظر لتلك اللوحة، وأخذ يفكر مالذي يجدر به أن يفعل؟
كعادته أخرج دفتره وبدأ بالكتابة:
- ماذا بعد؟، ما الذي سيحدث الآن؟، ترى كيف ستكون نهاية الطريق؟،
بل إن السؤال الأهم.. هل للطريق نهاية؟، أم أني صرت حبيس دوامة لن
تنتهي إلا بتدمير حياتي.. أهذه إشارة من الله أن أتوقف وأعترف لها
بالحقيقة.. فلا يوجد تفسير آخر غيره.. لقد وصل البحث يدها وأنا من
أوصله دون أدنى قصد مني.. أتظن حقًا أنها دون قصد؟، أم أن عقلي
الباطن تمكن مني؛ لاعتراضه على ما يفعله جسدي بموافقته عقلي؟
في تلك اللحظة اقتحم أحدهم المكتب فجأة، فقام علي بتخبئة الدفتر
واستدار؛ لتصبح وضعية الكرسي مقابل لباب المكتب، فوجد محمد أمامه
ويبدو أنه قد رآه وهو يخبئ دفتره بالفعل.
- نظر للون علي الباهت، وملامحه التي لا تدل أبدًا أنه سعيد بقدمه، وقال:
- بقى بالذمة مش عيب، دكتور نفسي عنده مشاكل نفسية؟
- بدأ علي يهدئ من روع ذاته، ثم قال: فإكر أول كلمة قالها لنا الدكتور
يا محمد؟، لم يجد منه رد× أفكرك أنا، قال لنا: أول قاعدة عشان تكون

طبيب نفسي، تصدق إن كلنا مرضى نفسيين، شكلك مكنتش بتذاكر وعديت بالكوسة

- نظر له مستهزئاً: بتواسي نفسك بـ إيه يا دكتور؟!

- بقولك إيه يا محمد، ما تريج نفسك وتجيب من الآخر، جاي هنا ليه؟

- جاي أسأل عن نورسين.. المعجزة اللي خلّتك تقلب عليا وعلى هدفنا،

هي والهه التيم بتاعها!

- كظم علي غضبه، وابتسم بهدوء: كل العصبية اللي إنت فيها دي

عشان وافقت أعمل التيم؟!

- قال وقد فلتت أعصابه وعلا صوته: العصبية اللي أنا فيها دي عشان

إنت عارف كويس خطورة إن المرضى يعرفوا اللي عملناه مع نورسين

- كان هاتف محمد يرن في تلك الأثناء ولكن صوت صراخه المرتفع، منع

ظهور صوت الهاتف-

- وطّي صوتك بدل ما تفضحنا كلنا.. وبعدين إنت قلقان من إيه؟، أنا

اللي معرفهم على نورسين وأكيد مجبتلهومش سيرة

- يا ابني هو إنت بجد بالغباء ده، المروض أنا أطمئن كده؟، نورسين

بتطلب من الناس يكونوا صريحين عشان يحلّوا مشاكل بعض ويبقوا صحاب،

عارف ده معناه إيه؟، أقولك أنا.. معناه إنها مسيرها تقول لهم السبب

الحقيقي اللي خلاها تفكر في الفكرة دي، شئت أم أبيت كلهم هيعرفوا كلها

مسألة وقت، ولو إنت عندك استعداد تخسر وظيفتك فأنا معنديش

- خفض علي رأسه قائلاً: وعشان كده بفكر أقول لها

- علاّ صوته مجدداً: إنت شارب حاجة ي... -قاطعه صوت اتصال من

■ حان دورك

هاتفه مجدداً، كان ينوي تجاهله مثلما فعل منذ قليل، لكن ليس بعد أن رأى اسم المتصل-

تغيرت ملامحه سريعاً و ذهب خارج المكتب دون قول كلمة، كان فعل غير مُبرر ل علي، ولكنه لم يكثر طالما خُصه من ضوضاء محمد.

خرج محمد من العيادة بأكملها وأجاب المتصل قائلاً:
- أيوة

- تحدثت بصوتها الأنثوي قائلة: كلمتك كثير مردتش

- معلى كنت بعمل حوار كده. اتصلتي ليه يا نورسين؟

-

(14)

خيوطٍ من شوك

إن أردت حياكة ثوب؛ عليك بتجهيز الخيوط، وإن كانت مُتشابكة بعضها البعض، ستقوم بفكّها.. لكن ماذا إذا كانت الخيوط مليئة بالأشواك.. كلما حاولت لمسها؛ زادتك جروحًا!

هل ستترك الخيط، وتتنازل عن ثوبك الجديد؟، أم أنك ستستمر وتُعرض يدك للتهلكة؟

عزيزي القارئ: أعلم أن العديد من التساؤلات تدور في ذهنك الآن، وكما أعلم ذلك، فعلي أن أعلمك أن القادم ليس بهيّن.. ولكن في النهاية أنت سيد القرار، إما أن تكمل القراءة مهما تفاعلت، أو أن تتوقف هنا، لكن عليك معرفة أن الاستمرار هو مفتاح أسئلتك.

مهما فكرت نورسين في حديث علي لا تجده مقنع على الإطلاق، ومهما حاولت ربط الخيوط، تؤول جميع محاولاتنا بالفشل، لذا لم يتبق لها سوى خيار واحد، أخرجت هاتفاها وبحثت عن رقمه حتى وجدته واتصلت به.. فلم تلقَ ردًا، كانت ترغب ألا تتصل مجددًا ولكن فضولها أقوى من أي رغبة؛ لذا عاودت الإتصال وعلى الرغم من طول انتظارها إلا أنها لقت إجابة منه هذه المرة:

- أيوة

- كلمتك كثير مردتش

■ حان دورك

- معلىش كنت بعمل حوار كده. اتصلتي ليه يا نورسين؟
- تعرف دكتور اسمه علي مسعود؟
- بتسألني ليه؟!
- ابتسمت: أنا كده عرفت الجواب، متشكرة جداً، اه بالمناسبة، دوري جاي امتي؟

- ضحك بلؤم: قريب، قريب أوي يا نورسين
بادر هو بإنهاء المكالمة.. لم تكن تعلم أنها ستُجيد تأدية دور الغافلة عمّا يحدث حولها جيداً لتلك الدرجة، ولم تكن تعلم أنهم جهلة لهذه الدرجة ليصدقوا ادعائها، فعلى الرغم من جهلها ببعض التفاصيل، إلا أنها أصبحت متيقنة أكثر من ذي قبل أن علي هو أحد المشاركين بتلك التجربة بطريقة ما، هو أيضاً لا يفكر سوى في ذاته تماماً كالجميع، والجميع كلمة تشمل نورسين.

جلست على الكرسي الموجود أمام مكتبها وعادت بذاكرتها لذلك اليوم، الذي قابلت فيه محمد.

Flashback: - استرجاع للأحداث

اللقاء الأول:

- كانت تجلس في أحد المقاهي تنظر حولها بشغف؛ مُنظرة وصوله، حتى جاء وألقى التحية ثم جلس:
- آسف أتأخرت عليك
 - لا أبداً، أنا اللي جيت بدري.. مدّت يدها بفلاش ده البحث اللي قولت لحضرتك عليه

- تمام، أنا شُفتُ الجزء اللي بعنيه ليا وحقيقي مقدرتشس ماجيش وأشوفك.. بس بحث زي ده ليه بتديهوني؟
- أنا مش محتاجة البحث دلوقتي، أنا محتجاه بعد التنفيذ.. وأنا مش هعرف أنفذه.. البحث محتاج إمكانيات وخبرات وتجارب بعيدة تماماً عن قُدرتي، وعشان كده دوّرت على حد ممكن يساعدي في ده، وملقتش أشهر من حضرتك.. د. محمد بسيوني الطبيب النفسي اللي شغله كله في مجال الأبحاث وتطوير علم النفس وأساليبه.
- نظر لها بلُوم وأخفض صوته: بس طبعاً إنتي عارفة إني مجرد ما هبدأ أشغل عليه مش هيبقى بتاعك؟
- وأنا زي ما قولت لحضرتك مش عيزاه.. بس ده بشرط؟
- اعتدل في جلسته وقال: أعرفه؟
- أكون واحدة من اللي هيتنفذ عليهم التجربة وأضمن إن حضرتك مش هتستخدمه غير في مجال العلاج
- مفيش مشكلة، أنا بالفعل هحتاج مجموعة مختلفة من الناس اللي هيتجرّب عليهم وأسجل استجاباتهم.. بس ده طبعاً بعد ما أطلع على تفاصيل البحث، وأحدد آلية التنفيذ وإذا كانت مفيش فيها خطورة.. بالنسبة للجزء الثاني إيه الضمان اللي يناسبك؟
- تمضي لي على ورقة إن في حال خالفت اتفارقنا، يُعتبر الاتفاق كله لاغى في مقابل إمضتي بتنازل عن البحث أوماً بالموافقة الشرط الثاني إني من حقي محكيش لحضرتك أي حاجة عن تجربتي.

- أوامأت برأسها ثم قالت: الحمد لله، بجاول أعمل كل حاجة تخلي الكُ
يصدق.. ماما هو أنا وحشة؟

- ضحكت حنان بشدة ثم أردفت: إنتي بتحاولي تحلي الوحش يا
نورسين!، أنا بس اللي طلباه منك متجيش على نفسك، حتى لو منجحتيش
كفاية إنك حاولتي.

- ابتسمت: أبقى بستسلم، وأنا مقتنعة إن دوري في الحياة دي عمره ما
هيكون الاستسلام

× × ×

دخلت سكرتيرة علي؛ لتخبره أن رحيم بالخارج وقد حانت جلسته؛
فسمح لها بإدخاله ثم أوقفها؛ يعاتبها على سماحها بدخول محمد دون
إذن مسبق منه، محذراً إياها من تكرار ما حدث، ثم طلب منها الانصراف
والسماح لرحيم بالدخول، فاستقبله علي بترحاب لا يخلو من الإنزعاج
قائلاً:

- اقعد يا رحيم اتفضل.. تشرب إيه؟، ولا أقولك أنا زهقت من المكتب،
تعالى هنروح كافيه

- طب إديني فرصة أقول رأيي!

- اعتبره أمر من الدكتور بتاعك

خرجا من المكتب، بعد أن تأكد علي أن رحيم هو آخر مريض لديه اليوم،
ثم اتجه إلى مطعم يعرفه جيداً وكان كليهما يشعران بالجوع؛ لذا طلب علي
وجبتين لهما مع المشروبات ثم عاد ليجلس:

- قولِي بقى إيه رأيك في فكرة الـ steam ؟
- أجب بعدم اكتر: عادي.. زي ما توقعت
- يعني معجبكش برضه؟
- مش حوار معجبنيش قد ما الموضوع محسوم بالنسبة لي، أنا عارف نفسي وفاهم إنت و... هي كان اسمها إيه؟
- هي مين؟ فِكّر قليلاً × قصدك نورسين
- اه هي.. فاهم قصدكوا كويس، يعني الجيتار، أدوات الرسم.. القعدة نفسها، كل حاجة ميتذلة أوي
- قال علي معترضاً: طب والله الموضوع عجبك، بس مكسوف تقول
- وهتكسف ليه يعني؟، دكتور علي إنت عارف إنني بعترك أخويا، وأكثر واحد فاهمني
- وعشان كده بقول إن الموضوع عجبك، صارح نفسك يا رحيم متبقاش
- قُضِل يا جدع.. إنت عارف كويس إنك فرحت لما شوفت الجيتار والذكريات الحلوة كلها رجعت تاني، بس مش قادر تقبل فكرة إن كمّ الاكتئاب اللي جواك ممكن حاجة تذوبه..
- يمكن يكون كلامك صح، بس أنا برضه لسة مش مستعد أرجع زي الأول تاني
- ومين قالك ترجع؟، هو سحر يا ابني من أول مرة عقدتك هتتفك!،
- فاكّر نفسك قاعد مع الشبخة خديجة المغربية!، بس أدينا بنحاول..
- صحيح تتوقع مين اللي كتبت لي عايزة أسمعك بتغني؟!،

- مش عارف.. ×أخذ وقتاً يُفكر× لأ عارف، نورسين
- جحظت عيناه: مين؟
- أصل هي الوحيدة اللي عارفة حكايتك، هيكون مين غيرها
- "نظر رحيم بعيداً وابتسم بخجل لا يليق بلحيته"
- إيه يا ابني، سرحت في إيه؟
- أجاب بارتباك: ولا حاجة، قولي صح كان شكلك متعصب النهارده
- وسمعتك بتزق مع علياء، في حاجة؟
- على فكرة إنت اللي المفروض تحكي مش أنا
- اعتبر الجلسة دي مش محسوبة، ها إيه اللي حصل؟
- حوار فاكس كده، بعيداً عن التفاصيل الموضوع له علاقة بـ نورسين
- نورسين؟، مش ملاحظ إن اسمها اكرر كثير في القعدة دي!
- لأ ملاحظ، فيها حاجة غريبة يا أخي، تحسها هادية بس هدوء ما قبل
- العاصفة فاهمني؟
- أكيد مش فاهم.. بس مش موضوعنا، إيه اللي يخليها سبب عصبيتك؟
- لا هي مش سبب مباشر، في رابط بيتنا لوهي عرفته على الأغلب
- هتضايق وأنا مش عايز ده يحصل
- عقد حاجبيه وهو يقول: ولو حصل يعني.. ده يفرق معاك في إيه؟
- مش عارف برضه ×تتهد× ممكن نقول إنني بحب شخصيتها وروحها
- ومش عايز حاجة تأثر عليهم بسببي -وأضاف محدثاً نفسه: كفاية اللي
- حصل لها بالفعل -

■ حان دورك

- تغيّرت ملامح رحيم فوراً وقال بغضب: إيه اللي عاجبك فيها؟، هي دي تعجب حد أصلاً!

- ضحك علي مستهزئاً بانفعاله: براحة يا ابني في إيه، وبعدين البنّت حلوة يعني مالك مصدوم كده ليه؟ .. عجبي إصرارها وشخصيتها على بعضها.

جاء النادل ووضع الطعام

- مش مصدوم أنا عادي أهو

- ده منظر واحد عادي؟

- بقولك إيه كل وإنت ساكت وخلص

قررت نورسين أن تكمل ما بدأت لأجله، وتتجاهل أي مشاعر سلبية يمكن أن تشكل عائقاً في طريقها، ستعمل جاهدة على مساعدة فريقها، حتى لا تتكرر المأساة التي شاهدها مع ضحايا جدد، وحينئذٍ ستمكن من العثور على ذاتها.. أمله أن تنجح بنجاحهم، لربما يكون العالم بانتظارها ليصبح أفضل، ولما لا؟

التغيير بحاجة إلى خطوة.. فقط خطوة قادرة على إحداث المعجزات، وأما الخطوة فهي بحاجة إلى دفعة، وتلك الدفعة لا تأتي إلا بعد السقوط.

(15)

وهل لأعمى أن يتوقف عن السير لأن الإشارة حمراء!

الحياة ما هي إلا فيلم قصير، ولكلاً منّا دوره، وصاحب الحظ هو من يُدرك ماهية دوره والوقت المناسب لتأديته، ويتصرف على أساسه، حتى تحين النهاية فيُحاسب كل شخص على الدور الذي اختاره.. أجل فالأدوار في الحياة بعكس السينما أنت من تختار دورك وليس المخرج، لذا فور أن تجد دورك المثالي والصحيح سر فيه دون توقف، وإن قابلتك الملهيات والمغريات فتصرف كما الأعمى، ولا تراها، حتى وإن سقطت؛ فإن السقوط الذي يتبعه إستقامة، خير من إستقامة يتبعها إعوجاج.

بعد عدة لقاءات تم عقدها بينهم، اجتمعوا فيها وتبادلوا أطراف الحديث، ركزت نورسين على شخصياتهم؛ لتتمكن من التفكير في حل يناسبهم وعلى الرغم من كم المحاولات الطائفة والمجهود الهائل الذي بذلته إلا أنها في النهاية تمكنت من تحقيق ما سعت إليه بمساعدة علي، مُتجاهلة ما لاقته من البعض من رفض أو سخرية أو حتى لامبالاة.

مرّ أسبوع على نورسين كالبرق؛ انشغلت في التواصل مع عملاء فرح قبل استقالتها، وطلبت منهم تسجيل مقاطع مرئية لهم؛ ليخبروها عن التغيير الذي أحدثته في حياتهم بفضل الله، وقامت بإعداد مقطع يشمل الجميع، وفي الوقت ذاته كانت تبحث في مواقع التواصل الإجتماعي على

■ حان دورك

بعض الحسابات المؤيدة لـ يوسف وتمكنت من الوصول لإحدى الفتيات التي عرفها يوسف يوماً، وتواصلت معها، وبعدما شرحت لها نورسين غرضها من محادثتها، أخبرتها الفتاة بأنها لا تُمانع أن تخبر العامة بكذب صديقه، وصدق يوسف.. ومنها تمكنت من معرفة هوية الفتاة التي أحبها وبعد بحث طويل استطاعت العثور على حسابها الشخصي ولكن مما رآته، فتلك الفتاة لم تعد تكثرث لأمر يوسف؛ فقد تزوجت ويبدو أنها سعيدة وراضية، هنا شعرت نورسين بالعجز، فكيف ستُصارع يوسف بحقيقة الأمر، أو ربما هو على دراية بزواجها..

فتحت ندى -أخت نورسين- باب غرفتها تُخبرها بأن تستعد؛ كي يذهبن لإنتقاء بعض الأنتيكات؛ ليكتمل ديكور منزلها، ورافقتهم في ذلك "وَنَس" فقد اقتربت من نورسين كثيراً الفترة السابقة، وهي التي ساعدتهم في العثور على محلات الأنتيكات والسائير والعديد من التفاصيل الخاصة بتجهيز المنازل؛ بسبب تجربتها مع قريبة لها.

بعد أن تقابلن أمام المحل المقصود، وعرفتهم نورسين على بعضهن ألفت ندى بعض عبارات الامتنان على مسامح وَنَس؛ لمجودها ومساعدتها لهم، وبعد ذلك دخلوا المحل فانشغلت ندى بمشاهدة الأنتيكات، حينها مالت نورسين على أذن وَنَس قائلة:

- برضه لبستي النقاب؟

- مش بحب نظراتهم ليا يا نور

- تولع نظراتهم.. نسييتي كلام يوسف؟، نادتهم ندى؛ لمشاورتهم شوية و

ياسين هيعدي ياخذ ندى عشان يعملوا كام حاجة في الشقة، وقتها هنتكلم كثير.. بعد ساعات من "اللف" على الأسواق، تمكنوا من العثور على ما يناسب ديكور شقتها؛ بناءً على ذوقها، وبعد ذلك أتى ياسين وأخذ ندى، وذهبت ونس برفقة نورسين ليتناولن مشروب ويتحدثن معاً:

- ها بقى لسة مش مقتنعة بكلامي؟

- مش عارفة يا نور، أنا مقتنعة طول ما هو كلام.. بس وقت التنفيذ

مش بقدر

- ممكن أسألك سؤال؟، × أو مأت ونس بالموافقة× ليه بتداري في النقاب،

مش بتداري العلامات بيمك أب مثلاً؟!

- مش عايزة أحس إني بخدع حد.. ولا حتى نفسي، أنا بس عايزة أتجنب

أي نظرة ممكن تجرحني

- أخفضت رأسها وقالت: فهمتك.. مش ناوية تحكي لي موضوع يوسف

- عايزة تعريفي؟

- جداً!!!!

- عرفته من السوشيال ميديا، وكنت بحب الفيديوهات بتاعته جداً،

بيعرف يتكلم، لأ ويقنعك برأيه.. بحسه واقعي أوي، بيفتح الكاميرا ويتكلم،

مش مهم بقى لابس شيك ولا لأ، مسرح شعره ولا منكوش.. على طبيعته،

حتى لما حد بينتقده كان بيرد عليه ردود محترمة تكسفه، كنت بحب أتابعه..

لحد ما عرفت أنه أصلاً مرتبط، وقتها حسيت بغيرة. هتسأليني بصفتي

مين؟، هقولك معرفش، لأنني فعلاً معرفش

حان دورك ■

نظرت لها نورسين بأسفل عينيها وهي تُخفض رأسها، فأكملت ونس:
- عارضة وبستعبط.. كنت حاسة بمشاعر ناحيته، روح عملت له بلوك
وقللت كلامي مع صحابي اللي متابعيه عشان سيرته متجيش قدامي،
مكنتش عايضة أحب واحد مرتبط.. مش حابة أكون طرف ثالث في علاقة
مكونة من طرفين!

- نظرت نورسين بسعادة بالغة وقالت: ونس.. اتحلّت
- هي إيه دي اللي اتحلّت؟
- يوسف انفصل عنها خلاص
- تنهدت: بس لسة بيحبها، ومسيرهم يرجعوا
- لأ هي نسيته واتجوزت
- إيه؟، بتكلمي بجد! ×هدأت من صدمتها× حتى لوهي اتجوزت هتفرق
في إيه؟!

- تجاهلت ما قالته: إنتي علاج يوسف.. إنتي الوحيدة اللي نظرتك له متغيرتش!
- أنا مش فاهمة حاجة..
- يلا نروح دلوقتي وهفهمك في السكة
وبالفعل أخبرتها نورسين بما تُفكر فيه وطلبت مساعدتها، ولم تتردد
ونس في الموافقة، وما أن وصلت نورسين منزلها حتى تواصلت مع علي؛
لتخبره ما تنوي فعله، وقد لاقته منه تشجيع، فقامت بتحديد لقاء جديد
لهم في اليوم التالي بعدما تأكدت أنه يناسب الجميع.

في اليوم التالي، استيقظت نورسين وبدأت بالاستعداد لمقابلتهم، كانت تشعر بتوتر شديد من ردود أفعالهم، ولكنها لا ترغب في ضياع يوماً واحداً وهم في ذلك البؤس، وينطبق الحال عليها. وصلت لموقعهم فلم تجد سوى يوسف وعلي بالداخل، ألقى التحية ودخلت:

- قالت نورسين بحرج: الحمد لله إن علي وصل معاك، عشان متستناش

في الشارع

نهض يوسف من على كرسيه وقال موجهاً حديثه لـ علي:

- يلا احنا بقى

- أجابه علي بتساؤل: يلا على فين؟

- عطشان أوي، تعالى نجيب مياه

- ما في مياه هنا يا ابني

- شوف سبحان الله جوعت فجأة، تعالى بس نجيب حاجة ناكلها من

الكشك اللي على ناصية الشارع ده

جره يوسف خارج المبنى، وما أن ابتعدا بمسافة كافية، حتى قال علي بانفعال:

- مش فاهم يعني، حبكت معاك تاكل دلوقتي؟

- ما تفتح دماغك يا دوك.. مينفعش نبقى قاعدين وهي موجودة في

مكان مقفول، مش شايف كانت مخرجة ازاي؟، وأكد الوضع مكنش مريح ليها

- ااه مجتتش على بالي دي

- مهني لازم متجيش، إنت بحكم شغلك لازم تقعد مع بنات وولاد

لواحدكم

■ حان دورك

- ههههههه طلعت بتفهم يا يوسف، × استغل علي كونهما بمفردهما × بقولك صحيح في حوار كده عايز أكلّمك فيه
- لا بقولك إيه احنا مش في جلسة دلوقتي
- يا سيدي اعتبر إنك بتدردش مع واحد صاحبك
- ماشي.. اتكلم
- لسة بتفكر فيها؟
- لم يفكر وقال: اه بس مش عشان بحبها
- وضح؟
- يعني في الأول كنت بفكر فيها عشان وحشاني.. زعلان على اللي حصل لي وكان سبب نبعد، بس دلوقتي بقيت بفكر فيها عشان أثبت لنفسي إن خسارتها كانت لمصلحتي
- ليه بتقول كده؟
- هي اختارت الطريق الأسهل، مفكرتش حتى قد إيه أنا محتاج لها، بالرغم من إنها عارفة الحقيقة ومن قبل ما نقرأ الفاتحة حكيت لها عن كل بنت عرفتها، وربنا يشهد إنني مفكرتش في غيرها وأنا معاها ولا حتى بعد ما سيبتها..
- ولما الحكاية كده، ليه لسة الموضوع مآثر فيك؟
- عشان حتى لو نسيتها، صعب أنسى كسرة قلبي لما ملقيتهاش جنبي بسبب حاجة ما عادلش ذنب فيها، أنا مش زعلان عليها يا دكتور أنا زعلان على نفسي اللي اتخلت عنها ببساطة ومحاولتش حتى تعارض أبوها.. تههد

مش معنى إني حبيبها إنها الاختيار الصح ليا، وبعدين هي اتجوزت وشافت حياتها، أبقى أهبل بقى لو وقفت حياتي عشانها لحظة واحدة!
 - ده إيه الكلام الحلو ده، ×ضحكا معاً× تعرف ربنا ده له حكم مبناخدش بالننا منها غير في الآخر.. هي ظهرت في حياتك عشان تبعك عن طريق حرام، والمشكلة دي حصلت لك عشان تثبت لك إنها مش مناسبة ليك، فبالتالي هي ساعدتك تتغير للأحسن عشان البنت اللي تستاهلك.. مين كان يصدق إن يوسف يطلع يقعد في الشارع عشان ميبقاش مع بنت في مكان مقفول لواحدهم!

- أجابه يوسف ضاحكاً: شوف سبحان الله!
 كُن على إقتناع تام أن ما يجري في حياتك ليس بمحض الصدفة، وأن الأحداث البسيطة ستكون ذا أثر عظيم يوماً ما، فمهما رأيتها تضيق إعلم أن الفرج قريب.. قالها الجميع وسنقولها مجدداً.

في تلك الأثناء كانت تجلس نورسين في الإستوديو الخاص بهم، وتعاتب ونس في الهاتف؛ على تأخرها وتعرضها لموقف كهذا؛ فقد فهمت سبب خروج يوسف برفقة علي متحججاً بالجوع، ولم تمر دقائق حتى وصلت فرح ومعها رحيم، دخلوا وألقوا التحية على بعضهم البعض، ثم قالت نورسين متسائلة:
 - إنتوا جاينين مع بعض؟

- أجابتها فرح: لا اتقابلنا على السلم، ×سكت الجميع قليلاً صحيح، بقالي كثير عايزة أعمل search عن معنى إسمك وبنسى.. قوليلي بقى معناه إيه؟

حانَ دورك ■

- قاطعهم رحيم متجاهلاً حديثهم: هو دكتور علي لسة مجاش؟
نظرت الفتاتان لبعضهن بتعجب من فعله، فأجابته نورسين أنه ذهب
برفقة يوسف ليشتريا شئ، نهض من على الكرسي متجهًا للباب؛ ليلحق
بهما، وقيل أن يخرج استدار لهن، وقال:

- نورسين يعني نور القمر×ورحل×
ومع خروجه قابلته ونس ولم تكن ترتدي النقاب هذه المرة، فور أن دخلت
المكتب قفزت نورسين من السعادة:

- أخيراً سمعتي كلامي؟
- كنت محتاجة حد يشجعني، غير أهلي اللي غصب عنهم هيعملوا ده..
- قالت فرح: أنا فخورة بيكي أوي
وما الفخر في نزع النقاب!، ربما يراودك ذلك السؤال الآن؛ كي أجيبك
قائلة: الفخر لا يكمن في نزعها، بل هو نزع الساتر الذي وضعه أحدهم بينه
وبين الحياة؛ خوفًا من مواجهتها.

- أجابتها ونس: ربنا يخليكي.. شكرًا يا نورسين
في تلك اللحظة عاد الشباب من الخارج، وفور أن رأى يوسف، ونس حتى
نظر لها بسعادة تبعثها حزن، لم تفهم ونس سببه. وبعد أن هدا الجميع..
بدأت نورسين تنفيذ خطتها التي سعت لها مُطولًا:

- كنت بقول لنفسي إن لسة بدري على الخطوة دي، ولازم ناخذ وقت
أكثر، وفي نفس اللحظة رديت على نفسي إن مينفعش نضيع يوم واحد كمان
في الحزن أو الخوف أو الكسرة.. اللي باقي مش كتير عشان نستغنى عنه

بنفس راضية.. اللي هيتعرض قدامكم ده حصل بمساعدة دكتور علي، هنبداً مع كوتش فرح، اللي بتقول إنها بتبني اللي حواليتها.. الحقيقة إني تواصلت مع اللي حواليتها دول ووصلني كلام غير ده!

ثم قامت بتشغيل العرض على الشاشة وكان عبارة عن مقاطع لمجموعة من الشباب كلاً منهم يتحدث عن تجربته في التعامل مع فرح، واستمرت المقاطع في التنقل من شكر موجه لها وآخر اشتياق ومرة عتاب على اعتراضها.. وفي نهاية المقطع ظهرت امرأة كبيرة في السن يبدو أن أحدهم يقوم بتصويرها، فبدأت حديثها قائلة: شغلتي الكاميرا يا سهيلة؟، طيب، من قيمة كام يوم جاتلي بنت ذوق أوي واتكلمت معايا وقالت لي إن في بنت حياتها وقفت بعد حادثة ابني، قال إيه بتقول إنها السبب!، في الأول عيطت عشان افكرت اللي حصل ل ابني، بس بعدها اتعصبت ودمي فار، هو يعني البت دي عيلة عشان تقول إنها السبب!، ما كله مكتوب عند اللي خلقنا، أنا آه قلبي واجعني على ضنايا بس عارفة إن ده نصيب وعارفة إن اللي ربنا كاتبه هيحصل بأي شكل.. ابني حقه هيرجع مهو أصل ربنا اسمه العدل!، البنوتة الجميلة اللي جت لي قالت لي إن ممكن كلامي يساعد البنوتة تتحسن، قولت وماله؟، ولو في أيدي أساعد أتأخر ليه؟، أوعي يا بنتي تفتكري إني بكرهك أو حاقدة عليكي، أبداً والله.. ربنا يعلم إني راضية بقضاه وعندي يقين إن ربنا هيشفيه ويعوضه خير باذن الله.

انتهى المقطع، وبدأت دموع فرح بالانهمار كما لو لم تبكي من قبل، عانقتها ونس وربت على ظهرها برفق، كان المقطع كافي لجعل الجميع

حان دورك ■

يتأثرون، وعلى الرغم من أنها ليست المرة الأولى التي تشاهده نورسين، ولكنها أيضاً لم تتمكن من حبس دموعها.

بعد عدة دقائق هدأ فيها الجميع، أكملت نورسين:

- شكلنا هنعيط كثير النهارده، نكمل مع ثاني شخص: رحيم.. دائماً بنشوف ناس موهوبين في حاجات ويحاولوا يشهروا موهبتهم، لكن دي كانت المرة الأولى اللي أشوف شخص ناجح بيدفن موهبته!

قامت بتشغيل الفيديو، الذي ظهر فيه رحيم يعزف ويُغني، وآخر يحاول رسم والدته، وآخرهم يلهو مع عائلته. كان الجميع يشاهد المقطع وهم مذهولون فكيف لذلك الشاب الذي قلّمَا يتحدث أن يكون بذلك الشغَب والحركة!، وبعد ذلك بدأت نورسين بعرض صور تشمل آراء البعض في صوته ورسمه كانت كلمات كثيرة جميعها تؤوّل معنى واحد ×استمر× وتراقب تعابير رحيم أثناء قراءته لأرائهم؛ رأت في عينيه غضباً أخافها، وجدته ينهض ليرحل فشغلت سريعاً مقطع آخر لرجل كان صوته قادر على إيقاف رحيم وجذبه ليُكمل المقطع، بدأ الرجل حديثه: رحيم، ابني الكبير.. غلّطت في حق حلمك زمان ولسة بدفع تمن الغلطة دي لحد دلوقت، مكنتش فاكر إن الغنا يعنيك لدرجة كبيرة، كنت شايفه مضيعة وقت.. كنت غلّط، بس إنت برضه غلّطت!، محاولتش تقنعني برأيك واخترت العند والخصام، ولما مجيش نتيجة لجأت للانتحار!، عارف إنك كنت بتمر بفترة صعبة مش على قد عناد مع أهلك، بس كان ممكن نتجاوز الفترة دي من البداية بإننا نتكلم.. إنت متعرفش قد إيه محاولات انتحارك كانت بتكسرنا، الحياة

من غيرك يا ابني مش حياة، لو شايف إن راحتك في موتك تبقى غلطان، غلطان في حق ربك ودينك ونفسك وأهلك.. أهلك اللي إنت عندهم بالدنيا كلها، ومع ذلك بشكرك إنك لسة حي وشايفها إشارة من ربنا إن لسة في أمل نصلح اللي اتكسر زمان.. وحشني صوتك وإنت بتغني سيرة الحب.. هسنتاك نغنيها أنا وإنت!

انتهى الفيديو وبقي الجميع صامتون، حتى كسر صمتهم صوت رحيم الغاضب وهو يقول:

- إنتي مين سمح لك تعرضي فيديو ده؟، ومين أصلاً إداكي الحق تكلمي أبويا!

- قاطعه علي: أنا اللي كلمته وطلبت منه يصور الفيديو، نور مغلطتش - صح أنا اللي غلطت إنني قبلت آجي المكان ده، نظر لنورسين بحنق شديد أتمنى تكوني مبسوطه

وخرج بغضب يكفي بلدة محتلة بأكملها، توتر الجو؛ فأشار لها علي أن تكمل كأن لم يحدث شئ حاولت نورسين تجاهل ما حدث، والبدء من جديد لكن يوسف قاطعها معترضاً:

- المفروض إننا هنا صحاب، وتجاهل رحيم مش بيدل على ده إطلاقاً!
- أجابه علي: احنا مش بنتجاهله، أنا عارف رحيم كويس واللي حصل ده لصالحه ومش هيضره، ولو أنا شايف إن وجودنا هيحسن حاجة مكنتش قولت لها تكمل.. لأنني عارف كويس أوي إن رحيم في اللحظة دي محتاج يبقى لواحد، كملني يا نور

■ حان دورك

- أنا من رأي ننهي القعدة على كده، واضح إن الكل مشدود

- ردّ بغضب: كملّي يا نور..

- تهتدت ثم قالت: يوسف، الشخص الوحيد هنا اللي بيعاني من مشكلة

ملهاش حل؛ لأنها مش فيه، هي في الناس، اللي لوقعدنا العمر كله نحاول،

برضه مش هنغيرهم.. الحقيقة مش هنحتاج عُمر ولا حاجة.

قامت بتشغيل مقطع للفتاة التي قابلتها × إحدى الفتيات التي عرفها

يوسف سابقاً ×، كان الفيديو مأخوذ من بث مباشر على الفيسبوك، قامت

فيه الفتاة بإثبات كذب ما انتشر عن يوسف، حيث عرضت صور محادثاتها

مع صديقته الذي أرسل لها " هو يستاهل أنه يتفهم غلط.. عمل فيها شيخ

ونسي ماضيه الأسود وفاكر نفسه تاب، خليه يتحمل " ووضّحت لهم تواريخ

التقاط صورهِ مع الفتيات وكانت جميعها تواريخ قديمة، ومن بعد ذلك البث

ظهر ×هاشاج× على جميع مواقع التواصل الاجتماعي يُطالب بعودة يوسف

مرة أخرى، وبعده قامت نورسين بعرض مجموعة من صفحات المعجبين

التي تحمل اسمه، والتي لاتزال تدعمه وترجو عودته.. وبعد انتهاء الفيديو

قالت نورسين:

- الناس اللي كرهوك بسبب غلطة عملتها زمان، رجعوا يحبوك

ومستنيينك.. والبنت اللي إنت زعلت على فراقها اتجوزت ومبسوطة، وأنا

عندي يقين إنك على علم بده، الناس فترات يا يوسف وكون إنك عرفت ده

يبقى متتأثرش بوجودهم أو غيابهم مش تمنع التواصل معاهم تماماً!

- أجابها يوسف: يمكن تكوني صح، ومقدّر جهودك وجهود دكتور علي،

بس أنا إيه اللي يخيلني أقرب من حد أنا عارف أنه هيمشي أيًا كان السبب؟
- رد علي بابتسامة: لأن هي دي طبيعة الحياة.. ربنا لما خلق آدم، خلق له حواء عشان الحياة تستمر!

قاطعتهم ونس، و وقفت بقرب نورسين، ثم بدأت الحديث قائلة:
- كل اللي هنا واجهوا مشاكلهم النهارده، لكن أنا واجهتها قبلكم لما عرفت نور وبقينا صحاب في فترة قليلة، ويمكن ده لأنني كنت محتاجة حد جديد يدخل حياتي، مقدرش أقول يدخل لأنني كنت قافلة الباب.. اممم ممكن استبدالها بـ يخترق!، نورسين اخترقت حياتي، وصارحتني بالحقيقة اللي كل الناس بتحاول متبينهاش، قالت لي: آه إنتي مش طبيعية زينا.. إنتي مميزة، وأنا دلوقتي صدقت ده، أنا مختلفة عنكم وعمر الاختلاف ما كان عيب، بالعكس ده ميزة.. مقدرش أقول إنني مش بتمنى إن البقع دي تروح، بس لو مراحتش مش هكرهها.. واسمحو لي أعلق على كلام يوسف، إنت قولت إنك هتجنب البشر عشان هما مش دايمين!، معاك حق هما مش بيدوموا، بس بيساعدونا، كل شخص بيعدي جنبك في الشارع له أثر في حياتك لكن في الأغلب إنت مش هتاخذ بالك.. نورسين ساعدتني أحب نفسي وقيل منها إنت!، إنت مدومتش في حياتي، في الحقيقة إنت مدخلت حياتي أصلاً بس سببت أثر بسيط فيها، لما بعدت عن السوشيال ميديا، اختفى.. وبمجرد ما نورسين ظهرت رجعلي تاني، البشر بيظهروا في حياة بعض عشان يكملوا اللي قبلهم سابوه ناقص، وزي ما فيه ناس كتير رأيهم اتغير فيك بسبب سوء تفاهم حصل، في ناس حواليك برضه فضلوا شايفينك بنفس صورتك الأولى ومفيش حاجة اتغيرت جواهم ليك!

■ حان دورك

- لا ثواني، أنا ساعدتك ازايا؟
- شوفتك في تجمع كنت عامله واتجرات وكلمتك، وكنت الوحيد اللي يتكلم معايا من غير ما عينه تفضل رايحة جاية على شكلي، وقتها فهمت، أنا شكلي مش وحش، هما اللي عنيهم مش بتشوف الحلو.
- تدخل علي: الحقيقة يا شباب إن المكان ده عمل حاجة العلاج النفسي مقدرش يعملها ×نظر الجميع باهتمام× أثبت إن العلاقات قوة، مهما بان العكس.. زي ما في علاقة بتهد، في علاقة بتبني.. ومفيش واحد هيفضل طول عمره يهد ولا يفضل طول عمره بيني. لازم يجرب الأولاني عشان يعمل الثاني! على الرغم من خوف نورسين من مواجعتهم، إلا أن اختيارها كان في محلّه، فالجميع لا يرغب في أن يكمل حياته منطفيئ لكنه كان بانتظار من يذكره أنه يُضئ.
- ألقوا التحية على بعضهم البعض؛ استعدادًا للرحيل، فأوقف يوسف، ونس طالبًا التحدث معها على انفراد:
- نعم
- شكرًا
- على إيه؟
- إنك حسستيني إني مُفيد وإن رأيك فيا متغيرش زيهم، وإنك قررتي تحبّي نفسك وتتجاهلي الناس
- أنا اللي بشكرك؛ إنك كنت أول واحد ميحسسنيش إن فيا حاجة غلط
- ابترسم وقال: أكيد هنتقابل تاني.. التيم ده بدايته الحقيقية من النهاردة، سلام

التفت ليرحل، فأوقفته ونس:

- يوسف، عاد لها مجدداً لما شوفتني النهارده، ليه حسيت إنك اتضايقت؟

- اتبسّطت إنك قلعتي النقب.. فزعلت

ختم حوارهما بجملته الأخيرة ورحل، وودّعت هي الفتايات ثم سارت في طريقها. وبقي علي يقف مع نورسين وفرح في الشارع وهنّ ينتظران سائق فرح، وفي تلك الأثناء شكرتهم فرح على ما بذلوه من مجهود وطاقه لمساعدتهم، ثم وصل السائق الذي طلبته فرح، فعانقت نورسين ورحلت. وبعدها استقلت نورسين سيارة أجرة، بعدما قابلت عرض علي أن يقلّها بالرفض.

يوم مليء بالأحداث، وكانت راضية عن استجابتهم جميعاً باستثناء رحيم.. الذي شعرت تجاهه أنها لم تساعد، بل زادت جرحه عمقاً.



(16)

الجميع بحاجة إلى دفعة

كانت فكرة نورسين كطوق نجاة بالنسبة للجميع.. باستثناء أحدهم. عادت فرح لعملها، وكانت محاضرتها الأولى عن خطورة لَوَم النفس أو ما يسمى بـ جلد الذات، وأما يوسف فبدأ العمل في مكتب محاماة وقرر عدم العودة لبرامج التواصل الاجتماعي؛ ذلك العالم المملئ بالخُبث الذي ينتقل لجسد من ينضم له فيصبح أحدهم، وبالنسبة لـ وُسن فقد عادت لتُكمل دراستها، ولأصدقكم القول لازالت تتعرض لنظراتهم الجارحة ولكنها لم تعد تكثرث بالقدر السابق، بل تعرفت على أشخاص جُدد، كانت فترة تحوُّل في حياة الجميع، وعن نورسين فقد عادت للدراسة بعد انقطاعها؛ بسبب الحادث، ولازال فكرها معلق بما تم تسجيله على هاتفها، فما كُتب لم يراه سواها، وهي لم تقوم بكتابته.. إذًا فمن الفاعل؟

لازالوا يجتمعوا سويًا بل وأكثر من السابق، كان الأمر غريب لنورسين لكنها أحبته.. فهناك أشخاص لا يحتاجون منك سوى أن تفتح قلبك؛ ليدخلوه ويستقروا هم فيه.

وأما عن رحيم فلم يعد على تواصل معهم منذ اللقاء الأخير، حتى أنه لم يعد يتردد على عيادة علي كالسابق، ورغم محاولات نورسين الكثيرة في التواصل معه إلا أنها فشلت جميعها.. بحثت عنه على مواقع التواصل الاجتماعي، وقد عثرت عليه لكنه لم يكن من المهتمين بها؛ فأخر ما قام

بنشره كان عام ٢٠١٦.. أحببت الأمر؛ من النادر في عصرنا هذا أن تجد من يُهمّش مواقع التواصل.

بالنسبة لـ علي فكان تطور حالاتهم بالنسبة له إنجاز يستحق أن يكافأ لأجله؛ فأخذ إجازة من العمل لمدة ثلاثة أيام.. على الرغم من أن الإنجاز الحقيقي يعود لنورسين، لكن ذلك لا يمنع أنه أدّى دور كبير.

أعد كوب من الشاي بالنعناع ثم قام بتشغيل أغنية لطالما سمعها، لكنها المرة الأولى التي يسمعها بذلك الاندماج؛ نظراً لتقاربها الشديد من الموقف.

"أشكر جروح من غيرها ما كنت زماني في مكاني
عجبي على نهاية طريق يبدأ طريق ثاني"

بدأ بإرتداء ملبسه استعداداً للذهاب إلى حفل زفاف ندى - أخت نورسين - فقد دعتهم جميعاً للحفل، وبالتأكيد لن يرفض دعوتها، وقف أمام المرأة يعدّل ربطة عنقه، وما أن انتهى حتى نظر لانعكاسه، يفكر، ما الذي سيحدث حينما يخبرها بحقيقة ما رآته بل ما عانتها؟، هل ستغض أم أن الغضران سيبيبت احتمال بعيد المنال حينها!، طرد جميع الأفكار من رأسه ثم انتهى من تعديل هيأته سريعاً، واتجه إلى الحفل.

في الناحية الأخرى، كانت نورسين برفقة ندى في منزلهم؛ فقد رفضت أن تجلس في غرفة تابعة للقاعة؛ ظناً منها أن الأفضل هو توثيق لحظات تجهيزها كعروس في بيتها الذي وثق جميع ذكريات طفولتها.. شعرت نورسين وكأنها تراها للمرة الأولى، لم تظن يوماً أن أختها ستكون بذلك

ذهب الجميع إلى القاعة؛ استعداداً لزفة العروس، وحينها بدأ الجميع بالقدوم، ومنهم علي ويوسف وأيضاً فرح، لذا ذهبت نورسين لإلقاء التحية، فقابلتها فرح بالثناء على مظهرها، ولم تكن فرح تبالغ؛ فقد كانت نورسين جميلة بشكل مميز في ذلك اليوم، فستانها الأزرق الذي أظهر انحناءات جسدها بشكل أنثوي غير مبالغ به، والذي ناسب لونه، بشرتها بطريقة مثالية. وبعد أن هنا الجميع نورسين متمنين العُقبه لها، قال يوسف موجهاً حديثه لونس:

- عايزك لحظة

رافقته بعيداً عن ازدحام القاعة:

- عيب أوي نمشي والناس واقفة كده

- مقولتليش إنك هتلبسيه!

- عادي كنت عيذاها تبقى مفاجأة..

- أحلى مفاجأة في الدنيا

ابتسمت بخجل، ثم تركته؛ عائدة للقاعة، فلحق بها هو الآخر.

استمرت طقوس الزفاف بطريقة مثالية وجميلة، حتى جاء أحدهم

للطاولة التي جلست عليها نورسين وقاطعها، التفتت فوجدت أنه رحيم:

- ألف مبروك

- مكنتش متوقعة إنك هتيجي!

- مش إنتي بعثيلي مسدج على الفيس؟، يبقى كان لازم آجي

- متوقعتش تشوفها.. على العموم نورت

- أنا آسف على كلامي في آخر مرة

ابتسمت له نورسين، ثم عادت لتجلس برفقة أصدقائها. كانت سعيدة بمجيئه أو على الأحرى سعيدة برؤيته، لكنها لا تعلم ما الذي يعنيه حضوره اليوم.. هل تصالح مع ذاته وقرر العودة للحياة، أم أنه جاء ليعتذر ثم يعود لصدفته وينطوي على ذاته غير أبه بالعالم المحيط.

بعد دقيقتين بدأت أغنية هادئة ليبدأ العروسان بالرقص على نغماتها، بدا المشهد مألوف، حتى ظهر المغني على المسرح، كان رحيم؛ حينها تحول المشهد المألوف، لعرض خاص مقدّم إلى نورسين. لازل يملك تلك النبوة المميزة في صوته منذ الصغر، بل أصبحت أفضل من السابق!

كانت أغنية اعتادت على سماعها ويبدو أن أحدهم قام بتجديدها اليوم، الجميع يستمع إليه وهم في غاية الابتهاج، خاصة من يعلم سر رحيم مع الغناء.

انتهى الزفاف، وذهبت ندى إلى بيت زوجها لبدء حياة جديدة، وعاد الجميع لمنازلهم.. انتهى الحفل وبقي صوت غنائه يتردد في أذنها بلا نهاية!

"نفسي أكونك كل حاجة، وكل حلم بتناديه

كل كلمة بتقولها، كل إحساس حاسة بيه

ذكرياتنا الحلوة تكثر، نفسي وإنتي معايا تكبر

نتسند على بعض يومها وتضحكيلي الضحكة دي"

لم تتمكن من منع ذاتها من محادثته، ففتحت هاتفها وكتبت له: "ضفت

جو جميل أوي النهاردة، قدرت تعمل ده ازاي؟"، أرسلتها ومن شدة إرهاقها خلدت للنوم.

وما أن استيقظت حتى وجدت رسالتين، واحدة من علي والأخرى من رحيم.. فتحت رسالة رحيم بشغف وبدأت بقراءتها: "لأول مرة من كثير أوي أبقى عايز أفرح حد.. " وقد فعل؛ فرسالة واحدة منه جعلتها تتفزز من السعادة، على الأغلب هولم يُعد لحياته بشكل كامل، ولكنه على الأقل أقدم على الخطوة الأولى وهي الأصعب دائماً.. فتحت رسالة علي وقراءتها: "عايز أشوفك ضروري.. ينفع نتقابل؟"، أرسلت له نورسين: "ليه؟".

في تلك اللحظة كان علي يتناول الفطور، حينها أتته رسالة نورسين؛ ليقابلها باتصال سريع منه، أجابت عليه بالسرعة ذاتها، سألته مجدداً عن سبب رغبته في مقابلتها، فأجاب:

- فاكرة الحالة الخامسة اللي قولت لك عليها؟

- أيوة

- هخليكي تقابلها.. فاضية امتي؟

- تمام جداً.. بصراحة مش قادرة النهاردة من هدة الفرحة، ممكن بكرة؟

- خلاص مفيش مشكلة، فين؟

- في كافيه قريب من بيتي حلو أوي

- خلاص تمام

أنهى الاتصال، وعاد ليُكمل طعامه لكن قاطعه صوت هاتفه الذي

■ حان دورك

أعلن عن اتصال من شخص غير مرغوب به خاصة الآن، كان اتصالاً من محمد.. قرر علي أن يجيبه بعد أن تجاهل اتصالاته السابقة مطولاً، فقابله الآخر بغضب قائلاً:

- مبتردش على مكالماتي يا علي!، فاكرني مش هعرف أجيبك يعني؟!
- أجابه بهدوء: وأديني رديت.. عايز إيه؟
- عايز أعرف إيه اللي قلبك ١٨٠ درجة!، يا ابني أنا عايزك تفوق، باقي حاجة بسيطة والبحث يطلع للنور
- ما أنا فوقت فعلاً.. وأحب أقولك البحث ده ميلزمنيش
- إنت بتهزر بتقول إيه!، يعني إيه ميلز مكش؟، بعد كل التعب ده
- لا إله إلا الله، يا سيدي أنا مستغني عن تعبي ليك، متضايق ليه دلوقتي.. مش ده اللي إنت عايزه!
- إيه اللي أنا عايزه؟
- أضواء الشهرة.. على حساب بشر مش بتشوفهم غير فئران تجارب مش كده؟

- برضاهم يا صاحبي، هما معملوش كده لله وللوطن دول قابضين وقابضين كثير أوي
- بس نورسين مقبضتش.. من ساعة ما فاقت وهي بتدفع وبس. بص يا محمد أنا غلطت إنني قبلت أدخل لعبة زي دي وأنا دلوقتي بصلح غلطتي.
- × جاء ليُنهي المكالمة، لكنه تذكر أمراً × نورسين لاقت كل اللي هي شافته متسجل على notes الموبايل، بتاريخ كانت هي فيه لسة مفاقتش.. ليك يد في الموضوع ده؟

- ضحك بقوة ثم أردف: الوحيدة اللي مش عاملة باسورد لموبايلها، وكان سهل أفتح مسؤول الأمانات يسلمني الموبايل مُقابل شوية فلوس حلوين.. ولحُسن الحظ مكنش فيه غير شوية خدوش كده، عملت اللي أنا عايزه وخليت الرجل يرجعه مكانه تاني، بس إيه رأيك في صاحبك؟!

- رد بنبرة صارخة: مش ملاحظ إنك زودتها!، استفتدت إيه إنت كده؟

- أجب متعمداً استفزازه: استفتدت إن التجربة بقى فيها واقعية أكثر..

بس اللي بوظها إني نسيت حوار التاريخ ده، بدمتك مش لو كان من غير تاريخ كانت صدقت إن هي اللي كتب...

لم ينتظره علي ليُكمل حديثه وكان قد أنهى المكالمة بالفعل؛ فقد رتب كثيراً لهذه الخطوة، فهو غداً سيُقابل نورسين؛ ليخبرها بكل شئ عن التجربة، وأيضاً عما سُجل في هاتفها، لا يعلم كيف ستكون ردة فعلها لكنها على الأرجح ستكون أفضل من استمراره في الكذب.



(17)

المواجهة جزء من الحقيقة

جميعنا لديه أسراره الخاصة، ومهما بدت بسيطة للبعض، فهي في غاية الأهمية لصاحبها، وعلى الأغلب فلا أحد يفضل كشف أسراره للآخرين مهما كانت علاقتهم قوية.. لكن ماذا إن كان أحدهم يعاني ولن ينتشله من المعاناة سوى أن يكشف أمرك؟

عزيري القارئ: ليس من الخطأ أن يملك المرء أسراره الخاصة، بل الخطأ أن يشاركها مع غيره، فكيف لزجاجة مثقوبة من الطرفين أن تحافظ على الماء بداخلها؟!، فاحذر أن تقع في أمر يترتب عليه أذى شخص آخر.. فحينها ستخسر شرك وشخصك أيضًا.

في تمام الساعة المتفق عليها، كان علي في ذلك المقهى ينتظر نورسين، لا يمكن استخدام كلمة ينتظرها فقد وصلت بعده بثوان معدودة، وقف ليُلقى التحية، ثم قال:

- على معادك بالثانية
- طبعًا.. ها بقى هتيجي امتي؟
- هي مين؟
- الحالة الخامسة مش قولت لي إني هقابلها النهارده..
- ااااااه، بصي أنا كنت مأجل لقاءكم ده لحد ما أشوف نتيجة تطبيق الفكرة، وشوفت، ×ابتسم× وانبهرت.. جاهزة تعريفه هي مين!

- أجابت بحماس شديد: جاهزة جداً..
سألها أولاً ماذا سيطلبان، فطلبت هي كاييتشينو، وبما أنها مرتته الأولى
هنا؛ طلب مثلها.. وبعد عدة دقائق جاءهم النادل، ووضع المشروبين أمامهم
ثم رحل، أخذ نفس عميق وبدأ حديثه بلكنة جادة قائلاً:
- قولت لك إنها حالة مميزة.. وهي فعلاً كده، × صمت قليلاً × نورسين

مصطفى الحالة الخامسة

- قاطعته بتعجب: إيه!، لأ ثوان..

- قاطعها: سيبيني أكمل كلامي للآخر

- ابتسمت بلا مبالاة وقالت: اتفضل

- dreaming control أو التحكم بالأحلام.. عبارة عن مجموعة

حاجات في علم النفس ويتم تطبيقها في نفس الوقت، ومن خلالها يقدر
الشخص يروح لعالم ثاني هو اختاره وده اللي إسمه.. التحكم بالأحلام،
بس الفرق بينه وبين الحلم الطبيعي، إنك بتنامي وإنتي عارفة هتسوي في إيه،
وبتكوني قادرة تتصرف في بدماغك إنتي.. ده كان عبارة عن شوية كلام على
ورق وصل لنا بطريقة ما، وكان لازم يتجرب على ناس بجد وده فعلياً صعب
يتوافق عليه إلا لو كان لحالة طارئة زي اكتشاف عقار لمرض مزمن أو غيره،
لكن لبحث زي ده كان من شبه المستحيل معمل يقبل يخاطر في حاجة زي
دي، وعشان كده تمت تجربته في السر في مستشفى ما على أشخاص ما
بمقابل مادي.. وده الملف اللي شوفتيه على الفلاشة اللي إدتها لك.

كان يتابع نظرات نورسين التي لازالت غير مدركة لما يتفوه به علي، ولكنه

■ حان دورك

كلما استمر في الحديث شعر براحة تُخبره أنه في الاتجاه الصحيح، وتوقفه عن الحديث يعني أنه أضلّ الطريق؛ لذا أكمل:

- فكرة البحث تتم بعلم المريض بل كمان لازم يكون فايق لأن ٨٠٪ من نجاح التجربة يعتمد عليه، الموضوع كله بيتلخص في ثلاث خطوات أساسية: نصوّر له البيئة اللي عايزينه يشوفها إما بالكلام أو الصور أو أنه يقرأ عنها، في نفس الخطوة بنطلب منه يردد شوية جمل؛ عشان يقنع نفسه أنه اللي بيتحكم في الحلم، وطبعاً الـ mesmerism اللي هو التنويم المغناطيسي، وآخر حاجة بنلعب على الـ prospective memory اللي هي الذاكرة المستقبلية، عشان نضمن أنه مينساش اللي شافه بمجرد ما يفوق.. والحقيقة إن الموضوع نجح، وأغلب اللي مروا بالتجربة مكنوش بيصدقوا إن ده مجرد حلم؛ وقتها كنا بنوّري لهم فيديو مسجل ليهم في بداية التجربة عشان يقتنعوا بالحقيقة.. ×سكت قليلاً×

- كمل

- وقتها ظهرت واحدة comatose - في حالة غيبوبة وكان تحدي بالنسبة لنا، صح احنا منقدرش نطبق التجربة على شخص ميت، لكن الـ coma غير كده، المريض بيكون حاسس باللي حواليه لكن مش قادر يتفاعل معاهم، ولو قدرنا نطبق التجربة على حالة زي دي هيبقى إنجاز كبير جداً.. ×نظر لها بأسى× التجربة دي ترجع لدكتور زميل، وتمت بمساعدتي لأنني عندي علاقات كثير في المستشفى ساعدتنا نعمل ده من غير ما حد يحس، و.. - ابتمت غير مبالية بكل ما قيل: وأنا اللي كنت comatose، مش كده!

- نظر بأسف: أبوة أخرج هاتفه وعرض عليه صوراً ثم وجهها لنورسين شايقة الصور دي.. دي الناس اللي إنتي شوفتيها في الحلم، دي ناس حقيقية والحوادث دي حصلت، لكن احنا غيرنا في التفاصيل، بس الخلاصة واحدة، نورسين إنتي مش مريضة ولا دي تهيؤات.. واللي منسجل على موبايلك ده، كتبه الدكتور المسؤول عن البحث، لكن أقسم لك بالله أنا مكش عندي علم بالموضوع ده...

قاطعته نورسين وهي تلملم أغراضها بغير وعي:

- أنا لازم أمشي

لم تعطله فرصة حتى لإيقافها، فقد همّت بالرحيل وتركته.. بدأت بالسير وحيدة في الشوارع تحاول ترتب ما قيل لها، بل تتمنى لو أنه لم يُقال، يا ليته لم يعترف بالحقيقة، ماذا الآن؟، أصبحت هي المذنبه هنا! وفيم أذنبت؟، فهي لم تُجري البحث طمعاً في شهرة أو غيره، هي فقط أرادت للعالم أن يتذكرهم مرة أخرى.. لم يُذنبوا ليُقتلوا، أليس أقل ما نقدمه لهم ألا ننساهم؟، أن تبقى ذكراهم في عقولنا وقلوبنا وعلى ألسنتنا، لكننا لن نفعل طالما الأمر لا يمسننا بشكل خاص، لذا أرادت نورسين تطبيق البحث؛ لعل تذكرهم مرة أخرى يُحدث فارق، وربما يغيّر أمراً.. ولكنها لم تخضع للتجربة بعد حسب ما أخبرها به محمد، أو حسب ما يدّعيه، توقفت عن السير واستندت على أحد عواميد الإضاءة في الشارع، ثم اتصلت به:

- يااااه نورسين.. عاش من سمع صوتك

- إنت ازاي متقوليش إنني دخلت التجربة!

حان دورك ■

- يبقى علي قالك، تنهد وإنتي مضايقة ليه؟، مش ده اللي إنتي كنتي عيزاه!
- عيزاه بس بعلمي.. أنا كنت قربت أتجنن، مكنتش قادرة أحدد إذا كان ده حقيقة ولا لا

- وده بالضبط المطلوب، كان لازم أجرب البحث على شخص مدة طويلة من غير ما أقوله الحقيقة، وإنتي جيتي في الوقت المثالي.. وكان القدر في صفِّي؛ مقابلتك ل علي ساعدتني أعرف تطوراتك

- بس ده مش من حقك، على أي أساس تدخل عقول الناس وتزرع أوهام فيها!
- مش ده هدفك من البحث؟، أنا مش بزراع وهم، إنتي اللي طلبتي تشوي في ده تحديداً، لكن بالنسبة لي، أنا محاولتش أنقل كدبة لأي شخص، أنا كنت بجرب عليهم مشاهد طبيعية، زي السفر وغيره، وبمجرد اعتماد البحث ه يتم تطبيقه في مجال العلاج النفسي وبس!، أه بالمناسبة كلها كام يوم وبراءة الاختراع تطلع وباسمي.. وبعدها هعمل ندوة لمناقشة البحث، أتمنى أشوفك هناك.. متأكد هتستفادي

ثم أغلق الخط.. أرادت نورسين أن يتم تطبيق البحث على كبار البلد؛ ليقدروا ما مرّ به صغارها، ولكن يبدو أنها أخطأت.. فما فعلته لن يفيدهم بل ربما يؤدي المزيد، كما تأذت هي بالخضوع لتلك التجربة، كانت تظن أن حلم قد يعطي أمل لشخص، ويجعل آخر يُدرك خطأه، لكنها تناست أن الحلم ما هو إلا وهم سيتهوى كما تهافت الحقيقة من أذهانهم.

رفعت نظرها لترى المارّة في الشارع، كل في عالمه الخاص، لا أحد يأبه بالآخر.. رأّت فتاة صغيرة تركض سريعاً فتعرقل في رباط حذاءها المفكوك،

فتجئى إمرأة أخرى تجلس على ركبته وتقوم بعقد رباط حذاء الفتاة ثم تتركها وتمضي في طريقها، يبدو مشهد بسيط لكنه يحمل آلاف المعاني في عقل نورسين، ربما أرسل الله تلك المرأة للفتاة لتؤدي دور بسيط ألا وهو "تشكيل عقدة في رباط الحذاء" لكن من الممكن أنه حفظها من سقطة أليمة.. فذلك ما تؤمن به نورسين، لم نُخلق في حياة بعضنا البعض عبثاً.

مرت ثلاثة أسابيع، ولا زالت نورسين غير قادرة على مواجهة علي، لذا كانت تتجاهل اتصالاته، وأشغلت نفسها بقضاء وقتاً مع عائلتها والتركيز على دراستها، كانت محادثاتها مع رحيم قليلة ولكنها كافية بالنسبة لها، فهو الشخص الوحيد الذي عارض رغبته لأجلها.. أو هكذا تظن، وعلى الرغم من قلة حديثهم؛ إلا أنها لم تشعر أبداً أنه بخير، أرادت سؤال علي عن حالته ولكنه ليس من صالحها على الإطلاق.. في تلك الفترة ظلت تراودها أفكار حول البحث وعلي وخضوعها للتجربة دون علمها - أو كما تتدعي -، تُرى ما الذي أوصل الأمور لتلك الدرجة؟، اعتراف علي لها زاد شعورها بالذنب تجاهه، وإن كان غرضها خيراً، لكنها في النهاية كذبت!، انتشلها من تفكيرها القاتل؛ صوت هاتفها معلناً عن اتصال من ونس، أجابته برحابة صدر قائلة:

- الندلة اللي معدتش بتسأل

- والله غصب عني طالع عيني في الكلية.. المهم عندي ليكي خبرين

أحلى من بعض

المسافة طالت، فكما تغيب الشمس كل يوم وأنت على يقين أنها ستشرق مرة أخرى، كُن على يقين أن حلمك سيشرق، أنت فقط تنتظر الوقت المناسب الذي سيختاره الله لك.



كان علي يجلس على الأريكة، يفكر في صحة ما فعله، فمنذ أن صرح نورسين بالحقيقة؛ وهي لا تجيب على مكالماته، وعلى الرغم من يقينه أن ما فعله هو الصواب إلا أن شعور الندم يتمكن منه في بعض الأحيان، نظر في ساعة الحائط فوجدها السادسة مساءً، نهض مسرعاً؛ كي يستعد لحضور مناقشة بحث محمد.. فهو بالطبع لن يفوت حدث كهذا وإن لم يكن يهيمه بالدرجة الكافية.

وبالفعل في تمام الساعة السابعة والنصف وصل للمكان المقصود، واتجه فوراً ل محمد وهو يحمل علبة شوكولاتة فاخرة، وقال بسعادة يصحبها استهزاء:

- دكتور محمد.. ألف مبروك على نجاح البحث
- التفت إليه متصنعاً الودّ: الله يبارك فيك يا دكتور
- اتفضل حاجة بسيطة كده بمناسبة المناقشة مدّ يده ب علبة الشوكولاتة
- تعبت نفسك والله.. تتردد لك في الأبحاث
- طيب استأذن أنا بقى، أنا قولت آجي أبارك لك على السريع وأمشي
- تمشي إيه!، ده لسة المناقشة مبدأتش..
- ما أنا خايف بصراحة حاجة توقع منك في النص وقتها مش هقدر أسكت وهضطر أعدّل على كلامك × غمز له × مبروك يا دكتور

حان دورك ■

- أوقفه قائلاً: هو أنا مقولتكش!، أنا أصلاً غيرت في البحث.. ×نظر بلوّم أقصد غيرت في مجالات استخدامه، إنت عارف بقى أنا لسة متجوزتش والطب النفسي ده مش جايب همّه

- نظر له باشمئزاز وقال: شوف يا أخي أنا كل ما بشوفك بحس بحاجتين عكس بعض تماماً، الحاجة الأولى: بحس بقرف إنني عرفتك، والثانية بقى: بحس بسعادة أول ما أفكر إنني قطعت علاقتي بيك

خرج من المبنى عائداً لسيارته، وسؤال واحد يتردد في ذهنه: كيف اتخذ منه صديقاً لسنوات عدّة، وكيف تمكن محمد من إقناعه بالعمل على البحث، بالرغم من أن علي كان يتوقع نيته من البداية، فبحث كهذا إن استخدم لمجالات أخرى سيحقق أرباح خيالية.. في الحقيقة كان الأمر على هواء علي؛ فهو بشراً في النهاية، يريد لنفسه الأفضل وإن كان على حساب نفوس أخرى.. ولكنّ نورسين استطاعت انتشاله من نفسه، فرؤيته لما مرت به؛ جعله يدرك أن النجاح مقابل معاناة الآخرين ما هو إلا فشل.

وها هي آتية على الذكر، أضاء هاتفه باسمها؛ فأجابها مسرعاً، لتخبره أنها توّد لقائه الآن إن كان وقته يسمح، وبالطبع لن يرفض لقاء انتظره منذ مدة ليست بقصيرة!

تقابلا في المقهى ذاته وعلى الطاولة ذاتها، دام الصمت بينهما لولا أن نورسين بدأت الحديث قائلة:

- خلاص أنا هبدأ.. كنت ناوية أتجنبك الفترة دي، بس لقيت كده إن كل الطرق تؤدي إليك، أنا مصلحجية بقى تقول إيه، تعرف.. أنا اللي كتبت لك: عندي إقتناع تام إن لقاءنا وراه سر؛ وطلع معايا حق..

- قال بأسف: نور أنا عارف إنك مضايقة مني وحقك جداً مقابل اللي إنتي عشتيه الفترة اللي فاتت ..

- قاطعته: دكتور علي إنت مسألتنش نفسك أنا ازاي كنت بالهدوء ده لما حكيت لي!، المفروض حد ثاني في مكاني يسأل مليون سؤال في الدقيقة مش كده؟، نظر لها متسائلاً الحقيقة مكنتش أعرف إني ضمن اللي خاضوا التجربة.. بس كنت عارفة البحث كله من أوله لآخره
- لا لا لا ثواني كده.. بحث إيه ده اللي تعرفيه!

- dreaming control أنا صاحبة البحث، وأنا اللي إديته لدكتور محمد عشان يطبقه عملي.. كنت عايزة الناس تحسن بغيرهم بجد، إنهم يمرّوا باللي غيرهم مر بيه بس يكونوا جوة الحدث مش مجرد مشاهدين، وقدرت أحقق ده على نفسي ونجح جداً، لدرجة إني مقدرتش أعرف أنه مجرد وهم وأنا أصلاً صاحبة الفكرة، وقتها ظهرت لي إنت وقدرت تساعدني إني أحقق رغبتني بطريقة مختلفة، نجحت!، وبتنجح..

- قال بنفاذ صبر: كل ده مبهميش، اللي يهمني دلوقتي إنك كدبتني عليا.. وأنا صدقتك

- أجابته بانفعال مصحوب بتردد: لا مكذبتش.. أنا لحد آخر لحظة مكنتش أعرف إني دخلت التجربة أصلاً، وعشان كده مكنتش فاهمة اللي بيحصل وده سبب زيارة أمي ليك واللي منها اتقابلنا، ومعرفتش إنك مشترك مع دكتور محمد غير لما شوفت البحث في الفلاشة، صممت قليلاً× ثم يا دكتور.. إنت كنت عارف حقيقة اللي بيحصل لي وسكت!، يبقى مين اللي بيكذب..

■ حان دورك

- شعر بهزيمته في الحوار، فبدأ السرد: مكنتش فاكر إسمك حتى، قبل ما والدتك تيجي لي وتحكي لي عن حالتك اللي مطابقة تمامًا للحالة اللي أجرينا عليها التجربة؛ وشكوكي إتأكدت لما عرفت اسم المستشفى اللي كنتي فيها، وأثبت لي أكثر بياناتك اللي عندي، واللي أخذناها لكل شخص خضع للتجربة.. وفي الآخر اتضح إن كلنا كنا في مركب واحدة

- أنا أهون لي أنط وأغرق ولا إني أكون معاكم في نفس المركب.. أنا كان غرضي الناس اللي عايشة حياتها تفكر اللي خسروها، واللي بيخسروا الناس حياتهم، يجربوا إحساس إن هما اللي يخسروها، لكن إنت كان لغرضك إنت وبس..

- تمام يا نورسين إنتي فزتي

نهض ليرحل فأوقفته نورسين قائلة:

- لا أنا مش هقبل تكون دي النهاية.. أنا لسة عايزة أحقق هدي في سواء بالبحث أو من غيره، لازم نكمل التيم بتاعنا ونستمر فيه
- نورسين افهمي انطلاق البحث ده بقى خطير.. أنا عارف محمد ممكن يستخدمه في إيه وده هيوصل بالناس لفين.

- مش هيقدر يستخدمه في أي حاجة غير العلاج النفسي.. هو مضالي على ورقة بـ ده في مقابل إمضتي على ورق يثبت أنه صاحب البحث والوحيد؛ يمكن وصلك أنه هيسخدمه في غير كده عشان يستفرك
- الوحيد، أفهم من كده أنه كان عامل حسابه أي مش معاه من البداية،
أمال ليه كان بيحاول يقنعني أكمل معاه؟

- أكيد عشان يقدر يعرف أخباري منك، ولما عرف إنك قولت لي لقي إن وجودك معدش هيفرق..

- يااااه ده الواحد كان مغفل بقى

- اختصاراً لكل اللي حصل ده، أنا عايزة نعدّي المواقف اللي حصلت دي ونستمر في اللي بدأناه؛ لأن دي الحاجة الوحيدة اللي كلنا كنا صادقين فيها ونوايانا صافية من ناحيتها.. أنا كلمتك عشان أقولك إن في حد من طرف يوسف، هيساعدنا نعرف الناس فكرتنا، هو مقدم برنامج وعايز يستضيفنا في حلقة، وده مش هيتم غير وحضرتك معنا. قولت إيه؟

لم يكن أمام علي خيار آخر؛ فكما قالت نورسين إنه الشئ الوحيد الذي أحب فعله وفي الوقت ذاته يُمارس فيه مهنته، لذا أخذ نفس ثم قال:

- موافق

- الحمد لله، كده نقدر نبدأ

بدأت بسررد حوارها مع وُنس على مسامع علي، وكذلك ذكرت له فكرة ×جروب× الفيسبوك وقد نالت إعجابه لدرجة قادرة على رفع حماسها للسماء، قالت معلقة على حديثهم:

- المشكلة بقى، مهما فكرت مش عارفة الأقي اسم للتيم وللجروب

- أنا عارف هنخلي اسمه إيه..

- قالت بحماس: إيه!

- فاكرة في بداية التيم خالص قولتي لي عايزين نشغل على فكرة

معينة، الفكرة دي هتكون الإسم، نظرت له بغير فهم أفكرك.. الحياة حلوة

■ حان دورك

- ضحكت بشدة ثم أردفت: مش أوي ساد الصمت ثوان، حتى تحدثت نورسين قائلة:
- تعرف حاجة عن رحيم؟
- بشوفه في الجلسات.. بتسألني ليه؟
- أصله مخنفي تماماً فقلقت عليه، كلنا قلقنا يعني.. ك طبيبه تفسر بـ إيه رجوعه للغناء؟
- هو عمل حاجة بيحبها وكان منقطع عنها من سنين، بس مكنش مبسوط، من وجهة نظري رحيم معمlesh كده عشان هو عايز يرجع زي الأول وعادي..
- متكلمتش معاه فيها؟
- في تلك اللحظة سرخ علي قليلاً وتذكر لقائه الأخير مع رحيم:
- تعرف إن كان صوتك حلو جداً لما غنيت، كنت مبسوط أوي إنك رجعت لهوايتك
- أجابه بصرامة: مرجعتش يا دكتور..
- آمال غنيت ليه؟
- ابتلع ريقه ثم قال: عشانها.. هي قدرت تتجح مع الباقي، مش عايز أكون أنا نقطة الفشل في حياتها.
- سأله مازحاً: أوعى تكون بتحبها!

(18)

إدراك حقيقة المشاعر

للبداية بريقها الخاص الذي سيُجبر مشاعرك على الفيضان، لكن بعد إنتهاء البريق، ستنتهي المشاعر وسيهدأ الفيضان؛ لذا لا تبهرها بجمال البدايات وتظنوا أنها دائمة.. فكما قولنا سابقًا لا تبهرها بحلو البدايات فتُصدموا بمرُّ النهايات، فمن يُحب الشمس وقت الشروق لن يطيقها أثناء الظهيرة.

- سأله مازحًا: أوعى تكون بتحبتها!

- وافرض حصل؟، تفنكر هقدر!، ولا هبقى بربطها جنبي بحبل دايب!

- أنا مش هفرض حاجة.. بتحبتها؟

- مش عارف يا دكتور، بس مجرد ما بسمع اسمها بتهز..

- ابتمسم علي ثم أردف: بس أنا عارف يا رحيم..

قاطعت نورسين حبل أفكاره؛ لتعيده إلى أرض الواقع قائلة:

- سرحت في إيه؟

- نور إنتي حبيتي قبل كده؟

- إيه، لأ.. بس ليه؟

- طب لو قولت لك إن في واحد بيحبك وبيكابر نفسه ومش قادر يعترف

لك، هتعملي إيه؟

- دكتور علي إيه الكلام ده، أنا همشي

- رحيم بيحبك وأنا واثق من اللي بقوله ليكي

حان دورك ■

- أجابت بصدمة تصحبها ابتسامة حاولت منع ظهورها: مين!!
- خايف يصارك لأنه شايف أنه هيئذيكي.. هو متلغبط
- أيوة بس حضرتك بتقولي الكلام ده ليه؟
- لو الإحساس متبادل فإنتي الوحيدة اللي هتقدر تساعده
- احمر وجهها من الخجل ولم تجد ما تقول، فقال علي بدلاً عنها:
- عرفتي تخبيّ إنك صاحبة البحث، بس فشلتي تخبي مشاعرك..
- مش بخبيّ بس أنا فعلاً مش متأكدة إذا كان كلامك صح ولا لأ.. أنا معرفوش كويس ولا اتعاملت معاه بالدرجة الكافية اللي تخليني أقول بحب!
- لوعايزة نصيحتي.. الحب بالذات مش محتاج كل الهري ده، بس ده ميمنعش أبداً إنك تاخدي الوقت اللي يريحك عشان تحددني، «ساد الصمت قليلاً» شكرًا إنك صارحتيني..
- مكش ينفع أكمل كذب، «ابتسمت» شكرًا إنك قبلت نكمل وسامحت



بعد انتهاء لقاءهما عاد علي لمنزله وهو يشعر أن اليوم كان من أفسى أيام حياته، مشاعره متداخلة لدرجة يصعب عليه تحملها، غاضب من صديقه الذي أظهر له اليوم كم كان أعمى عن قباحته، وسعيد أنه عرف حقيقته، غاضب من كونه شعر بالذنب تجاه نورسين وكانت هي وراء الأمر كله من البداية، وسعيد أنه لم يعد يخبي شيئاً وأن علاقتهم عادت كما السابق شعور الشئ وعكسه في ذات الوقت؛ هو ثاني أكثر شعور مُربك بعد الحب.



في اليوم التالي استيقظت نورسين متأخرة عن محاضرتها فقد استغرقت وقت طويل حتى خضعت للنوم؛ لم يكف عقلها عن التفكير في حديث علي للحظة واحدة، وفي النهاية لم تصل لحل يُريح عقلها وقلبها معاً، طلبت من الله أن يعطيها إشارة واحد ترشدها إلى الفعل الصحيح.. ويبدو أنه حدث! ما أن أنهت محاضرتها وخرجت، حتى وجدت رحيم يقف في الجهة المقابلة، ويُمسك بهاتفه، في تلك اللحظة تلقت رسالة منه محتواها: "عاملة إيه؟"، فأرسلت له: "بص قدامك..". وظلت تراقبه حتى فتح الرسالة، ولكنه لم ينظر وأرسل لها مجدداً: "يعني إيه؟"، لتجيبه: "بتعمل إيه قدام كُليتي؟"، في تلك اللحظة رفع رأسه عن شاشة الهاتف ونظر أمامه ليجدها، سار باتجاهها حتى أصبح مقابلها تماماً وقال:

- كُليتك قريبة من السكن بتاعي..

- رفعت حاجبها وقالت: إنت بتدرس هنا في الجامعة!

- أيوة وععيش هنا كمان

- وليه مش قاعد مع أهلك؟

- أنا مرتاح أكثر كده

- وهما مرتاحين؟

- ولولاً يعني.. ما أنا عملت حاجات كتير عشان راحتهم ومرتاحتش

لم تُعلق على حديثه، وأخبرته بأمر اللقاء التلفازي وأهمية وجوده معهم،

فأجابها قائلاً:

- وجودي مش هيفيدكم.. أنا منجحتش ولسة زي ما أنا

■ حان دورك

- مش لازم عشان تتجح تغير حياتك يعني!، عُمر النجاح ما بييجي من أول مرة.. صدقتي وجودك مهم جداً، والأهم منه إنك اعترفت إن اللي إنت فيه ده مش نجاح
- لم تجد منه رداً؛ فأكملت:
- إنت عارف إن الانتحار حرام ومع ذلك حاولت تتحر؛ ده معناه إنك مش واثق في ربنا مش كده؟
- رد باقتناع تام: لأ.. أنا مش واثق في الحياة واللي فيها، لكن واثق في ربنا جداً؛ وعشان كده واثق أنه فاهمني وحاسس بيا وهيغفر لي
- ابتمت بانتصار ممزوجاً برقة، وقالت: شوفت شيطانك بيضحك عليك ازاي!، لو إنت فعلاً واثق في ربنا عُمرِك ما هتعلق من الحياة؛ لأنها أصلاً من صنعه وتدبيره.. فعلاً ربنا فاهمك وحاسس بيك وعشان كده بيحطك في الموقف ده، لأنه عارف إنك قده.
- يمكن فعلاً أكون قده، بس طاقتي استنفذت، مش قادر أخوض معركة جديدة أنا عارف إنني خسران فيها
- لما تدخل معركة وتموت هيتقال عليك شهيد، لكن لما تنسحب هيتقال جبان! لم بيدي أي تعابير تجاه ما قالته، بل صمت قليلاً ثم قال بشكل مفاجئ:
- أنا بحبك، بس حتى دي مش مُستعد لها
- أجابت بثبات: لو مش مستعد لها مكنتش قولتها.. إنت بس مش قادر تصارح نفسك إن في حاجة علقتك بالحياة، لو عايز نصيحتي راجع نفسك وحاول تلحق اللي فاضل من حياتك عشان مضيعيش زي اللي فات، عن إذنك بقى عشان أروح.

تركته واقفًا ورحلت؛ عائدة لمنزلها.. شعرت بارتباك شديد تجاه حديثهما معًا، كانت بحاجة لمشاورة أحدهم؛ لذا لجأت لوالدها فور وصولها، وروّت له ما دار بينهما من حديث، في الشرفه كعادتهما:

- إيه رأيك؟

- رأي مش مهم دلوقتي، المهم رأيك إنتي

- يووه يا بابا أمال أنا بحكيك ليه!

- عشان تفضفضي وتطمني إني في ضهرك، ابتمسم يعني أنا دلوقتي

لوقولت لك اقطعني علاقتك بالولد ده نهائيًا هتعملي كده؟، أدارت وجهها

وضحكت شوي في يا نور إنتي طول عمرك دماغك ناشفة وتعملي اللي إنتي

عيزاه ودي حاجة على الأغلب مش بتكون حلوة، بس للأمانة عمرك ما

خذلتيني ودايمًا كنتي بتثبتي لي إنك صح، أنا كنت معارض إنك تقابلي

الدكتور ده، بس كنت عارف إنك برضه مش هترتاحي غير لما تعملي اللي

في دماغك، قولت طالما مش غلط خليها تجرب، والحقيقة إنك فاجئيني..

روحك بقت أحلى وطلعتي بفكرة جميلة ساعدت اللي حواليك وده انعكس

عليكي بالإيجاب؛ وعشان كده أنا بقولك اعلمي اللي إنتي شيفاه مناسب

ومتأكد إنك هتاخدي القرار السليم.. بس طبعا إنتي عارفة اللي بيحب ده

بيعمل إيه

- طبعا عارفة..

- طب يلا نطلع أحسن أمك تزعل عشان سايبينها لواحد

- هقفل البلكونة وأجي

حان دورك ■

أن يكون هنالك من يشاركك أهم تفاصيل يومك هو أمر مُريح، خاصة إذا كان ذلك الشخص يجبك.. بل هو أكثر شخص سيُحبك مهما كثرت معارفك.

مرّت فترة على لقائهما الأخير ولم تلقَ منه رسالة؛ لذا توقعت أنه اختار الانسحاب، ولكن قلبها كان يرفض الاعتراف بهذه الفكرة؛ فقررت إعطائه فرصة أخرى، فاليوم سيذهب الجميع للقاء التلفازي وربما يأتي، فهو على علم بالموعد.. وصل الجميع وكان رحيم من ضمنهم لكنه لم يُعِرها أي انتباه، لم ينظر لها ولو على سبيل الصدفة؛ لكنها لم ترغب أن يُفسد تجاهله لها، سعادتها باللقاء؛ فقد سار على نحو جيد، وتمكنوا من إيصال هدفهم بطريقة بسيطة ودون تكلف مصطنع.

بعد ذلك اللقاء ازداد عدد المنضمين لمجموعة الفيسبوك الخاصة بهم والتي سُميت بـ "الحياة حلوة.. مثل أوي" وتمكنوا من مساعدة الكثير، والكثير ساعدوا الآخرين وبات الأمر مهنة أكثر من كونه تطوع، وراتبهم الشعور بكونهم مفيدون، ولا يعني ذلك أن فكرتهم خلت من استهزاء البعض وكلماتهم المُحِبطة ولكن كما المعتاد الحياة لا تسري على خطٍ مستقيم.. ف عليك أن تقابل السئ؛ لتستشعر قيمة الجيد.

لازالت أخبار رحيم منقطعة عن نورسين، وحتى علي لم يعد يراه.. تأكدت ظنونها حينها. انتهت اختبارات الترم الثاني وفي كل يوم تمت أن تخرج من اللجنة فتجده ينتظرها، أو حتى على سبيل المصادفة، ولكن ليس

كل ما نتمناه يتحقق!، بعد انتهاء امتحانات ونس بثلاثة أيام تم عقد قرانها على يوسف، وكان ذلك أكثر الأشياء بهجة لنورسين، بدت ونس كالملاك في نقابها الأبيض، وبدا يوسف فخوراً، فلا يوجد وصف مناسب لسعادته ونظراته لها سوى الفخر، وكأنه يراها غنيمة بعد حربٍ شرسة.

وفي وسط انشغالهم بالاحتفال اقترب علي من نورسين؛ طالباً التحدث معها، فوقفا أمام باب المنزل؛ ليبتعدوا عن ضجيج الحفل، ثم قالت:

- خير في حاجة؟

- في حد عايز يكلمك

لم يُعطها فرصة للاستفسار، ووجه لها هاتقه، فأخذته وأجابت بريية:
- ألو..

ليُجيب صوت قد سمعته من قبل لكن ذاكرتها لم تساعدها في التذكر، حتى أعلن المتصل عن هويته قائلاً:

- أنا والد رحيم

- بدا على وجهها علامات الصدمة: ااه أهلاً أزيّ حضرتك؟

- أنا بخير الحمد لله، الحقيقة أنا كنت عايز أشكرك جداً على المجهود

اللي عملتيه

- عقدت حاجبيها وقالت: مجهود إيه؟

- إنك كنتي السبب بعد ربنا إن ابني يكلمني بنفسه لأول مرة من زمان

أوي، يمكن تبان لك حاجة بسيطة، بس معناها في قلبي كبير أوي.. أنا كنت حاسس إن فيه سور من حديد اتبنى بيني وبينه لا يمكن حاجة تهدّه، بس

طلعت غلطان

■ حان دورك

- الحمد لله، حقيقي مكاملة حضرتك فرحتني جداً، وأنا معملتش حاجة والله.. دي إرادة ربنا. وبإذن الله قريب أوي علاقتكوا تبقى أحسن بكثير من الأول

- الله يخليكي لأهلك يا بنتي

- أغلقت الخط وهي لازالت مصدومة من المحادثة، نظرت ل علي بسعادة وعتاب قائلة:

- إنت مخبّي حاجات كثير على كده!

- مش كثير أوي يعني، بصراحة رحيم كان بيجيلي في مواعيد جلساته عادي وبكلمه بس هو اللي طلب معرفكيش، كان عايز يشوف الأول هيقدر يصلح حياته ولا لا.. كان خايف يوعدك بحاجة وميعرفش يعملها..

- ابتسمت: يكفيني أنه كان بيحاول

- بصراحة هو فاجئني جداً، أنا كدكتور اكتشفت إن في مرضى كثير مش محتاجين طبيب قد ما هما محتاجين دافع

قابلهم رحيم على الدرج وكان يضع شئ خلف ظهره، قاطع حديثهم بجملته:

- بتجيبوا في سيرتي وأنا غايب

نظر له علي وغمز له، ثم إستأذنهم ليعود للحفل، ظلت نورسين واقفة تنتظره أن يبدأ الحديث، حتى فعل:

- عاملة إيه؟

- الحمد لله.. مبسوفة جداً إنك كلمت باباك

- مكلمتوش لله وللوطن

- أمالت رأسها بتساؤل: قصدك إيه!
- تقدري تقولي رشوة.. حاجة مقابل حاجة
- وإيه المقابل اللي إنت مستتية؟
- آجي أتقدم لك، ×لم يجد رداً منها لدقائق× أنا عارف إني مش شخص
مثالي للارتباط، وإني لسة مش جاهز كفاية، ومش عارف حتى الخطوة دي
صح ولا لا، وعارف إن حقك تترددني بس إنتي قولتيلي مضيعش اللي جاي
من حياتي عشان مندمش.. إنتي حياتي الجاية يا نورسين
صُدمت مما سمعته على الرغم من أنها على علم بحقيقة مشاعره، إلا
أن مصارحته لها اليوم والآن تحديداً جعلتها عاجزة عن الحديث، فتحدث
بدلاً عنها:

- طيب حبيت أطلب إيدك بطريقة مميزة شوية
أخرج ما يخبئه خلف ظهره، وبدأ بفك التغليف الذي يحيط به، لتظهر
لوحة مرسومة لنورسين، بل أنها تبدو أجمل، من ينظر إليها يشعر بدقة
التفاصيل؛ لدرجة تجعله يظن أنها تتحدث!، أمسك اللوحة وركع على ركبتيه وقال:
- موافقة؟، ×ظلت صامتة أثار الصدمة× لأ وحياتة أبوكي انطقي؛ أنا
رجلي وجعتني

- حلوة أوي حقيقي، إنت مش متخيل أنا فرحت ازاي..
- نهض عن الأرض: ادعي ربنا يقدرني وأقدر أفرحك دائماً
- ابتسمت: عايزة ورد أحمر مش بحب الأبيض، ولو جبت أبيض مش
هدخلك البيت

■ حان دورك

- يعني موافقة!
- نظرت للأسفل بحرج وقالت: يلا عشان تبارك ليوسف وونس وع...
 - قاطعها بإكمال جملتها قائلاً: وعقبالنا..
- استطاعت وأخيراً أن تذيب جبل الجليد الذي خبأ قلب رحيم لسنوات،
أو ربما هو كان بانتظار من يحاول أن يصل لقلبه.. ليفتحه له دون أن يخشى شيئاً، فيضيف نكهة مميزة لحياته.
- أنت لا تبغض الحياة، أنت فقط بحاجة إلى من يجعلها مميزة.

(19)

الكلمات صنعت لنطقها

لم تُخلق الكلمات لنخبئها، بل وُجدت لنفصح عنها بألسنتنا، فالبعض تتقذ حياته كلمة؛ وجد فيها السبيل ليحيا.. ولكن ليست جميع الكلمات حياة، فهناك كلمات تؤذي وتجرح.

فأحرص على أن تكون سبب لحياة لا لموت.

تقدّم رحيم لخطبة نورسين بعد لقاءهم الأخير في حفل ونس ويوسف بثلاثة أيام، ولم يتردد والدها في الموافقة فبعيداً عن كونه يمتلك الصفات الأساسية التي تجعله يوافق، إلا أن ذلك يمكن أن يتوفر في الكثير من الرجال، لكنه يمتلك ما هو أهم.. قلب نورسين الذي لم ولن يمتلكه سوى رحيم. اتفقوا جميعاً على قراءة الفاتحة والإكتفاء بتجمع بسيط في المنزل ليرتديا الدبل، وخلال فترة انضمام رحيم للجيش -فقد أنهى سنته الدراسية الأخيرة-، ستتولى نورسين وعائلتهما تجهيز المنزل؛ لتكون أغلب أمور الزفاف جاهزة حين عودته.

اليوم طُلب من أعضاء فريق "الحياة حلوة" التجمع في موقعهم المعتاد، وبالفعل حضر الجميع.. بدأت نورسين حديثها:

- النهاردة هنتكلم عن نفسنا.. كل واحد هيقول كلمة أثرت في حياته

سواء بالسلبى أو الإيجابى، مين هيبداً

■ حان دورك

- أجابت فرح: أنا.. بعد ما ربنا كرمني وقدرت أرجع لشغلي تاني، اتكرر قدامي نفس المشهد اللي أغلبكم ميعرفوش تفاصيله، بس هتفهموه وأنا بحكي، ضحكت بحزن شاب بيعاكس بنت وشاب تاني راح يدافع عنها، بس الجديد بقى إن أم الشاب اللي كان بيدافع عن البنت كانت واقفة وندعت ابنها بسرعة وقعدت تقوله متدخلش واعمل مش واخذ بالك، وهو لما اعترض على كلامها قالت له: يعني إنت عايز تنقذها وتخسر روحك.. ولا تكونش عايز تموت زي اللي ماتوا، هنا مبقتش عارفة أفكر، أكيد مقدرش أقول لو شوفت بنت في محنة متساعدهاش، وبرضه مقدرش أقول لأم متخافيش على ابنك وشوفيه بيدخل في مشكلة واسكتي..

- بس تفكري أنهي أحسن يموت قدام الكل وهو بيدافع عن بنت، ولا يموت قدام نفسه عشان خاف وجري.. طب بلاش دي، تفكري الست دي لو بنتها هي اللي بتعاكس مش هتبقى بتتمنى أي واحد ابن حلال يبقى حواليتها ويساعدها، ربنا محطناش في حياة بعض زينة، كل واحد اتخلق له دور وما دوره بينتهي ربنا بيسترده وديعته..

- أجابت بسعادة: بالظبط وده اللي قولته لنفسي، وعشان كده ربنا ساعدني أتخطى الموقف ده

- تدخل رحيم: بالنسبة لي بقى، في حد قالي قبل كده: متضيعش اللي جاي من حياتك عشان متدمش، نظر لنورسين وابتسم كان معاه حق، لما فكرت لقيت إني كان في أيدي حاجات كتير وضيعتها عشان مكنتش مُدرك قيمة حاجة اسمها الوقت.. الحاجة اللي مستحيل تتعوّض بخلاف أغلب الحاجات الثانية

- علق يوسف على حديثه: فعلاً.. الحقيقة إن كل ساعة بتضيع وإنك واقف مكانك، كانت هتفرق جداً لو كنت اتحركت فيها
- رد علي: طب وإنك يا يوسف إيه الكلمة اللي أثرت فيك؟
- هي مش كلمة اتقالت لي، قد ما هي كلمة فهمت معناها متأخر الناس، الناس دول أخطر سلاح ممكن تقابله في حياتك؛ لأنهم مش بيقفلوك بطلقة ولا جرح.. دول قادرين بكلمة يوقفوا حياتك!، يعني تخيل كده إرهابي يقتل جندي بمسدس مياه!، أهو كلام الناس كده بالظبط
- ضحكت ونس: أنا بضم صوتي لصوت يوسف عشان مفيش تعبير مناسب لرأبي أكثر من ده
- قال علي ساخرًا: كتبوا الكتاب وهيقرفونا بقى
- أجابه يوسف: ولسة لما نخلف هدخل ولادي التيم وهنعمل لكم هيصة هنا، وبعدين بدل ما بتتريق يا دكتور قول لنا إنت كلمة أثرت فيك؟
- مش قادر أقول إن في حاجة محددة، بس أكثر كلام بيأثر فيا بشكل عام، لما بقدر أساعد مريض إن حالته تتحسن ويشكرني
- ردّ رحيم: يشكرك؟!، طيب أنا هفضل ساكت عشان مفضحكش
- لا أنا مش معاك في دي.. دكتور علي يستاهل كل كلمة حلوة
- نورسين إنتي بتقولي كلام غير اللي أنا بقوله!، طب خدي دبلتك يا بنت الناس واتكلي من هنا
- رفعت حاجبها وقالت: لو جدع اقلعها كده
- تدخل علي: صلوا على النبي مش جاين نتخانق هنا

حانَ دورك ■

- فين أيام ما كان التيم كله سناجل ولا وجع الدماغ ده
- قالت ونس مصطنعة الغضب: في إيه يا فرح ما تراجعى كلامك قبل
ما تقوليه
- تدخل يوسف بمزاح: باااااااااا اس اسكتوا، ده إنتوا ما تصدقوا تلاقوا
خناقة.. قولي يا نورسين كلمة أثرت فيكي
- مش كلمة.. شخص، شخص حسسني إني مهمة وإني لأول مرة
أكون رقم واحد في حياة حد، شخص حسسني إني قدرت أغير حاجة فيه
للأحسن، إني أفرق في حياته
- نظر لها رحيم معدلاً على حديثها: قصدك إنك حياته!
- قالت فرح مازحة: هو إنتوا يا بتخانقوا يا بتحبوا في بعض.. مفيش وسط!
انتهت جلستهم التي امتلأت بضحكاتهم ومزاحهم وودّعوا بعضهم
استعداداً للرحيل ثم عاد رحيم لسيارته، وأخذ نورسين؛ ليوصلها ولكنه
سلك طريق مخالف لمنزلها، فقالت له:
- رحيم ده مش طريق البيت
- لا مهو احنا مش مروحين دلوقتي
- أمال؟
- هنتمشى شوية فيها حاجة؟
- لا مفيهاش، بس أنا مقولتش لبا..
- أنا قولت له وهو مقالش حاجة
- متأكد؟

- يعني هكذب عليك يا نورسين، كلميه لو عايزة
- إنت بتتعصب عليا ليه دلوقتي؟!، بتأكد يعني محصلش حاجة..
- تضربي مانجا؟
- ضحكت وقالت: أضرب مانجا..
اتجها للمحل وأحضر لها العصير، ثم نزلا من السيارة؛ ليقفان خارجًا،
فبدأت نورسين بالتقاط الصور لهما، حتى طلب منها أن تتوقف عن
التصوير؛ فهناك ما يود إخبارها به، ففعلت.
- أنا مسافر عشان التجنيد بكرة
- أجابت بصدمة: إيه!، وليه مقولتليش بدري يا رحيم
- كانت هتفرق في إيه يعني غير إن قلقك يزيد كام يوم!
نظرت للأسفل بأسى وامتلات عينها بالدموع، فقال وهو ينظر إليها:
- شايفة القمر اللي فوق ده
- رفعت رأسها وقالت: ماله؟
- إسمك معناه نور القمر.. كنتي لي النور اللي بيظهر وسط الضلمة،
على عكس الشمس نورها قوي لما تبصي لها عينك توجعك، أما إنتي نورك
هادئ؛ بيطمئن، ميضايقش
مسحت عينها ونظرت له وهي تقول:
- القمر مش هينور من غير الشمس، مصدر ضوءه الوحيد.. أنا من
غيرك مش هنور يا رحيم
- أحسن برضه عشان متتوريش لحد غيري

■ حان دورك

تبدلت دموعها بضحكاتها المتتابعة وهي معه؛ فقد نجح دومًا في جعلها سعيدة منذ أن صارا معًا.

ما أجمل الحب حين يصل للتلحق، وما أقبحه حين تُجبر على الوداع!
صمتت قليلاً ثم أخذت نفس يصحبه اعترافها له بشأن البحث، بدايةً
من لقاءها ب محمد، وختامًا بإنشاء الفريق، وظلّ هو يستمع بهدوء وما أن
انتهت حتى بدأ حديثه قائلاً:

- متأكدة إن ده السبب الوحيد اللي خلاكي عملي البحث ده، بالجودة
والتركيز ده كله!

- قالت بتوتر: ليه بتسأل السؤال ده؟

- ابتسم لها وقال: عشان مش مصدق.. × لم يجد منها ردًا × زي ما
تحبّي، يلا عشان أوصلك

- أوقفته قائلة: هقولك.. بس إنت مش هتزعل مني صح؟!

- طالما حاجة فانت يبقى متهمنيش

- أمال عايز تعرف ليه؟

- لأنك قررتي تحكي، فمفيش داعي إنك تخبي حاجة..

- تنهدت ثم قالت: اللي حصل مكنش مجرد صدفة، كل حاجة كان
متخطط لها

- عقد حاجبيه وقال: إزاي؟!

بدأت نورسين ب سرد الحقيقة كاملة على رحيم لم تتوقع يوماً أنها ستجد

من تثق به لتلك الدرجة وتشاركه كل ما تحتفظ به من أسرار عنها وتغيرت توقعاتها فور دخوله حياتها ، استمرت تروي له كل شئ حتى انتهت ، لكنها لم تلقَ منه أي رد فعل ، بل كان يسمعها بإصغاء وهدوء شديدين وانتظرها حتى أنهت حديثها ثم قال بالهدوء ذاته:

- أنا مقدرّ اللي إنتي عملتيه.. لكن علي لازم يعرف الحقيقة يا نورسين

(20) حان دورك

على الرغم من كثرة المشاكل التي تواجهنا في الحياة، سنجد ما يهونها علينا.. من أشخاص، أو أحلام، أو مواقف، أو جميعهم. فعليك إدراك أن كل من في حياتك ما هم إلا أدوار ستنتهي، وسيرحلون يوماً، تاركين أثراً فيك، وكذلك تاركين مكان آخر لغيرهم، وينطبق الأمر عليك.. لذا يجد بك أن تحسن التصرف؛ لتؤدي دورك على أكمل وجه، وتجعل من يلقاك يتمنى الجميع مثلك.

عزيزي القارئ: أشكر وصولك لرسالتك الأخيرة والتي أتمنى حقاً أن تضيف تغييراً في حياتك، انتهاءك من قراءة هذه الرواية لا يعني النهاية، بل أنه يعني بداية رحلتك أنت، فأنت البطل الحقيقي؛ فالآن يحين دورك! مرّ شهر على دخول رحيم الجيش، ولا زال كل يوم يمضي على نورسين كأنه دهر، تخشى عليه أن يصيبه أذى؛ فتدعو الله أن يرده إليها سالمًا، تُشغل عقلها عن القلق: بشراء مستلزماتها ومُعانة منزلهم والبحث عن أثاث يناسب ذوقهما؛ لتطمئن قلبها أن ما هي إلا أشهر بسيطة وسيعود ليتزوجا.

كان علي يجلس في مكتبه بعد انتهاء آخر موعد له اليوم، فأسند ظهره على الكرسي وبدأ بقراءة بعض الأخبار التي تصدرت الإنترنت الفترة الأخيرة عن دكتور محمد وبحثه الذي حقق نجاحًا عظيم في علم النفس،

شعر بالسعادة أنه شارك في شئٍ ساعد الكثير من الناس حتى وإن لم يكن هدفه المساعدة في البداية، ولكنه الآن تغير. كم ستُساعد نورسين كثيرًا بذلك الخبر، حتى أن مجموعة الفيسبوك حققت نجاح لم يتوقعه أحد، ولكنهم تمنوه جميعًا.

دخلت علياء المكتب بعد أن أذن لها علي بالدخول:

- دكتور علي الجواب ده وصل لحضرتك من شوية

- قال مستنكرًا: جواب!، هولسة في حد بيستخدم الطريقة دي؟، عامةً

شكرا يا علياء اتفضلتي إنتي

خرجت علياء؛ عائدة لمكتبها، وحينها فتح علي الظرف وقد وجد بداخله

رسالة مكتوبة بخط اليد فبدأ بقراءتها:

(مفيش حاجة حصلت بالصدفة، أنا اللي قولت لأمي تروح لحضرتك وتحكي لك عن حالتي، بعد ما أدركت إن احتمال كبير محدش يجرب البحث من اللي أنا عييزاهم؛ قررت أغير الخطة، وبدل ما أنتقم من اللي أجرموا في حق ناس كثير، أحاول أساعد الناس اللي ممكن تتعرض لحاجة زي دي في المستقبل، والوحيد اللي هيقدر يساعديني في ده شخص له علاقات كثير مع ناس بتعاني بالفعل، والشخص ده بيبقى إنت؛ دكتور محمد قال إسمك قدامي في مرة وهو بيكلمك من غير قصد، وقتها بحثت عنك وقدرت أوصل لك، وكنت عارفة إن لما ماما تحكي لك عن حالتي فضولك هييجبرك تكلمني، وحصل.. في الأول مثلت عليك الرفض عشان تصدقني وبعدها حكيت لك كل حاجة، وطلبت منك تساعديني في فكرة التيم وكنت واثقة

■ حان دورك

إن إحساسك بالذنب هيجبرك توافق، وبرضه حصل. أنا كنت عارفة إنني خُضت التجربة، معرفش إزاي صدقتوا إنني مش هعرف حاجة أنا عملها بإيدي وأنا كمان اللي مختارة أشوف الشخصيات دي تحديداً، بس عشان تقنتع أكثر كان لازم أمثل على دكتور محمد إنني بسأل على المعاد اللي هجرب فيه البحث على أساس إنني معرفش إنه اتجرب عليا أصلاً؛ ودي كانت خطوة احتياطي عشان لو حصل بينك وبينه كلام في الموضوع ده يبقى السيناريو واحد. وعشان أكون صارحتك بكل حاجة، السبب اللي خلاني أعمل البحث ده إنني من أهل الضحية اللي مكلمتش عشر سنين يا دكتور، الطفلة اللي حياتها اتسرقت منها قبل ما تبدأها وبطريقة بشعة، الحاجة الوحيدة اللي كانت ممكن تمنعني عن كل ده إنهم يتعاقبوا على كل روح ماتت بسببهم، لكن ده محصلش، وعشان محصلش ومش هيحصل؛ كل يوم حد يموت في حادثة أبشع من اللي قبلها، ومحدث بيتكلم، احنا موجودين في حياة بعض ضيوف شرف ومش دايمين، لكن ده مش معناه إن كلنا نبقى بنأدي نفس الدور، أنا مقتنعة إن دوري مش السكوت!، وعشان كده حاولت أعمل حاجة.. مسير دورك ينتهي لكن أثره هيفضل في اللي حواليك، وده اللي حاولت أعمله وأمي ساعدتني في ده لما شافت كسرة أم البننت، وكسرتها دي كانت إشارة إن دوري بدأ ولازم آديه على أكمل وجه.

وإن كان على الوجع اللي حسيت بيه في اللحم وحكيت هولك، فأنا عشت أضعافه في الحقيقة بعد موتها!

أنا عارفة إنني كدبت واستغليتك وحقيبي أنا أسفة، لكن مكنتش شايفة

حل ثاني.. وأظن النتيجة ممكن تكفر لي عن اللي عملته مع حضرتك!)
بتمنى من كل قلبي إنك تسامحني..
نورسين مصطفى



في تلك الأثناء كان يوسف يجلس بقرب ونس في زيارة عائلية لهما يتاولان الفاكهة ويشاهدان التلفاز معاً، حتى فتحت ونس هاتفها ووجهته ل يوسف وهي تقول:

- شوف برضه الناس دي مفيش فايده فيها أبداً، يلاقوا حد بيعمل حاجة كويسة مش يشجعوه لأ.. دول يحبطوا اللي خلفوه عشان يرتاحوا
 - أجب يوسف باسامة وتجاهل: يا حبيبتي كبري دماغك، احنا بنعمل ده لربنا ثم للناس والحمد لله في كثير أو بيشجعنا وبيتسفاذ ويفيد غيره.
 - تدخلت والدة ونس: هو إيه الحكاية يا ولاد؟
 - ردّت ونس: الجروب بتاعنا يا ماما، في ناس كده ربنا يهديها داخلة يا تتريق يا تشتم حاجة كده ملهاش لازمة
 - ضحكت أمها بشدة ثم أردفت: هو الشعب ده كده ميسيبش حاجة إلا ويطلع القطن الفاطسة فيها، حتى لو بيعمل نفس الحاجة، تلاقى الرجل بيتريق على ممثل ولا فيلم، وبعدها بشوية يروح يتفرج عليه..
 - والله في دي عندك حق يا حماتي، ما تغيّري لنا المسلسل ده يا ونس
- مبيطقش الواد ده
- الريموت عندك أهوات اللي إنت عايزه

- ولا أقولك سيبيه أهو يبيضحك

- قالت والدة ونس: شوف الولد

وأما فرح كانت قد أنهت محاضرتها للتو وتستعد للرحيل حتى أوقفها
أحد الأشخاص:

- كوتش فرح

- أيوة؟

- أنا نوران ودي أول محاضرة ليا معاكي..

- نورتي يا نوران، يارب تكوني استقدتي.. أقدر أساعدك في حاجة؟

- أجابت بإحباط: كل حد بيدخل حياتي بضره وبأذيه من غير ما أكون

قاصدة والله.. مش عارفة العيب في..

- قاطعتها بابتسامة ثم قالت: مفيش حد مؤذي ببسأل السؤال ده

وبيبقى خايف يكون كده، وأوعدك إني هتكلم عن الموضوع ده كتير الفترة

الجاية متقلقيش

بيبدو أنها مشكلة تُحل ولكنها لا تنتهي.. فور خروج فرح من المبنى قابلها

الشاب ذاته الذي تأذت ساقه مقابل دفاعه عنها وبرفقتة أحد أصدقائه؛

ليعاونه على السير، مجرد رؤيتها له جعلتها تتوتر وتزداد ارتباكاً وتُعاد

تفاصيل الحادث في ذهنها، لكن ذلك لم يدم طويلاً فقد تحدث الشاب قائلاً:

- مكذبش عليك في البداية كنت كاره اليوم اللي شوفتك فيه واللي

حصل لي.. لكن كل ده اتغير، أنا جيت أشكرك؛ لولا الإصابة دي وقعدتي

في البيت مكنتش قدرت أحقق حلمي اللي الشغل خلاني أنساه، رجعت أكتب شعر تاني ابتسم أستأذنيك بقى عشان عندي حفلة إلقاء كانت جملته بسيطة ولكنها سمحت لـ قلب فرح أن تزوره الفرحة مجددًا.

جلست نورسين على فراشها، تُفكر كيف ستكون ردة فعل "علي" حاملما تصله الرسالة؟، فبعد التحاق رحيم بالجيش فكرت كثيرًا فيما قاله؛ وأدرت أنه على صواب، فمن حق علي أن يعلم الحقيقة، لكنها كذلك لن تتمكن من مواجهته لذلك لجأت لإرسال ما تود قوله ك جواب مكتوب، إليه.

كانت تلك الرسالة نهاية علاقة علي بنورسين، أو هكذا ظننت، فقد قام علي بتجاهل اتصالاتها، وأغلق عيادته معلناً خضوعه لإجازة مفتوحة لا يعلم متى تنتهي، وسجّل خروجه من حساب الفيسبوك؛ منعًا من تلقي أي طلبات بخصوص الفريق أو حتى عمله، بقيت نورسين تزور محل عيادته؛ على أمل أن تجده قد عاد يومًا، ولكن يبدو أنه لن يغفر، ومع ذلك فقد طلبت من حارس العمارة التي تكمن بها العيادة أن يُبلغها فورًا إن عاد علي، تاركة معه رقم هاتفها، وحاول الجميع كذلك العثور عليه ولكن دون جدوى. وقد استمر الحال على ما هو عليه لمدة سنة وأربعة أشهر كان قد أنهى فيهم رحيم جيشه، وفور أن علم بما حدث جراء اعتراف نورسين نار غضبًا وحاول مرارًا الوصول إليه ولم يجده، حتى استسلم لفكرة رحيله أمام الجميع، ولكن في الخفاء كان يحاول مجددًا أملًا الوصول إليه.. إلى

■ حان دورك

أن جاء اليوم الموعد الذي تلقت فيه نورسين اتصالاً من حارس العمارة؛ يُخبرها بعودة علي، كادت أن تقفز فرحاً ولكن سعادتها لم تُتسِّها الاتصال برحيم وإخباره فهي أكثر الأشخاص دراية بمدى حزنه على غياب علي، وقد كان، وفي اليوم التالي ذهباً قبل موعد مجيئه وقد علماً أنه لم يعلن فتح العيادة بعد لكنه أخبر الحارس بإحضار أحد لتنظيف المكان؛ استعداداً لفتحه، مرت نصف ساعة حتى سمعنا صوت المصعد معلناً وصول أحدهم، وما أن فُتح الباب حتى تأكداً من هويته، لم يستطع رحيم تمالك نفسه؛ فقد اندفع نحوه وعانقه بحرارة كما لو أنه وجد أخاه المفقود منذ سنوات، ولكن لقاء علي لم يكن بالحرارة نفسها، بل لم يصل لنصفها حتى!

بعد أن ابتعد رحيم عنه، سار علي ناحية الباب ونظر إلى نورسين بابتسامة لا روح فيها، ثم قام بفتح الباب ودعاهم للدخول قائلاً:

- معلى المكان مبهّد، قولت للبواب يجيب حد...

- قاطعته نورسين قائلة: أنا آسفة، حضرتك مش متخيل أنا اتضايقت

ازاي لما اختفيت من وسطنا والتميم كله اتضايق زيب وأكتر كمان وطبعاً أديك شُفت رحيم عمل إيه لما شافك!

- بتعتذري على إيه يا نورسين؟، أنا كمان كدبت مش إنتي بس، على الأقل

إنتي كان عندك هدف كويس وراء استغلالك ليا.. حتى لو الطريقة كانت غلط، بس أنا.. × ابتسم بأسى دون أن يكمل جملته × أنا غيايبي مكنش سببه الأساسي إنتي، كنت محتاج أراجع نفسي في حاجات كثيرة أوي، وبالنسبة للعيادة قفلتها عشان مكنش ينفع أفتحها غير لما أستاهل لقب دكتور.. دكتور

بيعالج الناس مش بيستغلهم لصالحه، يمكن كدبك عليا ضايقتني وحرقتني
دمي بس كان رد طبيعي من ربنا، أنا مش هينفع أبقى معاكم تاني
- بالعكس حضرتك أولى الناس أنه يكون وسطنا بعد كل المجهود اللي
بذلته معنا

- تدخل رحيم: مش إنت برضه اللي قولت لنا إن بني آدم طبعه خطأ
ومش عيب إننا نغلط؟، كلنا غلطنا وإنت ساعدتنا كلنا نفوق ونرجع لحياتنا،
نورسين غلطت في حقك واعترفت لك زي ما أنت عملت من قبلها، يبقى ليه
بتلوم نفسك دلوقتي؟، ويا عم اعتبر اللي حصل كله درس من ربنا نتعلم
منه، لكن منوقفش عنده!

- وبتقول على نفسك متستاهلش لقب دكتور؟، بص لـ رحيم وركز في
كلامه ليك وحضرتك تصدق إنك من أحق الناس باللقب ده
- كلامكوا على راسي.. بس زي ما قولتي في رسالتك احنا ضيوف شرف
في حياة بعض وكل واحد له دور، اعتبروا إن دوري انتهى!

- علّق رحيم: حلووو أوي الكلام ده، إنت دورك انتهى في حياتنا، ودلوقتي
دورنا.. بقولك إيه يا دكتور من الآخر كده احنا مش ماشيين من هنا غير
وإنت جاي معنا نحتفل برجوعك

- بالظبط كده، وبعدين لومش عشان التيم، خليها عشاني.. الشاب اللي
جنبك ده موقوف كل تجهيزات الفرحة من ساعة ما رجع عشان مش عارف يوصلك
- طبعًا... ده حتى لولا دكتور علي مكنش زمانًا عرفنا بعض بيبقى ازاي
نتجوز من غيرهم؟

حان دورك ■

- قال علي وقد بدأ يعود لسابق عهده: سيبوني مدة أفكر وهـ..
- على بركة الله، نقول مبروك×نظر إلى علي×هااا يا عم التقليل، هنعحتفل؟
- صمت قليلاً ثم أردف: هنعحتفل يا رحيم..


وبالفعل عاد الفريق مكتملاً كسابق عهده، وكما أطلقوا على فريقهم اسم في محله "الحياة حلوة.. مش أوي" فإن كنت تبحث عن حياة وردية خالية من المشاكل فأنت تبحث عن سراب، فالحياة الحقيقية هي مزيج من التحديات والمواجهات واللحظات السعيدة والتقدم والسقوط والنهوض، إضافةً إلى "ضيوف الشرف" في حياتك، فهم حتماً يضيفون الكثير إليك ويغيرون العديد فيك.. فمن تجده يؤخر تقدمك أنهى دوره في حياتك سريعاً، وإن وجدت من يدفعك للأمام كلما انتهى دوره قم بإضافة جزء جديد، وكن دوماً مصاحباً لدور الخير؛ فإن لم يتنصر الخير في الدنيا، حتماً سينتصر في الآخرة!

وأخيراً.. عزيزي القارئ: إن كنت تملك القدرة على مساعدة أحدهم فإياك والتردد، وإن كنت بحاجة للمساعدة فلا تخشى طلبها ممن يقدمها.. فمساعدتك قد تنقذ أحدهم من مصير مؤلم، وطلبك للمساعدة قد ينتشلك من أحداث أكثر ألماً، واعلم في النهاية أننا لم نخلق في حياة بعضنا البعض هباءً.

حان دورك لتروي حكايتك

تمت بحمد الله.

٢٠٢٠-٦-١٤



منشورات الفنار



لا تنسوا
افتناء
المنار

ترحب منشورات المنار دائماً بأراء، ومُقتراحات قرائها
الأعضاء، وتدعوهم دومًا لإفادتنا بملاحظاتهم لتطوير
منتجها الثقافي على الدوام

راسلونا عبر بريدنا الإلكتروني

elfnaar@gmail.com